

# Is Meupiya He Tudtulanen Te Keagi Ni Jesu Kristu Sumalà Is Keguguza Ni Juan

## Is Mehitenged te Surat ni Juan

Hentei si Jesus? Iyan heini insà te mahabet he minge etew zutun te kegkaahaa zan kandin wey te kegkezinega zan te tudtul mehitenged kandin. Ne iyan ded daan heini insà te minge etew guntaan. Maan is kinahanglan he edsegipaan tew sikandin?

Si Juan, utew emigu ni Jesus. Ne hein neipus en is kebpatey wey kegkevanhew ni Jesus, wazà med-engked si Juan he ebpenudtul mehitenged ki Jesus. Mezakel is midtuu kandin, iyan, eduwazuwa zaan is дума umba inseysey ni Juan pinaagi te surat is mehitenged ki Jesus wey is mehitenged te minge penurù ni Jesus su wey meketuu is kada sevaha.

Kayi te surat ni Juan egkevasa ta is kebpetug-iringa ni Jesus te keugelingen din te igkeuyag te etew he iyan is keenen wey wahig su geine te ebegey sikandin te untung he wazà pidtemanan. Ne elin daan mibpetug-iringan din te keugelingen din is kerayag su geina te ebpeketayew sikandin te minge etew kayi te kelibutan. Ne iring daan sikandin te tegikaged te layud he kerehidu su geina te ebpurungan din ed-elimahi is minge sakup din. Impesavut ni Jesus he iyan dà sikandin sikan is ibayà pehendiyà te Amey zin he Megbevayà wey inseysey zin daan he neked-iring dan te Amey zin.

Ne guntaan, hentei si Jesus? Iyan sikandin utew lavew he egkinehenglanan tew, ne is minsan hentei he edawat wey edtuu kandin ebegayan din sikandan te ketenged wey zan mehimu he minge anak te Megbevayà. (Juan 1:12)

### Is Lalag he Ebpekevegey te Untung

**1** <sup>1</sup>Dengan te wazè pa limbaga is minsan hengkey, daan en is migeraran te Lalag te Megbevayà. Heini is Lalag te Megbevayà, daan sikandin he zuma te Megbevayà ne iyan en Megbevayà. <sup>2</sup>Dutun te kedlimbaga te langun, daan en sikandin he zuma te Megbevayà. <sup>3</sup>Is langun he midlimbag te Megbevayà, ne pinaagi kayi te Lalag, ne wazà minsan hengkey he midlimbag emun kenà pinaagi kandin te Lalag te Megbevayà. <sup>4</sup>Ne heini is Lalag te Megbevayà, iyan daan sikandin sikan is puunà te untung he wazà pidtemanan, ne heini is untung, iring te kerayag su ebpeketayew te kesusireman te isip te tivuuk he menusiya. <sup>5</sup>Neketayew haazà is kerayag te kesusireman kayi te kelibutan. Ne is kerayag, wazà mezaag kayi te kesusireman.

<sup>6</sup>Duen etew he migngезanan ki Juan he midsugù te Megbevayà. Umba midsugù heini si Juan te Megbevayà <sup>7</sup>su wey zin ikepenurù diyà te munge etew he iyan si Jesu Kristu sikan is tutuu he kerayag, su wey meketuu is tivuuk he menusiya pinaagi zutun te penurù. <sup>8</sup>Heini si Juan, kenà iyan sikandin sikan is kerayag, kekenà, iyan sikan is edseysey ke hentei is kerayag. <sup>9</sup>Ne zutun he timpu nekeuma zini te kelibutan si Kristu, sikan is tutuu he kerayag. Iyan sikandin sikan is ebpeketayew te isip te tivuuk he menusiya.

<sup>10</sup>Ne nekeuma si Kristu zini te kelibutan. Pinaagi kandin midlimbag is kelibutan, iyan, wazà sikandin mekilala te menusiya. <sup>11</sup>Minsan te ziyà sikandin mekeuma te keugelingen din he munge inged, wazà utew zutun te munge zuma zin midawat kandin. <sup>12</sup>Asal is minsan hentei he nekezawat wey midtuu kandin, mibegayan din sikandan te ketenged wey zan mehimu he munge anak te Megbevayà. <sup>13</sup>Is paagi te kegkehimu zan he anak te Megbevayà, kenà iyan kes paagi te kegkevuwad dini te kelibutan su wazè dan dutun ianak pinaagi te kegkevuwad te kelibutanen he amey, kekenà, iyan amey zan is Megbevayà.

<sup>14</sup>Ne sikan is nekagi he Lalag te Megbevayà, nehimu he menusiya ne mid-amur kenitew. Uteu sikandin beligegawen wey utew tutuu is munge lalag din. Neehè dey is utew zin kebpekelavew he iyan is kebpekelavew te vudtung he Anak te Megbevayà. Ne haazà is kebpekelavew zin, imbegey kandin te Amey zin he Megbevayà.

<sup>15</sup>Ne heini si Juan, impesavut din ke hentei sikandin. Midhabet si Juan mekgagi te, “Iyan heini sikan is etew he migkagi ku he ke siak te, ‘Duen etew he egkehuziyan kediey he lavew pa kenà siak, su zengan te wazè e pa ianak, daan en sikandin,’” ke si Juan.

<sup>16</sup>Ne geina te utew sikandin beligegawen kenà egketapus is munge meupiya he idtuvad din kenitew te langun. <sup>17</sup>Ne pinaagi ki Moises imbulus te Megbevayà sikan is munge kesuguan, iyan, pinaagi ki Jesus

imbulus te Megbevayà is gagew zin kenitew wey is tutuu he tuluuwen. <sup>18</sup>Wazè pa menusiya he nekeahà te Megbevayà, iyan, sikan is Anak din he vudtung, impetuanan din kenitew is Amey zin he Megbevayà su iyan dan layun telezuma.

### **Is Kebpekilelaa ni Juan Megbebewtismu te Keugelingen Din**

*(Juan 1:19-28; Mateo 3:1-12; Marcos 1:1-8; Lucas 3:1-18)*

<sup>19,20</sup>Duen minge memumuhat wey minge kevuwazan ni Levi he midhendiyà te ki Juan Megbebewtismu. Midsugù sikandan te minge punuan te minge Hudiyu punan te Hiruselim wey zan meinsai si Juan ke hentei sikandin. Ne iyan heini migkagi ni Juan su wazè din ieles, ke sikandin te, “Siak, kenà a iyan kes mibpili te Megbevayà wey mekehadì.” <sup>21</sup>Ne ke sikandan te, “Iyan ke ve kes ebpeneuven dengan he si Elias?” Ne ke si Juan te, “Kenà a zaan.” Ne ke sikandan te, “Kela ke iyan ka sikan is netagnà he mibpenaub te Megbevayà?” Ne ke si Juan te, “Kenà a zaan.” <sup>22</sup>Ne ke sikandan en maan te, “Kegiyi key ke hentei ka su kinahanglan he zuen idtavak dey te midsugù kenami. Hengkey is egkekagi nu mehitenged kayi?” <sup>23</sup>Ne zutun midtavak si Juan. Is tavak din iring te insurat dengan te ebpeneuven he si Esaias. Ke si Juan te,

“Iyan a sikan is netagnà he etew

he egkezineg is kedwali zin diyà te tanà he wazà duen ed-ubpà.

Ke sikandin te,

‘Tendanga niw is ibayà he ed-ikulen te Nengazen.’ ”

<sup>24</sup>Heini is minge etew he ed-insà ki Juan, ne minge sugù te minge Perisiyu. <sup>25</sup>Mid-insè dan en maan te, “Emun kenè ka iyan sikan is mibpili te Megbevayà wey mekehadì, ne kenè ka zaan si Elias, wey kenè ka sikan is netagnà he ebpeneuven, maan is ebpemewtismu ka te minge etew?”

<sup>26</sup>Ne zutun midtavak si Juan te, “Tutuu iyan he ebpemewtismu a, iyan, pinaagi zà te wahig, iyan, duen duma niw he wazè niw mekilala <sup>27</sup>he ebpekeuma he huziyan kediey he utew lavew kenà siak. Siak, minsan is kebpul-ut dà te sepatus din, kenè e pa zait he suluguen din,” ke si Juan.

<sup>28</sup>Ne nehitavù heini is langun diyà te inged he Bitanya he ziyà layun te wahig he Hurdan he zutun ebpemewtismu si Juan.

<sup>29</sup>Hein mid-ilis he andew zutun, naahà ni Juan si Jesus he edhendiyà te kandin, ne ke si Juan diyà te minge etew, “Iyan heini sikan is etew he egngezanan te ibpemuhat he Nati he Kerehidu he ibegey te Megbevayà su pinaagi kandin egkeawà is minge memezaat he ulaula te menusiya.

### **Is Kebpekilelaa ki Jesu Kristu**

*(Juan 1:29-34; Mateo 3:13-17; Marcos 1:9-11; Lucas 3:21,22)*

<sup>30</sup>Iyan heini kes migkagi ku he ke siak te, ‘Duen etew he egkehuziyan kediey, iyan, lavew sikandin kediey su zaan en sikandin te wazè e pa ianak.’ <sup>31</sup>Hein aney,” ke si Juan, “wazè ku metueni ke hentei sikandin,

iyang, umban ebpemewtismu a su wey metueni te munge zuma tew he munge kevuwazan ni Israyil he megaan sikandin ebpekeuma.”

<sup>32</sup>Ne mid-uman megkagi si Juan te, “Neehè ku is Wagas he Mulin-ulin he ebuun diyà te langit he edlugtanà diyà te ki Jesus iring te merepatik ne wazè din ewai si Jesus. <sup>33</sup>Ne hein aney zutun,” ke si Juan, “wazè ku pa metueni he iyang sikandin kes netagnà he hadi, iyang, sikan is Megbevayà he iyang midsugù kedì wey a mekepemewtismu pinaagi te wahig, migkagi kedì he zaan te, ‘Emun egkeehè nu is etew he edtenaan wey kenà ed-ewaan te Wagas he Mulin-ulin, iyang en etew he ibpemewtismu zin is Wagas he Mulin-ulin.’ <sup>34</sup>Neehè ku en,” ke si Juan, “ne egkegiyen ku keniyu he iyang sikandin sikan is Anak te Megbevayà.”

### Is Kebpilia ni Jesus te Nehuna he Menge Sumusundan Din

<sup>35</sup>Ne hein mid-ilis dutun he andew, diyè en maan si Juan duma is dezuwa he munge sumusundan din te naahaan din ki Jesus. <sup>36</sup>Ne neehè din en maan si Jesus is edsagad. Ke si Juan te, “Iyang heeyan sikan is etew he iring te ibpemuhat he Nati he Kerehidu he imbegey te Megbevayà!” <sup>37</sup>Ne hein nezing heini zutun te munge sumusundan din he zezuwa, miduma zan ki Jesus. <sup>38</sup>Midteren si Jesus ne midlilingey ne neehè din he eduma sikandan ne ke sikandin te, “Hengkey is tuyù niw?” Ne ke sikandan te, “Rabi,” he ke và dà egkegiya, Menunudlù, “hendi ka ed-ubpà?” <sup>39</sup>Ne midtavak si Jesus te, “Duma kew kedì wey niw maahà.” Ne miduma zan ne neehè dan is ed-ubpaan din. Mahapun en dutun ne wey zan med-ulì hein mezikilem en.

<sup>40</sup>Iyang si Andres sevaha zutun te zezuwa he nekezing te migkagi ni Juan wey miduma ki Jesus. Telesuled si Andres wey si Simon he migeraran ki Pedro. <sup>41</sup>Ne si Andres, segugunè din mibpen-ahà is suled din he si Simon. “Neehè dey sikan is Misiyas,” ke sikandin. (Ne iyang kehulugan kayi te ngazan he Misiyas is Kristu, *he ke và dà egkegiya, mibpili te Megbevayà he ibpahadi.*) <sup>42</sup>Ne miduma zin si Simon ne midhendiyè dan te ki Jesus. Ne si Jesus, midtengtangan din si Simon. “Iyang ka si Simon he anak ni Juan. Egeraran ku sikew ki Sipas,” ke si Jesus. (Is gerar he Sipas ne iyang ded sikan is ngazan he Pedro. *Ne is kehulugan kayi, ne watu.*)

### Is Kebpilia ni Jesus ki Felipe wey ki Natanael

<sup>43</sup>Ne hein mid-ilis he andew zutun neisip ni Jesus he edhendiyà te prubinsya he Geliliya. Mibeyaan din si Felipe ne ke sikandin te, “Duma ka kedì.” <sup>44</sup>TigBitsayda si Felipe, ne is inged he Bitsayda, iyang daan ed-ubpaan ni Andres wey ni Pedro. <sup>45</sup>Ne si Felipe, mibeyaan din si Natanael, ne ke sikandin te, “Neehè dey en kes etew he netagnà dengan te ebpemeneuwen wey netagnà ni Moises dutun te insurat din diyà te libru he kesuguan. TigNeserit sikandin he si Jesus he anak ni Jose.” <sup>46</sup>Ne zutun

migkagi si Natanael te, “Duen be etew he zuen din pulus he tigNeserit?” Ne ke si Felipe te, “Edhendiyè ki wey nu maahà.”

<sup>47</sup>Ne hein ebpelpelingguma zan en naahà ni Jesus si Natanael, ne ke si Jesus te, “Tutuu heini he kevuwazan ni Israyil su wazè din edtembulan.” <sup>48</sup>Ne ke si Natanael te, “Maan is egkekilala a kenikew?” Ne ke si Jesus te, “Te wazè ke pa beyai ni Felipe, neehè ku sikew is diyà te sihung te kayu he igira.” <sup>49</sup>Ne zutun migkagi si Natanael te, “Datù, tutuu ves iyan he iyan ka sikan is Anak te Megbevayà; iyan ka sikan is netagnà he hadi dey te menge kevuwazan ni Israyil.” <sup>50</sup>Ne migkagi si Jesus te, “Ebpeketuu ke ve tenged dà te migkagi ku kenikew he neehè ku sikew ziyà te sihung te kayu he igira? Duen pa egkeehè nu keuzemà he lavew pa he egkein-inuwan.” <sup>51</sup>Ne mid-uman si Jesus megkagi kandin te, “Benar is egkegiyen ku kenikew he egkeehè niw keuzemà is langit he egkepuwasan ne siak is Kakey te Menusiyà, duen egkengeehè niw he menge velinsuguen te Megbevayà he ebpememenahik wey ebpemenaug diyà te etuvangan ku.”

### Is Keemuran Diyà te Kana

**2** <sup>1</sup>Ne nekezuwa zutun duen eseweey ziyà te inged he Kana he ziyà te prubinsya he Geliliya, ne midtelavuk is iney ni Jesus. <sup>2</sup>Ne zutun daan si Jesus wey is menge sumusundan din, su neumbita zaan sikandan he medtelavuk dan. <sup>3</sup>Ne naamin is binu he igastu zutun te eseweey, umba mibeyaan si Jesus te iney zin. Ne ke sikandin te, “Wazè dan en binu.” <sup>4</sup>Ne ke si Jesus te, “Inà, kenè ka kedì mebayàbayà su wazè pa metuman is hustu he timpu te kebpaahaa ku te gehem ku zini te menge etew.” <sup>5</sup>Ne is iney zin, migkegiyan din is menge suluguen te, “Tumana niw is minsan hengkey he sugù din keniyu.”

<sup>6</sup>Sumalà te tuluuwen te menge Hudiyu, kinahanglan he zuen wahig he ibpenlùlù te kenè dan pa egkaan. Ne tenged kayi zuen netegana zutun he heenem he umuy he watu. Egketeguan is kada sevaha zutun te menge nenggatus he litru he wahig. <sup>7</sup>Migkegiyan ni Jesus is menge suluguen te, “Penua niw heini te wahig.” Ne mibpemenù dan haazà is menge umuy taman te vivig. <sup>8</sup>Ne mid-uman megkagi si Jesus te, “Sekilut kew en wey uwita niw ziyà te edumala kayi te keemuran.” Ne mid-uwit dan, <sup>9</sup>ne is edumala, migezaman din haazà is wahig he mibaluy en he vinu. Wazè din metueni ke hendei ebpuun haazà is binu asal netueanan te menge suluguen he midsekilut dutun. Ne haazà is edumala, mid-umew zin haazà is ebpengesawa, <sup>10</sup>ne migkegiyan din te, “Sumalà te vetasan tew, ke zuen keemuran, ibpenagey idhuna is utew metaam he vinu, ne emun dekelè en is egkeinum te menge etew human ebpenegaya is kenà utew metaam. Iyan, sikew, guntaan nu en penegaya heini is binu he utew metaam!” ke sikandin.

<sup>11</sup>Iyan haazà nehuna he egkein-inuwan he mibeelan ni Jesus; midhimu zin diyà te inged he Kana ziyà te prubinsya he Geliliya, ne pinaagi

zutun impeehè din is dekelà he gehem din ne midtuu kandin is menge sumusundan din.

<sup>12</sup>Neiwas haazà, si Jesus wey is iney zin wey menge suled din wey is menge sumusundan din, midhendiyè dan te inged he Kepirnaum ne wazè dan med-awà dutun seled te nepipira he andew.

**Is Kedseled ni Jesus Diyà te Valey te Megbevayà**

*(Juan 2:13-22; Mateo 21:12,13; Marcos 11:15-17; Lucas 19:45,46)*

<sup>13</sup>Megaan en dutun edtumana te menge Hudiuyu ziyà te inged he Hiruselim is Pista te Kedlevayi. Ne tenged kayi midhendiyà ensi Jesus te Hiruselim.

<sup>14</sup>Ne ziyà te zekelà he simbahan he egngезanan te Valey te Megbevayà neehè din is ebpemelegyà te menge ibpemuhat he vaka, wey menge kerehidu, wey menge merepatik. Ne neehè din daan is ebpemenliwà te menge selapì he ziyà te lemisan dan. <sup>15</sup>Ne mibaal sikandin te letigu he pisi ne mid-avug din pehendiyà te gawas dutun te Valey te Megbevayà is menge vaka wey kerehidu. Ne mibpemiley zin is menge lemisan te ebpemenliwà te selapì, ne is selapì dan, mid-ulaan din. <sup>16</sup>Ne migkegiyan din is ebpemelegyà te merepatik te, “Iawè niw heeyan! Kenè niw himuwa he tiyenggiyan heini is Baley te Amey ku he Megbevayà.” <sup>17</sup>Ne zutun netenuzan te menge sumusundan din is ingkesurat dengan he tagnà he edhenduen te, “Uteu zekelà is kegkenuguni ku te valey nu te Megbevayà umba egkehimu he ibmesakit utew te gehinawa ku.”

<sup>18</sup>Ne zutun mid-insaan si Jesus te menge punuan te menge Hudiuyu, ke sikandan te, “Duen be egkein-inuwan he igkepeehè nu wey key meketuu he mibegayan ka te Megbevayà te kegehè he ibpaawè nu heini is menge etew puun kayi te valey zin?” <sup>19</sup>Ne midtavak si Jesus te, “Rundusa niw heini is baley te Megbevayà ne seled te tetelu he andew egkevangan ku en maan!” <sup>20</sup>Ne midtavak dan te, “Kepatan wey heenem he tuig is kebeeli kayi he valey ne egkevangan nu ve seled dà te tetelu he andew?”

<sup>21</sup>Iyan, wazè dan mesavut he is baley he egkegiyan ni Jesus iyan is lawa zin. <sup>22</sup>Ne neuget pa zutun hein nevanhew en si Jesus, netenuzan te menge sumusundan din heini is migkagi zin dutun, ne human dan dutun mesavut he tutuu is netagnà te insurat he Lalag te Megbevayà *mehitenged te kegkevanhew ni Jesus* wey tutuu zaan is midtagrà ni Jesus.

<sup>23</sup>Ne zutun te timpu te Pista te Kedlevayi hein diyè pa ensi Jesus te inged he Hiruselim, mezakel is nemeketuu kandin su neehè dan is menge egkein-inuwan he midhimu zin. <sup>24</sup>Iyan, wazà si Jesus mevenari te kedtuu zan kandin su netuenan din ke hengkey is diyà te gehinawa te tivuuk he menusiya. <sup>25</sup>Ne minsan te wazà edtazem kandin ke hengkey is neseled te gehinawa te menge etew netuenan din en su nesayud sikandin he zaan ke hengkey is gehinawa te menusiya.

## Si Jesus wey Si Nikudimu

**3** <sup>1</sup>Duen etew he eggezanan ki Nikudimu. Sevaha sikandin he sakup te upakat he eggezanan te Peresiyu. Heini si Nikudimu, ne sevaha he punuan te minge Hudiyu. <sup>2</sup>Midhendiyà sikandin te ki Jesus dutun te mezikilem ne migkegiyan din si Jesus te, “Datù, netueanan dey he menunudlù ka he sugù te Megbevayà su is minge egkein-inuwan he ebeelan nu, iyan dà ebpekehimu te iring kayi is etew he ebegayan te gehem te Megbevayà.” <sup>3</sup>Ne midtavak si Jesus te, “Benar is egkegiyen ku kenikew he wey zà ebpekeragkes is etew ziyà te minge etew he edhedian te Megbevayà ke ebpaanak sikandin ebpeuman.” <sup>4</sup>Ne mid-insà si Nikudimu ke, “Ebmenmenuwen te etew he megurang en is kebpaanak kebpeuman su kenè en man sikandin ebpekelikù te getek te iney zin wey iuman ianak.” <sup>5</sup>Ne ke si Jesus te, “Uteu venar is egkegiyen ku kenikew he wey zà ebpekeragkes is etew ziyà te minge etew he edhedian te Megbevayà ke id-anak sikandin pinaagi te wahig wey pinaagi te gehem te Wagas he Mulin-ulin. <sup>6</sup>Is id-anak pinaagi te etew, ne etew zà daan, iyan, is id-anak pinaagi te gehem te Wagas he Mulin-ulin, diyà ed-ubpà te kandin is Wagas he Mulin-ulin. <sup>7</sup>Kenè ka meinuinu te migkagi ku kenikew he kinahanglan he ebpaanak kew ebpeuman. <sup>8</sup>Is keramag, minsan hendei zà duen ebpevayà ne egketuusan ta su egkezineg ta is daging din, iyan, kenè ta egketueanan ke hendei ebpuun wey ke hendei ebpevayà. iring din ded daan is gehem te Wagas he Mulin-ulin diyà te etew he id-anak pinaagi te gehem din su kenà heini egkesavut te etew zà duen.” <sup>9</sup>Ne zutun mid-insà si Nikudimu te, “Egkemenumenue heini?” <sup>10</sup>Ne ke si Jesus te, “Punuan ka he menunudlù kayi te minge zuma tew he minge kevuwazan ni Israyil, ne kenè nu ves egkesavut heini is egkegiyen ku? <sup>11</sup>Kenè nu lipati he is egkegiyen dey, kenà tarù. Netueanan dey he tutuu is ibpesavut dey su neehè dey en, iyan, kenè niw mulà edtuuwan is egkegiyen dey. <sup>12</sup>Ne emun kenè kew edtuu kediey ke ibpesavut ku keniyu is egkengeulaula zini te tanà, wey kew pe be meketuu ke ibpesavut ku keniyu is ed-ul-ulahan diyà te langit? <sup>13</sup>Hentei is nekehendiyà te langit? Iyan e zà is Kakey te Menusiyà su ziyà a ebpuun te langit.”

<sup>14</sup>Ne mid-uman megkagi si Jesus te, “Dengan te kemulu pa ensi Moises diyà te tanà he wazà duen ed-ubpà he etew mibeelan din is uled he galang ne intaud din te kayu ne imbayew zin. Siak is Kakey te Menusiyà, iring din ded daan is egkehitavù kedì keuzemà su idtaud a zaan te kayu ne ibayew a. <sup>15</sup>Umba egkehitavù heini su wey is langun he edtuu kediey mevegayi te untung he wazà pidtemanan. <sup>16</sup>Uteu mahal ziyà te gehinawa te Megbevayà is tivuuk he menusiyà, ne tenged kayi minsan sikan is budtung he Anak din wazè din menuguni, kekenà, impehendini zin su wey is langun he edtuu kandin, kenà mesiluti is gimukud dan, kekenà, mevegayi sikandan te untung he wazà pidtemanan. <sup>17</sup>Is Megbevayà, wazè

e zin is Anak din sugua zini te kelibutan te kedsilut te menusiya, kekenà, su wey pinaagi kedì melibri is menusiya.

<sup>18</sup>Is minsan hentei he edtuu kedì kenè en sikandin edsilutan te Megbevaya, iyan, is kenà edtuu kediey, netuenan en he zaan he edsilutan sikandin su siak is budtung he Anak te Megbevaya, wazè e zin tuuwi.

<sup>19</sup>Umba edsilutan sikandin su hein nekeuma a is migeraran te kerayag dini te kelibutan, midtumù din is kerusireman, *he ke và dà egkegiya, is kedsupaka te Megbevaya, kenà is kerayag su mezaat is ed-ul-olahan din.*

<sup>20</sup>Sikan is ed-ulaula te mezaat, kenè din egkesuatan is kerayag wey kenè din ed-uwayan is kerayag su kenè din egkesuatan he metueni is menge ulaula zin he mezaat. <sup>21</sup>Iyan, sikan is edtuman te tutuu he tuluuwen, edhendiyà mulà te kerayag. Umba edhendiyà sikandin te kerayag su wey metueni he pinaagi te gehem te Megbevaya nehimu zin is metazeng he ulaula.”

### Is Menge Lalag ni Juan Mehitenged ki Jesus

<sup>22</sup>Ne neiwas heini, midhendiyà si Jesus wey is menge sumusundan din te prubinsya he Hudiyu. Ne zutun dan med-ubpà taman te nepipira he andew su ebpemewtismu si Jesus te menge etew. <sup>23</sup>Ne si Juan Megbebewtismu, ebpemewtismu zaan asal ziyà sikandin ebpemewtismu te inged he Inun he uvey te inged he Salim su mezakel is menge wahig dutun. Ne nemenhendutun is menge etew ne mibpebewtismu sikandan. <sup>24</sup>(Wazè pa zutun pirisuwa si Juan.)

<sup>25</sup>Ne zutun duen menge sumusundan ni Juan he ebpekidlewanà te sevaha he etew he Hudiyu. Iyan edlewenaan dan is tuluuwen dan te menge Hudiyu te kebepemewtismu. <sup>26</sup>Ne midhendiyè dan te ki Juan ne ke sikandan te, “Menunudlù, sikan is etew he zuma nu hein diyè ka layun te wahig he Hurdan, sikan is migkagi nu, ebpemewtismu zaan sikandin ne mezakel he etew is edsundan kandin.” <sup>27</sup>Ne midtavak si Juan te, “Wazà gehem te minsan hentei ke wazà ivegey kandin te Megbevaya. <sup>28</sup>Iyan kew ebpeketistigus he migkagi ku he kenà a iyan sikan is mibpilì te Megbevaya wey mekehadì, kekenà, midsugù a te Megbevaya wey a mehuna mekeuma, ne human sikan is hadì. <sup>29,30</sup>Penenglitan ke zuen mibpengesawa, ne naangken din en haazà is mid-esawa zin. Sikan is kumekagun dutun, utew meupiya is gehinawa zin emun egkezineg din haazà is mibpengesawa he ebpekidlalag en dutun te mid-esawa zin. *Ne iring din ded daan su utew ibmeupiya te gehinawa ku zaan ke mezakel is edsundan ki Jesus.* Kinahanglan he ed-iseg is bentugan ni Jesus, iyan, is kedì, kinahanglan he egkeawà,” ke si Juan.

<sup>31</sup>Is ebpuun diyà te langit ne lavew sikandin te minsan hentei. Is menusiya, ne zini zà ebpuun te kelibutan ne kelibutanen dà is egkegiyen din. Iyan, sikan is ebpuun te langit, lavew sikandin te langun.



<sup>32</sup>Egkegiyen din is neehè din wey nezineg din diyà te langit, iyan, mezelag duen ebpekezawat te egkegiyen din. <sup>33</sup>Iyan, is minsan hentei he edawat kayi ebpekepenistigus he tutuu is egkegiyen te Megbevayà. <sup>34</sup>Ne is midsugù te Megbevayà, egkegiyen din is ibpekagi kandin te Megbevayà su is Megbevayà, mibpepurungan din sikandin peulini te Wagas he Mulin-ulin. <sup>35</sup>Uteu mahal ziyà te gehinawa te Amey tew he Megbevayà is Anak din, ne insarig din kandin is kebayaàbayaà te langun. <sup>36</sup>Is minsan hentei he edtuu te Anak te Megbevayà, ebegayan sikandin te untung he wazà pidtemanan; is minsan hentei he kenà ebpepeming te menge sugù te Anak te Megbevayà, kenà egkevegayan te untung he wazà pidtemanan, kekenà, wazà pidtemanan te kegkepeuki kandin te Megbevayà.

### Sikan is Bahi he TigSemarya

**4** <sup>1-3</sup>Nezineg te menge Perisiyu is tudtul he mezakel is nengehimu ni Jesus he menge sumusundan wey mezakel is nengebawtismuwan ni Jesus kenà te ki Juan; asal wazà iyan si Jesus mebawtismu, kekenà, iyan is menge sumusundan din. Ne hein nezineg daan ni Jesus haazà he tudtul, mid-awà diyà te prubinsya he Hudiya ne mid-ulì diyà te prubinsya he Geliliya. <sup>4</sup>Ne zutun te ked-ulì eni Jesus, kinahanglan he ziyè dan ebpekevayà te prubinsya he Semarya.

<sup>5</sup>Ne nekeuma zan diyà te sevaha he inged diyà te Semarya he enggezanan te Sikar he uvey te tanà he imbegey zengan ni Hakub diyà te anak din he si Jose. <sup>6-8</sup>Ne zutun daan sikan is kalut he mibeelan dengan ni Hakub, ne si Jesus, geina te utew neveley te kedhipanew zin, mibpinuu zutun te uvey te kalut. Ne zutun neudtu is andew. Wazè din duma su is menge sumusundan din, midhendiyè dan te inged su ebpepemasu te egkeenen. Ne zuen nekeuma zutun he vahi he tigSemarya su edsekezu ne migkegiyan sikandin ni Jesus te, “Bayi, ipeinum e kun.” <sup>9</sup>Ne migkagi haazà is bahi te, “Hudiyu ka ne siak, tigSemarya a. Maan is ebuyù ka te wahig kayi te kedì?” Umba nekagi zin heini su is menge Hudiyu, kenè dan ebpekidlalag te minsan hentei he tigSemarya. <sup>10</sup>Ne zutun midtavak si Jesus te, “Bayi, angin ke netuenan nu is ibegey kenikew te Megbevayà wey ke hentei a is ebuyù te wahig su ebpekevuyù ka pezem dini te kediey te wahig ne egkevegayan ka te wahig he ebpekevegey te untung he wazà pidtemanan.” <sup>11</sup>Ne zutun migkagi haazà is bahi te, “Mama, wazè nu man sekilut ne mezalem heini is kalut. Hendei nu man egkekuwa heeyan is wahig he ebpekevegey te untung? <sup>12</sup>Is kepuun tew zengan he si Hakub, iyan mibaal kayi te kalut. Ne kayi med-inum sikandin wey is menge anak din wey is menge ayam din. Lavew ke ve ki Hakub?” <sup>13</sup>Ne midtavak si Jesus te, “Ke zuen egkemezahan he ed-inum kayi te wahig egkemezahan pa, <sup>14</sup>iyani, ke zuen ed-inum te wahig he ibegey ku kandin kenè en maan sikandin egkemezahan te minsan keenu. Su is wahig he ibegey ku

kandin, egkehimu ziyà te kandin he ulu te wahig he ebpekevegey kandin te untung he wazà pidtemanana.” <sup>15</sup>Ne migkagi haazà is bahi te, “Mama, begayi e kun keniyana te wahig he migkagi nu su wey kenà ad maan memezahi wey kenà ad daan maan ebpekesekezu zini.” <sup>16</sup>Ne ke si Jesus te, “Umawa nu is esawa nu ne likù ka zini.” <sup>17</sup>Ne migkagi haazà is bahi te, “Wazè ku esawa.” Ne migkagi si Jesus te, “Tutuu heeyan is migkagi nu he wazè nu esawa, <sup>18</sup>su lelima en is nekeesawa kenikew, ne is maama he ziyà te kenikew guntaan, benar iyan he kenè nu esawa.” <sup>19</sup>Ne mid-uman mekgagi haazà is bahi te, “Ebpenueven ke ves te Megbevayà? <sup>20</sup>Sikan is minge kepuun ku he tigSemarya, kayi zan te vuntut ed-ezapa is Megbevayà, iyan, sikiyu is minge Hudiyu, ibpenurù niw he kinahanglan he ziyè tew te Hiruselima ed-ezapa is Megbevayà.” <sup>21</sup>Ne migkagi si Jesus te, “Benar, Bayi, is egkegiyan ku kenikew he egkeuma is timpu he kenè en maan dini zà te vuntut wey minsan diyà te Hiruselima ed-ezapa is Amey tew he Megbevayà. <sup>22</sup>Sikiyu is minge tigSemarya, kenè niw egketueanan ke hentei is ed-ezapen niw, ne sikami is minge Hudiyu, netueanan dey mulà ke hentei is ed-ezapen dey su pinaagi kenami te minge Hudiyu edlibriyan te Megbevayà is menusiya. <sup>23</sup>Duen ebperetengen he timpu ne netuman en guntaan he is minge etew he egkesuat he ed-azap te Amey tew he Megbevayà, ne kinahanglan he ezapa zan pinaagi te gehem te Wagas he Mulin-ulin wey tutuu is ked-ezapa zan kandin. Iyan heini minge etew he edewaten te Megbevayà wey zan mekezap kandin. <sup>24</sup>Mulin-ulin is Megbevayà ne wazè din lawa; umba is langun he ed-azap kandin, kinahanglan he ezapa zan sikandin pinaagi te gehem te Wagas he Mulin-ulin wey tutuu is ked-ezapa zan kandin.”

<sup>25</sup>Ne zutun migkagi haazà is bahi te, “Netueanan ku he ebpekeuma keuzemà is mibpili te Megbevayà wey mekehadì, sikan is migeraran ki Kristu. Ne emun ebpekeuma en, ibpesavut din kenitew is langun.” <sup>26</sup>Ne midtavak si Jesus te, “Siak is ebpekidlalag kenikew, iyan ad sikan is migeraran ki Kristu.”

#### Is Kedlikù te Minge Sumusundan Diyà te ki Jesus

<sup>27</sup>Ne zutun te kemulu pa ebpekidlalag si Jesus dutun te vahi, nekeuma is minge sumusundan din. Uteu zan nengeinuinu su maan is ebpekidlalag si Jesus dutun te vahi; iyan, wazà minsan sevaha kandan he mid-insà diyà te ki Jesus ke hengkey is kinahanglan din dutun te vahi. Ne wazè dan daan insai ke maan is ebpekidlalag sikandin dutun te vahi.

<sup>28</sup>Ne zutun intagak te vahi is sekezu zin ne midlikù diyà te inged. Migkegiyan din is minge etew, ke sikandin te, <sup>29</sup>“Hendiyè kiw en wey niw maahà is etew he neketagnà te langun he nengeveelan ku. Kela ke iyan sikandin sikan is mibpili te Megbevayà he ibpahadì.” <sup>30</sup>Ne migenat dan su edhendiyè dan te ki Jesus.

<sup>31</sup>Ne zutun te kemulu pa haazà is bahi ziyà te inged, migkegiyan si Jesus te minge sumusundan din te, “Datù, kaan ka.” <sup>32</sup>Ne midtavak si Jesus te, “Duen egkeenen ku he wazè niw metueni.” <sup>33</sup>Ne zutun mibpein-inseey zan te, “Duen be vuwa nekevegey kandin te egkeenen?” <sup>34</sup>“Iring te egkekaan ku,” ke si Jesus, “is kedtumana ku te egkesuatan te Megbevayà he midsugù kediey wey is kedhimesaza ku te impeveelan din kediey *su iyan ibmezesen ku.*”

<sup>35</sup>Egkagi kew he heepat pa he vulan guntaan ne human is tiragun! Iyan, emun iyan a egkagi, ne tiragun en guntaan; su ahaa niw man heini is mezakel he minge etew. Iring sikandan te pinemula he hustu en he edregunen *su iyan en heini timpu te kedtuu zan kediey.* <sup>36</sup>Ne sikan is edragun, *he ke và dà egkegiya, is ebpesavut kandan wey zan meketuu kedì, duen suhul kandin te Megbevayà, ne sikan is minge etew he neragun din, ebegayan te untung he wazà pidtemanana. Ne tenged dutun is ebpemula te Lalag te Megbevayà wey is edragun te vegas te Lalag te Megbevayà, pudu zan egkelipey.* <sup>37</sup>Uteu tutuu is erubasa he edhenduen te, ‘Ebpemula is sevaha ne selakew is edragun.’ <sup>38</sup>Imperagun ku sikiyu zutun te tanà he wazè niw pemulai; su selakew is midsangyew te Lalag te Megbevayà ne tenged te vaal zan iyan kew ebpekesavut te minge etew wey zan meketuu,” ke si Jesus.

### Is Kebpeketuu te Minge TigSemarya

<sup>39</sup>Ne mezakel is minge tigSemarya zutun he nemeketuu ki Jesus tenged te migkagi zutun te vahi he ke sikandin te, “Netagnè din is langun he nengeulaula ku.” <sup>40</sup>Ne hein nemekeuma haazà is minge tigSemarya ziyà te ki Jesus, midhengyuan dan sikandin he kenà petuluy medlaus te kedhipanew zin. Umba mid-ubpà ensi Jesus dutun seled te zezuwa he andew.

<sup>41</sup>Ne mezakel pa is nemeketuu ki Jesus tenged te impesavut din kandan, <sup>42</sup>ne migkegiyan dan sikan is bahi te, “Nemeketuu key, kenà tenged dà te migkagi nu, kekenà, tenged daan te nezineg dey is minge lalag din, ne netueanan dey en he tutuu iyan he iyan sikandin sikan is Menluluwas te menusiya.”

### Is Anak te Upisyal he Hapit En Ebpatay

<sup>43</sup>Ne hein netapus dutun is dezuwa he andew, mid-awà ensi Jesus ne midlaus dan diyà te prubinsya he Geliliya. <sup>44</sup>Migkagi si Jesus te, “Is ebpeneuven te Megbevayà, kenà edtehuzen te minge etew ziyà te kandin he keugelingen he inged.” <sup>45</sup>Ne minsan pa zutun, is minge tigGeliliya, hein nekeuma ensi Jesus dutun, nengegalew zan su mezakel zan is nemeketelavuk te Pista te Kedlevayi ziyà te inged he Hiruselim, ne nengeehè dan is langun he nengehimu ni Jesus dutun.

<sup>46</sup>Ne midlikù si Jesus diyà te inged he Kana he ziyà te Geliliya. Iyan haazà kes inged he impevaluy zin he vinu is wahig. Ne zuen dutun etew he zekelà is ketengdanan din diyà te hadi. Ne zuen anak din diyà te inged he Kepirnaum he egkezeruwan. <sup>47</sup>Ne hein nezinég din is tudtul he nekeuma si Jesus diyà te Geliliya he ebpuun te Hudiya, midhendiyà te ki Jesus ne midhengyuan din he medhendiyà te Kepirnaum su wey zin mevewii haazà is anak din su ebpatéy en. <sup>48</sup>Ne migkegiyan ni Jesus haazà is etew te, “Kenè kew ves ebpeketuu kediey emun kenè kew ebpekeahà te minge egkengein-inuwan wey minge singyal.” <sup>49</sup>Ne zutun migkagi haazà is etew te, “Datù, duma ka kediey su wey kenà mebpatey is anak ku.” <sup>50</sup>Ne midtavak si Jesus te, “Uli ke en su neulian en is anak nu!” Ne midtuu haazà is etew kayi te migkagi ni Jesus ne zutun migenat. <sup>51</sup>Ne hein ed-uli en haazà is etew midsinugung sikandin te minge suluguen din, ne ke sikandan te, “Neulian en is anak nu.” <sup>52</sup>In-insè din kandan ke keenu mezeyzey haazà is anak din, ne ke sikandan te, “Gevii te kegkepulid te andew midhimemasan sikandin.” <sup>53</sup>Ne zutun netenuzan te etew he iyan haazà kes timpu he migkagi si Jesus diyà te kandin te neulian en is anak din. Ne tenged dutun neketuu haazà is etew zuma is pemilya zin.

<sup>54</sup>Iyan heini ikezuwa he egkein-inuwan he mibeelan ni Jesus. Mibeelan din heini zutun te kedlikù din diyà te prubinsya he Geliliya he ebpuun sikandin te prubinsya he Hudiya.

### Is Etew he Neuget En is Kegkezeruwi Zin

**5** <sup>1</sup>Neiwas heini, duen pista te minge Hudiyu; ne tenged kayi midhendiyè en maan si Jesus te Hiruselim. <sup>2</sup>Ne ziyà te Hiruselim duen linew uvey te idselang te kutà he egngezanan te Idselang te Menge Ayam he Kerehidu. Ne ziyà te kilid dutun te linew, duen lelima he helungà. Ne haazà is linew, egngezanan te Bitsata te kinégiyan he Hibriyuhanan. <sup>3</sup>Mezakel is egkengezeruwan he zutun dan en ebpemen-ubpàubpà te minge helungà. Menge lakap, minge piang, wey minge minatey is divaluy he lawa, *ne zutun edtegazán dan is kegurigawa zutun te wahig* <sup>4</sup>*su zuen timpu he zuen kun belinsuguen te Megbevayà he ebpenaug dutun te linew ne egurigawen din haazà is wahig. Ne zutun, is egkehuna he etew he ebpekeagbur zutun te wahig, egkeulian sikandin te minsan hengkey he zaru zin.*

<sup>5</sup>Ne zuen dutun etew he neuget en he egkezeruwan su ketluan en wey walu he tuig is kegkezeruwi zin. <sup>6</sup>Naahà sikandin ni Jesus is dutun edhidhizegà ne netuenan ni Jesus he neuget en haazà is daru zin. Ne mid-insaan ni Jesus te, “Mama, egkesuat ke ve he meulii ka?” <sup>7</sup>Ne midtavak haazà is etew te, “Datù, wazà duma ku he ebpekeagbur kedi kenian te wahig emun egurigawen en ne layun a egkehunai te zuma te kenè e pa ebpekeagbur.” <sup>8</sup>Ne migkagi si Jesus te, “Enew ka, ne luluna nu

heeyan is ikam nu; ne hiphipaneu ka.” <sup>9</sup>Ne zutundutun dà neulian haazà is etew; midlulun din haazà is ikam din ne midhiphipaneu.

Nehitavù haazà te andew he Sebadu he iyan Andew te Kedhimeley.

<sup>10</sup>Umba, haazà is etew he neulian, nepeukan sikandin te minge punuan he Hudiyu; ke sikandan te, “Iyan heini Andew te Kedhimeley ne ebpekesupak ka te kesuguan tew ke ed-uwiten nu heeyan is ikam.” <sup>11</sup>Ne midtavak haazà is etew te, “Sikan is mibawì kediey, migkegiyan e zin he luluna ku is ikam ku wey medhiphipaneu a.” <sup>12</sup>Ne in-insè dan te, “Hentei he etew is migkagi kenikew he luluna nu is ikam nu wey medhiphipaneu ka?” <sup>13</sup>Iyan, wazà mekilala si Jesus dutun te etew he neulian su medmezakel is nengetigum he minge etew zutun ne wazè en dutun si Jesus.

<sup>14</sup>Ne netegtegaad dutun naahà sikandin ni Jesus diyà te simbahan he eggezanan te Valey te Megbevayà, ne migkegiyan ni Jesus te, “Meupiya su neulian ke en; iniyugi nu en is minge mezaat he ulaula nu su wey kenè nu meegiya is tuwas pa he mezaat.” <sup>15</sup>Ne zutun mid-awà haazà is neulian ne migkegiyan din is minge punuan he minge Hudiyu he iyan si Jesus mibawì kandin.

### Is Untung Pinaagi te Anak te Megbevayà

<sup>16</sup>Umba puun dutun nepeukan si Jesus te minge punuan he minge Hudiyu su utew zan ingkepes haazà is kebewii zin te egkezeruwan dutun te andew he Sebadu.

<sup>17</sup>Iyan, duen ketezengan ni Jesus, ke sikandin te, “Is Amey ku he Megbevayà, kenà sikandin edhimeley he ebaal, ne siak, ebpenigudu a zaan ebaal.” <sup>18</sup>Ne zutun mid-iseg is suat te minge punuan he minge Hudiyu te kegkehimetayi kandin su ke sikandan te, “Kenè dà taman te kedsupaka zin te Andew te Kedhimeley, kekenà, edsupaken din daan is Megbevayà su egkegiyan din he Amey zin is Megbevayà, he ke vā dà egkegiya, Megbevayè sikandin.”

<sup>19</sup>Ne zutun midtavak si Jesus te, “Uteu venar is egkegiyan ku keniya he siak is Anak te Megbevayà, wazà egkehimu ku te kediey zà duen he gehem; iyan dà edhimuwen ku is egkeehè ku he edhimuwen te Amey ku. Is ebeelan din, iyan daan ebeelan ku. <sup>20</sup>Siak is Anak din, utew a mahal ziyà te gehinawa te Amey ku, ne ibpeehè din kediey is langun he ebeelan din. Ne kenà duen dà taman su keuzemà, lavew pa he mekegegehem is ibpenurù din kediey, ne ebeelan ku wey kew meinuinu. <sup>21</sup>Is Amey ku, ebenhawen din is minge minatey ne ibegey zin kandan is untung. Ne siak is anak din, untung daan is ibegey ku ziyà te minsan hentei he ebpien ku. <sup>22</sup>Is Amey ku, kenà iyan sikandin edsusi keuzemà te nengeveelan te tivuuk he menusiya su siak is anak din, mibegayan e zin te ketenged te kedsusi te nengeveelan te menusiya, <sup>23</sup>su egkesuatan din he edtehuzen a te langun he minge etew iring te kedtehuza zan kandin. Ne is minsan

hentei he kenè e zin edtehuzen, is kenè din kedtahud kediey, iyan daan kenè din kedtahud te Amey ku he Megbevayà he midsugù kedì.

<sup>24</sup>Uteu venar is egkegiyen ku he is minsan hentei he ebpemineg te minge lalag ku ne edtuu te Megbevayà he midsugù kediey zini, iyan ebpekeangkan te untung he wazà pidtemanan. Kenà sikandin keuzemà edsilutan su nekelikey en te kemetayen is gimukud din wey naangken din en is untung he wazà pidtemanan. <sup>25</sup>Uteu venar is egkegiyen ku keniyu he egkeuma is andew ne neume en guntaan he siak is Anak te Megbevayà, egkezineg te minge etew he wazè pa mevegayi te untung is minge lalag ku kandan, ne haazà is ebpemineg, ebegayan ku te untung he wazà pidtemanan. <sup>26</sup>Mekegegehem is Amey ku ne ebpekevegey te untung, ne siak daan is anak din, tenged te mibegayan e zin te gehem, ebpekevegey ad daan te untung he wazà pidtemanan. <sup>27</sup>Ne siak, tenged te migeraran a he Kakey te Menusiyà, mibegayan a te Amey ku te ketenged wey ku keuzemà mesusi is nengeveelan te tivuuk he menusiyà. <sup>28</sup>Kenà kew meinuinu kayi su egkeuma is andew keuzemà he zutun is langun he minge minatey, egkezineg dan is ked-umawa ku kandan <sup>29</sup>ne egkengevanhew zan. Ne is nemekevaal mulà te meupiya, duen dan untung he wazà pidtemanan. Ne is nemekevaal te mezaat, egkengevanhew sikandan wey mesiluti.

<sup>30</sup>Wazà egkehimu ku te sebsevaha ku; su is paagi te kedsusiya ku te nengeveelan te menusiyà, impenurù kediey te Amey ku he Megbevayà. Ne metazeng mulà is kediey he kedsusi kandan su kenè ku ebpengahaan is kediey he egkesuatan, kekenà, is egkesuatan te Amey ku he midsugù kediey.

### Is Minge Tistigus Mehitenged ki Jesus

<sup>31</sup>Emun iyan e zà ebpenistigus te kedì he keugelingen, kenà egkeserigan is kediey he kebpenistigus. <sup>32</sup>Iyan, selakew is ebpenistigus te minge vaal ku. Iyan is Amey ku ebpenistigus kediey, ne netuanan ku he egkeserigan is kebpenistigus din. <sup>33</sup>Duen midsugù niw ziyà te ki Juan Megbebewtismu, ne tutuu is kebpenistigus ni Juan kediey. <sup>34</sup>Kenà a egkinahanglan he zuen etew zà duen he ebpenistigus kediey, iyan, midhimu ku he metenuzi niw is kebpenistigus ni Juan su wey kew meketuu kediey ne egkevegayan kew te untung. <sup>35</sup>Su si Juan, iring sikandin te sulù he merayag is siga zin, ne megaan dà utew is kelipey niw te kedteyawi zin keniyu, *he ke và dà egkegiya, seled te megaan dà utew kew nesuat te penurù din he tutuu.* <sup>36</sup>Iyan, duen kebpenistigus he lavew pa kenà is ki Juan, su is langun he mibpeveelan kediey te Amey ku he Megbevayà he ed-ul-olahan ku, iyan edtistigus he midsugù a te Amey ku he Megbevayà. <sup>37</sup>Iyan sikandin midsugù kediey ne edtistigusan e zin. Wazè niw mezineg is kekgagi zin ne wazè niw zaan maahà is dagwey zin.

<sup>38</sup>Ne netuenan ku he kenè niw edewaten is lalag din su siak is midsugù din, wazà a keniyu tuuwi. <sup>39</sup>Ed-istudiyuwan niw is ingkesurat he lalag din su kunaan niw ke tenged dutun ebpekeangken kew te untung he wazà pidtemanan. Edtistigusan a te insurat he Lalag te Megbevayà, <sup>40</sup>iyana, kenè kew edtuu kediey. Angin ke ebpeketuu kew su ebegayan kew te untung he wazà pidtemanan.

<sup>41</sup>Kenà ku iyan ebpengahaan is kegkezeliga kedì te minge etew <sup>42</sup>su nesayud a keniyu; kenà mahal is Megbevayà diyà te gehinawa niw. <sup>43</sup>Midsugù a zini te Amey ku he Megbevayà, ne egemiten ku is gehem din ne minsan pa kayi kenà a keniyu edewaten. Ke zuen selakew he ebpekeuma ne kandin dà he gehem is egemiten din, ne edewaten niw mulà. <sup>44</sup>Egkemenumeni is hustu he kebpeketuu niw emun ebpengahaan niw te kada sevaha is kegkezeligi keniyu te minge zuma niw, ne is kegkezeligi pezem keniyu te sebsevaha zà he Megbevayà, kenè niw egkesuatan? <sup>45</sup>Kenè niw isipa he iyan a edsumbung keniyu keuzemà diyà te etuvangan te Amey ku he Megbevayà. Su kes lukes niw he si Moises, edsarig kew te insurat he minge lalag din, ne nasi iyan sikandin edsumbung keniyu zutun he andew. <sup>46</sup>Angin ke venar is kedtuu niw kandin su ebpeketuu kew zaan kediey su insurat din dutun is keagi ku. <sup>47</sup>Ne tenged kayi emun kenè kew edtuu te lalag he insurat ni Moises, kenè kew zaan edtuu te kediey he lalag.”

### Is Kebpekeena te Lelima he Libu he Minge Eteu

(Juan 6:1-15; Mateo 14:13-21; Marcos 6:30-44; Lucas 9:10-17)

**6** <sup>1</sup>Ne neipus heini mid-awà si Jesus dutun ne midhendiyà te tanà he ziyà layun te ranew he Geliliya, he migngenganan daan te Tibiryu. <sup>2</sup>Ne zuen utew mezakel he minge etew he ebpemenduma kandin su nengeehè dan is minge egkein-inuwan he mibeelan din te kebewii zin te minge egkengezeruwan. <sup>3</sup>Ne midtekezeg si Jesus wey haazà is minge sumusundan din te wuvungan ne zutun dan mebpinuu. <sup>4</sup>Egkesipegan dutun is andew he edsilibrahan te minge Huidiyu is pista he egngenganan te Kedlevayi. <sup>5</sup>Ne mibpememantew si Jesus ne neehè din is utew mezakel he minge etew he ebpemehendiyà te kandin. Ne migkegiyan din si Felipe te, “Hendei kiw ebpekekuwa te egkeenen he ibpekaan tew kayi te minge etew?” <sup>6</sup>(Umba migkagi zin heini su egezaman din si Felipe su si Jesus, netuenan din en man ke hengkey is ebeelan din dutun.) <sup>7</sup>Ne midtavak si Felipe te, “Minsan ke utew zekelà is egestuwen tew he selapi, minsan dezuwa he gatus he dinaryu, ne ebegayan tew is kada sevaha te minsan sengepindut dà he egkeenen, kenè pa ebpeketukid.” <sup>8</sup>Ne zutun migkagi si Andres. Si Andres, hazi ni Simon Pedro wey sevaha zutun te minge sumusundan ni Jesus, ne ke sikandin te, <sup>9</sup>“Duen kayi vatà he midlulutù te lelima he supas he erina he sibada wey zezuwa he pait, iyan,



ebmenuwen tew zè be kayi te utew medmezakel he menge etew!” <sup>10</sup>Ne migkagi si Jesus te, “Ipemepinuu is menge etew.” Ne zutun impemepinuu sikandan. Meluag haazà is perekpekan dutun ne menge lelima he libu is kezakel te menge maama zà. <sup>11</sup>Ne migkuwa ni Jesus haazà is menge supas ne mibpeselematan din te Megbevayà, ne impepenalad din dutun te impemepinuu he menge etew. Ne iring din ded daan sikan is menge pait, taman te nengehantey haazà is menge etew. Ne minsan pa zutun, wazà maamin haazà is supas wey pait. <sup>12</sup>Ne hein nengehantey en dutun is langun, migkegiyan ni Jesus haazà is menge sumusundan din te, “Himesa niw is nengesamà he egkeenen su wey kenà mezeeti.” <sup>13</sup>Ne zutun nehimes dan is sepulù wey zezuwa he vinevey he nepenù te menge tevì te lelima he supas he sibada.

<sup>14</sup>Ne hein naahà te menge etew is egkein-inuwan he nehimu ni Jesus migkagi zan te, “Tutuu ves iyan he iyan en heini sikan is netagnà he ebpeneuven te Megbevayà he iphendini zin te kelibutan!” <sup>15</sup>Ne si Jesus, geina te netuenan din he ebayaan dan sikandin su edtegelan dan sikandin edhimuwa he hadi dan, mid-awà dutun te sebsevaha zin ne midtekezeg diyà te vuvungan.

**Is Kedhipanew ni Jesus Diyà te Ranew**  
(*Juan 6:16-21; Mateo 14:22-33; Marcos 6:45-52*)

<sup>16</sup>Ne hein mahapun en dutun, midhendiyà is menge sumusundan din te veyvey te ranew, <sup>17</sup>ne mid-untud dan te avang su edrapas dan diyà te inged he Kepirnaum. Mezukilem en dutun haazà is ked-untud dan, ne wazè pa si Jesus mekelikù diyà te kandan. <sup>18</sup>Ne ebpengeramag dutun ne zezekelà is menge vagel zutun te wahig. <sup>19</sup>Ne hein menge lelima en he kilumitru is imbayè dan dutun te lawed te ranew, neehè dan si Jesus is edhendiyà te kandan he edhipanew zutun te wahig. Utew zan nengehandek, <sup>20</sup>nyan, migkagi si Jesus kandan te, “Iyan a; kenè kew mahandek.” <sup>21</sup>Ne zutun nelipey zan ne impeuntud dan sikandin. Ne zutundutun te kebpeuntuza zan ki Jesus, nekezunggù dan dutun te inged he ebayaan dan.

<sup>22</sup>Ne hein nepawà dutun, diyè pa te layun te ranew sikan is mezakel he menge etew. Netuenan dan he sevaha zà is avang dutun ne iyan kes mid-untuzan te menge sumusundan ni Jesus. Netuenan daan te menge etew he wazà sikandin med-untud dutun te kegenat te menge sumusundan din su neewaan sikandin. <sup>23</sup>Ne zutun te uvey te lugar he zutun nemekekaan sikan is menge etew te supas he mibpeselematan te Nengazen he si Jesus, duen nemekezunggù he menge avang he ziyà ebpemuun te inged he Tibiryu. <sup>24</sup>Ne hein netuenan te menge etew he wazè en dutun si Jesus wey is menge sumusundan din, nemen-untud dan dutun te menge avang su ebpen-ahaan dan si Jesus diyà te inged he Kepirnaum.



### Is Keenen he Ebpekevegey te Untung

<sup>25</sup>Ne hein nekezunggù dan neehè dan sikandin. Ne mid-insè dan te, “He Menunudlù,” ke sikandan, “keenu ka mekeuma zini?” <sup>26</sup>Ne midtavak si Jesus te, “Benar is egkegiyen ku keniyu he, umba ebpen-ahaan a keniyu kenà tenged te tutuu is kedsavut niw te minge egkein-inuwan he nengeehè niw, kekenà, tenged te nengehantey is getek niw te supas he nekaan niw gevii. <sup>27</sup>Kenè niw pen-ahaa is egkeenen he megaan dà egkehanew, kekenà, hagù kew wey niw mekuwa is egkeenen he ebpekevegey te untung he wazà pidteman. Siak is Kakey te Menusiyà, iyan heini egkeenen he igkevegey ku keniyu su impeehè en te Amey ku he Megbevayà he ingkesuat din is minge vaal ku.” <sup>28</sup>Ne zutun mid-insaan si Jesus te minge etew, ke sikandan te, “Hengkey is ebeelan dey emun edtumanen dey is ebpeveelan kenami te Megbevayà?” <sup>29</sup>Ne midtavak si Jesus te, “Iyan heini ebpeveelan keniyu te Megbevayà: siak is midsugù te Megbevayà kayi te kelibutan, tuu kew kediey.” <sup>30</sup>Ne zutun migkegiyan dan en maan te, “Hengkey is egkein-inuwan he igkepeehè nu kenami wey key meketuu kenikew? <sup>31</sup>Su zengan is minge kepuun tew, hein diyè dan te tanà he kenà ed-ubpaan te etew, mana is egkeenen he imbegey kandan te Megbevayà, su zuen insurat he Lalag te Megbevayà he egkagi te, ‘Egkeenen he ebpuun te langit is imbegey kandan ni Moises.’” <sup>32</sup>Ne midtavak dutun si Jesus te, “Benar is egkegiyen ku keniyu, kenà iyan si Moises nekevegey te egkeenen he nengeulug he ebpuun te langit, kekenà, iyan is Amey ku he Megbevayà. Ne is tutuu he egkeenen he ebpuun te langit, ibegey keniyu te Amey ku. <sup>33</sup>Sikan is egkeenen he ibegey te Megbevayà, ebpenaug he ebpuun te langit ne iyan ebpekevegey te untung diyà te tivuuk he menusiyà.” <sup>34</sup>Ne migkegiyan dan si Jesus te, “Begayi key en keniyu te egkeenen he egkegiyen nu ne kenà guntaan dà, kekenà, wazè en pidteman.” <sup>35</sup>Ne midtavak si Jesus te, “Iyan a egkeenen he ebpekevegey te untung he wazà pidteman. Sikan is edsundan kediey, kenè en egkevital wey sikan is edtuu kediey, kenè en maan egkemezahan.

<sup>36</sup>Iring te migkagi ku en keniyu he minsan te neehè niw en is minge egkein-inuwan he nehimu ku, kenè kew edtuu kediey. <sup>37</sup>Is langun he minge etew he ibegey kediey te Amey ku he Megbevayà, ebpekesundan dan kediey, ne is edsundan kediey, edewaten ku. <sup>38</sup>Iyan igkegiya ku kayi keniyu su midhendini a he ebpuun te langit wey ku metuman is egkesuatan te Megbevayà he midsugù kediey; kenè ku iyan edtumanen is kediey zà he egkesuatan. <sup>39</sup>Ne is Amey ku he Megbevayà he midsugù kediey, iyan din egkesuatan is: edlig-enan ku is langun he minge etew he imbegey zin kediey su wey wazà minsan sevaha kandan he kenà egkevegayan te untung. Ne ebhawan ku sikandan keuzemà dutun te ketepusan he andew. <sup>40</sup>Is langun he nesayud ke hentei a is anak din, ne

edtuu kediey, egkesuatan te Amey ku he mevegayi te untung he wazà pidtemanan ne ebenhawen ku keuzemà dutun te ketepusan he andew.”

<sup>41</sup>Ne zutun nengepauk ki Jesus haazà is menge punuan he menge Hudiyu tenged te migkagi zin he ke sikandin te, “Iyan a sikan is egkeenen he ebpuun diyà te langit.” <sup>42</sup>Ne migkagi zan te, “Si Jesus dà duen heini. Anak sikandin ni Jose. Maan is egkegiyen din he ebpuun sikandin diyà te langit he wazà mekeeles kenitew ke hentei is amey zin wey iney zin?” <sup>43</sup>Ne midtavak si Jesus te, “Maan is egkepeukan a keniyu?” <sup>44</sup>Wazà minsan hentei he ebpekesundan kediey emun wazà sikandin ulini te Amey ku he iyan midsugù kediey. Ne ke zuen edsundan kediey, ebenhawen ku sikandin keuzemà dutun te ketepusan he andew. <sup>45</sup>Duen netagnà he insurat dengan te ebpeneuven te Megbevayà he edhenduen te, ‘Ebpenuruen te Megbevayà is tivuuk he menusiya.’ Umba,” ke si Jesus, “is langun he ebpemineg te ibpenurù kandin te Amey ku he Megbevayà, edsundan kediey. <sup>46</sup>Kenè ku iyan ibpesavut he zuen etew he nekeahà te Megbevayà su siak is midsugù dini te Amey ku he Megbevayà, iyan e zà nekeahà kandin.

<sup>47</sup>Uteu venar is egkegiyen ku he is etew he edtuu kediey, naangken din en is untung he wazà pidtemanan. <sup>48</sup>Iyan a kes egkeenen he ebpekevegey kayi te untung. <sup>49</sup>Is egkeenen he mana, migkaan te menge kepuun niw zengan, hein diyè dan pa te tanà he kenà ed-ubpaan, iyan, nemematey zan gihapun, <sup>50</sup>iyen, heini is egkeenen he ebpuun te langit, emun egkeenen heini te minsan hentei, duen din untung he wazà pidtemanan. <sup>51</sup>Iyan a egkeenen he ebpuun te langit wey ebpekevegey te untung; ne ke zuen egkaan kediey kenè en ebpatey is gimukud din. Is egkeenen he ibegey ku, iyan is lawa ku. Ibegey ku heini su wey maangken te tivuk he menusiya is untung he wazà pidtemanan,” ke si Jesus.

<sup>52</sup>Ne zutun egkesumpaki is menge punuan he menge Hudiyu. Ke sikandan te, “Ebmenmenuwen kayi te etew is kebegaya zin kenitew te lawa zin su wey tew mekaan?” <sup>53</sup>Ne migkagi si Jesus te, “Uteu venar is egkegiyen ku keniyu, siak is Kakey te Menusiya, emun kenè kew egkaan te lawa ku wey emun kenè kew ed-inum te lengesa ku, wazè niw untung he wazà pidtemanan. <sup>54</sup>Su is egkaan te lawa ku wey ed-inum te lengesa ku, nekeangken en te untung he wazà pidtemanan ne ebenhawen ku sikandin keuzemà dutun te ketepusan he andew; <sup>55</sup>su is lawa ku wey is lengesa ku, egkehimu he keuyagan wey inumen te wazà pidtemanan. <sup>56</sup>Is egkaan te lawa ku wey ed-inum te lengesa ku, kenà ed-awà dini te kediey ne siak, kenà a zaan ed-awà diyà te kandin. <sup>57</sup>Is Amey ku he iyan midsugù kediey, duen din untung, ne tenged dutun duen ku zaan untung. Ne iring din ded daan is egkaan kediey su ebegayan ku sikandin te untung he wazà pidtemanan. <sup>58</sup>Heini is egkeenen he egkegiyen ku, ne ziyà ebpuun te langit. Kenà iring te egkeenen he mana he migkaan te

menge kepuun tew su nemematey zan gihapun; iyan, is minsan hentei he egkaan kayi te egkeenen he egkegiyen ku, kenè en ebpatay is gimukud din te minsan keenu.” <sup>59</sup>Iyan heini impenurù ni Jesus dutun te simbahan te menge Hudiyu ziyà te inged he Kepirnaum.

### Is Kedsuwey te Menge Etew ki Jesus

<sup>60</sup>Ne hein nezineg te menge sumusundan din haazà is kebpenurù din, mezakel kandan is migkagi te, “Meregen egkezawat heini is penurù din, ne hentei zà buwa is ebpekepeming kayi?” <sup>61</sup>Ne netuenan ni Jesus he zuen menge sumusundan din he neepes te impenurù din, ne ke sikandin diyà te kandan te, “Igkeepes niw ve heini is migkagi ku? <sup>62</sup>Hengkey vuwa is egkekagi niw emun siak is Kakey te Menusiyà, egkeahà a keniyu is ebetunen pehendiyà te zivavew, diyà te langit he mibpuunan ku. <sup>63</sup>Iyan dà ebpekevegey te untung he wazà pidtemanan is Wagas he Mulin-ulin. Wazà egkehimu te lawa zà duen. Is menge lalag he migkagi ku keniyu, diyà ebpuun te Wagas he Mulin-ulin, ne ebpekevegey te untung he wazà pidtemanan. <sup>64</sup>Duen дума keniyu he wazà medtuu kediey,” ke si Jesus. (Umba migkagi zin haazà su netuenan din he zaan ke hentei is wazà medtuu, ne netuenan din daan ke hentei is ed-akal kandin.) <sup>65</sup>Ne impelaus din haazà is egkegiyen din, ke sikandin te, “Tenged kayi egkegiyen ku keniyu he wazà minsan hentei he ebpekesundan kediey emun wazà sikandin ulini te Amey ku he Megbevayà.”

<sup>66</sup>Ne puun dutun mezakel is menge sumusundan he midsuwey kandin ne wazè en sikandan mebpekiduma kandin. <sup>67</sup>Ne zutun migkegiyan ni Jesus sikan is sepulù wey zezuwa he menge epustul, ke sikandin te, “Sikiyu zaan, edsuwey kew ve kedi?” <sup>68</sup>Ne midtavak si Simon, sikan is migeraran ki Pedro, ke sikandin te, “Wazà дума he egkesundanan dey su iyan ke zà ebpenurù te paagi te kebpekeangken te untung he wazà pidtemanan. <sup>69</sup>Edtuu key kenikew su netuenan dey he iyan ka sikan is mibpili te Megbevayà he ibpahadi.” <sup>70</sup>Ne migkagi kandan si Jesus te, “Siak, mibpili ku sikiyu is sepulù wey zezuwa, iyan, sakup ni Setanas is sevaha keniyu.” <sup>71</sup>Iyan egkegiyen din si Hudas he anak ni Simon he tigKeriyuti su sevaha sikandin dutun te sepulù wey zezuwa, ne iyan si Hudas ed-akal kandin.

### Is Kenà Kedhendiyà ni Jesus te Edseulugan

**7** <sup>1</sup>Ne hein nepasad ni Jesus haazà is kebpenurù midhendiyà sikandin te prubinsya he Geliliya ne zutun sikandin medrigurigu. Kenà egkesuat he edrigurigu ziyà te prubinsya he Hudiyu su is menge punuan he menge Hudiyu zutun, ne edhimatey pezem kandin. <sup>2</sup>Ne megaan dutun edsilibraha te menge Hudiyu is pista he egngезanan te Pista te Menge Lawig. <sup>3</sup>Ne migkegiyan si Jesus te menge hazi zin, ke sikandan

te, “Deyzey ke ed-awè ka kayi ne telavuk ka te pista ziyà te prubinsya he Hudiya su wey maahà te menge sumusundan nu ziyà is menge egkein-inuwan he ebeelan nu. <sup>4</sup>Su ke zuen etew he egkesuat he egkevantug, kenà egkehimu he id-eles din is menge vaal zin. Su emun egkehimu nu is menge egkein-inuwan, deyzey ke ibpeehè nu ziyà te langun.” <sup>5</sup>(Iyan heini menge lalag he idsumpalit dan kandin su minsan pa te menge hazi zin sikandan, wazè dan sikandin tuuwi.) <sup>6</sup>Ne migkagi si Jesus diyà te kandan te, “Wazè pa metuman is hustu he timpu wey ku ikepaahà is menge vaal ku, iyan, sikiyu, layun niw egkeveeli is egkeisip niw he ebeelan niw. <sup>7</sup>Kenè kew egkepeukan te menge etew he kuntada te Megbevayà, iyan, siak, egkepeukan e zan mulà su pinaagi te ibpenurù ku egketueanan he mezaat is menge ulaula zan. <sup>8</sup>Huna kew en diyà te pista. Kenè e pa edhendiyà su wazè pa metuman is kedì he timpu te kedhendiyà.” <sup>9</sup>Ne zutun mibpetagak si Jesus diyà te Geliliya.

<sup>10</sup>Ne hein migenat en haazà is menge hazi zin he ebpemenelavuk dutun te pista, midtelukun si Jesus, asal wazà mebpekiduma te mezakel he menge etew su kenè din egkesuatan he metueni. <sup>11</sup>Ne zutun te pista, ebpen-ahaan sikandin te menge punuan he menge Hudiyu. Ke sikandan te, “Hendei vuwa sikandin?” <sup>12</sup>Ne egkesumpakì is mezakel he menge etew he nengetigum diyà te inged he Hiruselim. Egkagi is duma kandan te, “Meupiya sikandin he etew.” Ne edtavak daan is duma te, “Kenà, su tarù is ibpenurù din te menge etew.” <sup>13</sup>Ne geina te egkengehandek is menge etew te menge egalen dan te menge Hudiyu, kenè dan ibpezineg te zuma pa he etew haazà is menge lalag dan.

### Is Kebpenurù ni Jesus Diyà te Valey te Megbevayà

<sup>14</sup>Ne zutun te egkeliwliwazè en is kebibuwan, midhendiyà si Jesus te simbahan he Valey te Megbevayà, ne mibpenurù din is menge etew zutun. <sup>15</sup>Uteu ingkeinuinu sikandin te menge punuan he menge Hudiyu, ne migkagi zan te, “Hendei vuwa ebpuun is ketau kayi he etew su kenè man metikang is netunghaan din?” <sup>16</sup>Ne midtavak kandan si Jesus te, “Kenà kediey zà he ketau is ibpenurù ku, kekenà, diyà ebpuun te Megbevayà he iyan midsugù kediey. <sup>17</sup>Is etew he egkesuat he edtuman te ebpevelan te Megbevayà, iyan egkesayud ke ziyè be ebpuun te Megbevayà is ibpenurù ku wey ke zini zè be ebpuun te isip ku. <sup>18</sup>Su ke zuen etew he ibpenurù din is kandin dà he isip, ebpevantug dà te menge etew, iyan, is etew he ibpenurù din is kegkevantug te midsugù kandin, egkeserigan is lalag din su kenà tarù is ibpenurù din. <sup>19</sup>Is apù tew zengan he si Moises, iyan mibegey keniyu te menge kesuguan. Ne netueanan ku he wazà minsan sevaha keniyu he edtuman te kesuguan su maan is egkeisip niw he edhimetayan a keniyu?” <sup>20</sup>Ne midtavak haazà is menge etew te, “Kela ka midsuukan ka te mezaat he mulin-ulin su

wazè man egkesuat he edhimatey kenikew?” <sup>21</sup>Ne migkagi kandan si Jesus te, “Duen etew he neulian ku te zaru zin, ne pudu kew nengeinuinu su neulian ku te Andew te Kedhimeley. <sup>22</sup>Insugù keniyu ni Moises dengan he medsirkunsidar kew te minge anak niw, asal kenà diyè dà ebpuun te ki Moises heini is betasan he kedsirkunsidar su zaan heini he ulaula te minge kepuun tew zengan. Ne egkehimu he edsirkunsidaren niw is etew minsan ke Andew te Kedhimeley. <sup>23</sup>Ne emun egkehimu he edsirkunsidaren is lawa te etew te timpu te Andew te Kedhimeley su wey kenà mesupak is insugù kenitew ni Moises, maan is egkepeukan a keniyu tenged te neulian ku is tivuuk he lawa te etew zutun te timpu te Andew te Kedhimeley? <sup>24</sup>Kenè niw isipa he mezaat is ulaula te etew emun wazè niw pa mesusi, kekenà, susiya niw is ulaula zin su wey niw metueni is hustu.”

### Is Kegkesemberewai Mehitenged ki Jesus

<sup>25</sup>Ne is дума te minge etew zutun te inged he Hiruselim, hein nezineg dan haazà is migkagi ni Jesus, migkagi sikandan te, “Kenè be iyan heini sikan is etew he ebpen-ahaan te minge punuan wey zan mehimetayi? <sup>26</sup>Ahaa niw man! Ebpenurù ded sikandin te mezakel he minge etew! Kela ke tutuu iyan he netueanan te minge punuan tew he iyan sikandin sikan is netagnà he mibpili te Megbevayà he ibpahadi su maan is kenè dan edewayen sikandin! <sup>27</sup>Iyan, emun iyan en sikandin sikan is hadi ne maan is netueanan tew is ebpuunan din, su emun ebpekeuma haazà is ibpahadi te Megbevayà, kenà egketueanan te minsan hentei ke hendei ebpuun, iyan, heini he etew, netueanan tew ke hendei ebpuun.”

<sup>28</sup>Ne nezineg ni Jesus haazà, ne zutun te kebpenurù din diyà te simbahan he Valey te Megbevayà mibpekezaging is egkagi te, “Kunaan niw ke netueanan niw ke hentei a wey ke hendei a ebpuun, iyan, wazà, su wazà a medhendini te kediey zà he egkesuatan su impehendini a te Megbevayà. Iyan sikandin sikan is tutuu he Megbevayà, iyan, wazè niw metueni ke hentei sikandin. <sup>29</sup>Netueanan ku mulà ke hentei sikandin, su ziyà a ebpuun te kandin, ne iyan midsugù kedì.” <sup>30</sup>Ne edekepen dan pezem si Jesus dutun, iyan, wazà nekeaku he egawed kandin su wazè pa itugut te Megbevayà. <sup>31</sup>Duen mezakel he minge etew he nemeketuu he iyan si Jesus kes netagnà he hadi he mibpili te Megbevayà. Ke sikandan te, “Iyan si Jesus sikan is hadi su wazà дума he ebpekevaal te lavew pa he minge egkein-inuwan duen te mibeelan din.”

<sup>32</sup>Ne hein nezineg te minge Perisiyu heini is egkegiyen te minge etew, sikandan wey is minge punuan he memumuhat, midsugù dan is minge guwardya te zekelà he simbahan wey zan mezakep si Jesus. <sup>33</sup>Ne migkagi si Jesus te, “Kenè en utew egkeuget ne ed-ewaan ku sikiyu su ed-uli a ziyà te Megbevayà he midsugù kedì. <sup>34</sup>Ebpen-ahaan a keniyu, iyan,

kenà a keniyu egketuredu su kenè kew ebpekehendiyà te egkeubpaan ku.”

<sup>35</sup>Ne zutun mibpein-inseey is minge Hudiyu, ke sikandan te, “Hendei vuwa ebpevayà sikandin he kenè tew egketuredu? Kela ke edhendiyà te minge inged te kenà minge Hudiyu he mid-ulian te minge zuma tew he Hudiyu, su ebpenurù sikandin te minge etew he kenà minge Hudiyu!

<sup>36</sup>Su maan is migkagi zin he, ‘Ebpen-ahaan a keniyu, iyan, kenà a keniyu egketuredu.’ Ne migkagi zaan sikandin te, ‘Kenè kew ebpekehendiyà te egkeubpaan ku.’ Hengkey vuwa pezem is ibpesavut din?” ke sikandan.

<sup>37</sup>Uteu mahal ziyà te minge Hudiyu is ketepusan he andew te kedsilibra zan te pista. Ne hein netuman en haazà, midhitindeg si Jesus ne midhabet megkagi te, “Is etew he egkemezahan, medhendini te kediey ne ibpeinum ku sikandin. <sup>38</sup>Su,” ke si Jesus, “sumalà is insurat he Lalag te Megbevayà, ‘Ke zuen edtuu kediey, ne edtudà puun te gehinawa zin is wahig he ebpekevegey te untung he wazà pidtemanan.’” <sup>39</sup>(Is wahig he ebpekevegey te untung he migkagi ni Jesus iyan is Wagas he Mulin-ulin. Egkezawat heini te minsan hentei he edtuu ki Jesus, asal zutun he timpu wazè pa ivegey is Wagas he Mulin-ulin su wazè pa si Jesus med-ulì diyà te langit.)

<sup>40</sup>Nezineg haazà is minge lalag ni Jesus te utew mezakel he minge etew zutun, ne migkagi is duma te, “Tutuu iyan he iyan heini he etew sikan is ebpeebuten tew he netagnà he ebpeneuven te Megbevayà!” <sup>41</sup>Ne migkagi is duma pa kandan dutun te, “Iyan en iyan heini sikandin sikan is hadi he mibpili te Megbevayà.” Iyan, migkagi is duma pa te, “Kenà, su kenà egkehimu he ziyà ebpuun is hadi te prubinsya he Geliliya! <sup>42</sup>Su,” ke sikandin, “impesavut te insurat he Lalag te Megbevayà he is hadi he mibpili te Megbevayà, ne keuwazan te hadi dengan he si David, ne ziyè kun id-anak te inged he Bitlihim he inged daan dengan ni Hadi David.” <sup>43</sup>Ne zutun kenà egkengeuyun is ked-isipa te minge etew mehitenged ki Jesus. <sup>44</sup>Ne is duma he etew zutun, egkesuatan dan he mezakep dan si Jesus, iyan, wazà nekeaku he egawed kandin.

### Kenà Edtuu is Menge Punuan

<sup>45</sup>Ne is minge Perisiyu wey minge punuan he minge memumuhat, hein midlikù is minge guwardya he midsugù dan, mid-insaan dan ke maan is wazè dan mezakep si Jesus. <sup>46</sup>Ne midtavak is minge guwardya te, “Iyan wazè dey ikezekepa kandin su utew meupiya is kedwali zin; wazè pa etew he nekewali iring te ked-wali zin!” <sup>47</sup>Ne migkagi kandan is minge Perisiyu te, “Neketuu kew en bes daan te minge tarù din? <sup>48</sup>Sikami is minge egalen niw, duen be minsan sevaha kenami he neketuu kandin? Wazà! Duen be Perisiyu he neketuu kandin? Wazà daan! <sup>49</sup>Ne heini is minge mezakel he etew he edsundan kandin, wazè dan mesavut is kesuguan tew. Id-agbur sikandan diyà te Impirnu!” ke

sikandan. <sup>50</sup>Ne zutun migkagi is sevaha kandan he si Nikudimu. Iyan sikandin kes etew he mibpenumbaley ziyà te ki Jesus hein mezukilem. <sup>51</sup>Ke sikandin te, “Wazà itugut kenitew te kesuguan tew he edhukuman ta te silut is etew emun wazè te pa mesusi is menge ulaula zin, ne wazè pa sikandin mekepengetezengan.” <sup>52</sup>Ne midtavak is menge zuma zin te, “Tulebung ke ves daan he tigGeliliya? Purungi nu susiya is insurat he menge tagnà, ne egketuenan nu he wazà minsan sevaha he ebpeneuven te Megbevayà he ziyà ebpuun te prubinsya he Geliliya.”

### Is Bahi he Midselselaan Din is Esawa Zin

<sup>53</sup>Ne zutun mibpemen-uli is kada sevaha kandan,  
**8** <sup>1</sup>ne si Jesus, midtekezeg sikandin diyà te vuvungan he egngезanan te Ulivuan. <sup>2</sup>Ne hein nepawà dutun, midhendiyè en maan si Jesus te simbahan he Valey te Megbevayà, ne hein midtigum diyà te kandin is langun he menge etew, mibpinuu zutun ne mibpenurù din sikandan. <sup>3</sup>Ne is menge Perisiyu wey menge menunudlù te kesuguan, mid-uwit dan diyà te kandin is bahi he nesekazan dan dutun te kedselselai zin te esawa zin. Ne impeetuvang dan ki Jesus dutun te teliwazà te menge etew haazà is bahi. <sup>4</sup>Ne migkegiyan dan si Jesus te, “Menunudlù, heini is bahi, nesekazan dey sikandin he edselselaan din is esawa zin. <sup>5</sup>Ne sumalà is kesuguan tew he insurat dengan ni Moises, kinahanglan he edhimetayan pinaagi te kedtulenga kandin te watu. Ne hengkey is kenikew he kukuman kayi?” <sup>6</sup>Iyan ingkegiya zan dutun su ebpen-ahaan dan si Jesus te sayep su wey zan ikesumbung sikandin. Iyan, midtikintikin si Jesus dutun, ne insurat din is tezù din diyà te tanà. <sup>7</sup>Ne geina te kenè dan ed-engked he ed-insà, midhitindeg sikandin ne migkagi te, “Is sevaha keniyu he wazà mekevaal te mezaat te minsan keenu, iyan medhuna medtuleng kandin te watu.” <sup>8</sup>Ne hein nekagi ni Jesus haazà, midtikintikin en maan, ne midsurat en maan diyà te tanà. <sup>9</sup>Ne hein nezineg te menge Perisiyu haazà is migkagi zin, nemen-awè dan dutun he tigeseselimbaha. Midhuna is utew megurang ne henduen dà duen. Ne hein naamin dan en, netagak haazà is bahi ziyà te etuvangan ni Jesus. <sup>10</sup>Ne midlingahà ni Jesus haazà is bahi ne ke sikandin te, “Bayi, hendei en sikandan is midsumbung kenikew? Wazè bes ebpeketuleng kenikew te watu?” <sup>11</sup>Ne midtavak sikan is bahi te, “Wazè en, su migenat dan en.” Ne migkagi si Jesus te, “Siak, kenà a zaan edhukum kenikew te kemetayen. Uli ke en ne kenè kad maan mebaal te mezaat.”

### Is Kelig-enan te Kebpenistigus ni Jesus

<sup>12</sup>Ne mid-uman megkagi si Jesus diyà te menge etew, ke sikandin te, “Iyan a sikan is kerayag he ebpeketayew te isip te tivuuk he menusiya. Ne is etew he edsundan kediey, kenà en sikandin egkesakup te gehem



te kesusireman, kekenà, egketeyawan is kedsavut din te kerayag he ebpekevegay te untung he wazà pidtemanana.”<sup>13</sup> Ne hein nezing heini te minge Perisiyu, migkagi zan te, “Kenà egkeserigan is kebpenistigus nu te keugelingen nu. Umba kenè key ebpeketuu te lalag nu su iyan ka ebpenistigus te keugelingen nu.”<sup>14</sup> Ne midtavak si Jesus te, “Minsan ke iyan a ebpenistigus te keugelingen ku, egkeserigan is kebpenistigus ku su netuenan ku ke hendei a ebpuun wey ke hendei a ebpevayà. Iyan, sikiyu, kenè niw egketuenan ke hendei a ebpuun wey ke hendei a ebpevayà.<sup>15</sup> Emun edsusi kew te ulaula te etew, kenà egkeserigan is kedhukum niw, su pinaagi te kelibutanen dà he isip is kedhukum niw. Siak, kenà a edhukum te minsan hentei.<sup>16</sup> Ne minsan ke zuen ibpezayag ku he kedhukum, egkeserigan mulà is kedi su kenà kediey zà he kedhukum, kekenà, hukum he ziyà ebpuun te Megbevayà he iyan midsugù kediey.<sup>17</sup> Duen insurat diyà te kesuguan niw he edhenduen te, ‘Egkeserigan is kebpenistigus te zezuwa emun egkeuyun.’<sup>18</sup> Ebpenistigusan ku is keugelingen ku, ne is Amey ku he midsugù kedì, ebpenistigusan e zin daan.”<sup>19</sup> Ne migkagi kandin is minge Perisiyu te, “Hendei is Amey nu?” Ne midtavak si Jesus te, “Wazè niw metueni ke hentei is Amey ku, ne siak daan, kenè niw egketuenan ke hentei a. Angin ke netuenan niw ke hentei a su egketuenan niw zaan ke hentei is Amey ku.”

<sup>20</sup> Heini migkagi ni Jesus dutun te kebpenurù din diyà te simbahan he Valey te Megbevayà, diyà te rugu he egngезanan te Selevukà te Lugbak. Wazà midakep kandin dutun su wazè pa itugut te Megbevayà.

<sup>21</sup> Ne mid-uman megkagi si Jesus diyà te minge egalen te minge Hudiyu, ke sikandin te, “Ed-ewaan ku sikiyu ne ebpen-ahaan a keniyu, iyan, ebpematey kew zà duen he kenà egkepeseylu is minge salè niw. Ne ke hendei a ebpekepevayà kenè kew ebpeketelukun.”<sup>22</sup> Ne zutun mibpein-inseey zan te, “Kela ke edhiket su maan is egkagi sikandin te ke hendei sikandin ebpevayà, kenè kiw ebpeketelukun?”<sup>23</sup> Ne migkagi en maan si Jesus te, “Meginged kew zini te kelibutan; siak, meginged a ziyà te langit. Dini kew ebpuun te tanà, iyan, siak, diyà a ebpuun te zivavew.<sup>24</sup> Umba migkagi ku keniyu he ebpematey kew he kenà egkepeseylu is minge salè niw su tutuu iyan haazà emun kenè kew edtuu he iyan a sikan is mibpilì te Megbevayà he ibpahadì.”<sup>25</sup> Ne migkagi zan te, “Hentei ka?” Ne midtavak si Jesus te, “Iyan a sikan is layun ku en egkegiya keniyu puun pa te puunà te kebpenurù ku kayi.<sup>26</sup> Mezakel pa pezem,” ke si Jesus, “is minge lalag ku keniyu mehitenged te minge ulaula niw wey niw mesavut he mezaat is minge vaal niw, iyan, iyan dà ibpesavut ku zè pa te menusiya is nezing ku ziyà te midsugù kedì, ne egkeserigan is minge lalag din.”

<sup>27</sup> Wazà dutun mesavut te minge Hudiyu ke hentei is midsugù kandin he egkegiyen din; wazè dan mesavut he iyan kes Amey zin he



Megbevayà. <sup>28</sup>Ne tenged dutun migkagi en maan si Jesus te, “Siak is Kakey te Menusiyà, dutun te kedrensanga niw kedì keuzemà diyà te kayu he ibpehitindeg, egketuenan niw human he iyan a sikan is mibpili te Megbevayà he ibpahadì. Egketuenan niw zutun he is langun he mibeelan ku, impeveelan kedì te Amey ku he Megbevayà wey is ibpekagi zin kedì, iyan nekagi ku. <sup>29</sup>Ne is Amey ku he midsugù kedì, duma ku zaan; kenè e zin ed-ewaan su kenà a ed-engked he edtuman te egkesuatan din.” <sup>30</sup>Ne zutun te kegkegiya zin kayi, mezakel kandan is nemeketuu kandin.

### Is Edsunud ki Setanas

<sup>31</sup>Ne migkegiyan ni Jesus is menge Hudiyu he nemeketuu kandin, ke sikandin te, “Emun kenè niw ed-engkezan is kedtumana niw te menge penurù ku keniyu, ne human tutuu he menge sumusundan ku sikiyu. <sup>32</sup>Egketuenan niw is tutuu he tuluuwen, ne pinaagi kayi egkengevelukasan kew.” <sup>33</sup>Ne midtavak dutun is menge punuan te, “Iyan kepuun dey si Abraham, ne wazè key meuripen te minsan hentei; maan is migkagi nu he egkevelukasan key?” <sup>34</sup>Ne midtavak si Jesus te, “Utew venar is egkegiyen ku keniyu he is minsan hentei he ebaal te mezaat, uripen iyan sikandin te mezaat he ulaula. <sup>35</sup>Ne is uripen, egkehimu he ibpaawà sikandin dutun te valey he ed-ubpaan din, iyan, is anak te tegivaley, kenà mulà ibpaawà. <sup>36</sup>Umba, ke ebelukasan kew te Anak te Megbevayà, tutuu iyan he kenè kew en maan egkeveyveyaan te zaan he tegiuripen keniyu. <sup>37</sup>Netuenan ku he menge kevuwazan kew ni Abraham; ne minsan pa zutun edhimetayan a pezem keniyu su kenà ed-ereg diyà te gehinawa niw is ibpenurù ku keniyu. <sup>38</sup>Is impaahà kedì te Amey ku, iyan egkegiyen ku, ne sikiyu, ebeelan niw mulà is nezineg niw ziyà te keniyu he amey.”

<sup>39</sup>Ne midtavak dan te, “Iyan kepuun dey si Abraham.” Ne migkagi si Jesus te, “Angin ke tutuu kew he kevuwazan ni Abraham su ebeelan niw is mibeelan dengan ni Abraham. <sup>40</sup>Siak, impenurù ku keniyu is tutuu he tuluuwen he impesavut kediey te Megbevayà, ne nasi a edhimetayi keniyu, iyan, wazà mid-ulaula ni Abraham he iring dutun! <sup>41</sup>Iyan ebeelan niw is mibeelan dengan te amey niw.” Ne mibensag dan te, “Wazè key ikegingey zà! Sikami, netuenan dey he sebsevaha zà is Amey zey he iyan is Megbevayà!” <sup>42</sup>Ne migkagi kandan si Jesus te, “Angin pezem ke amey niw is Megbevayà su mahal a geina ziyan te gehinawa niw su te kedhendini ku, diyà a ebpuun te kandin. Kenà kediey zà he suat is kedhendini ku, kekenà, midsugù e zin. <sup>43</sup>Umba kenè kew ebpekesavut te egkegiyen ku su kenè niw egkesuatan te edtuman is ibpenurù ku. <sup>44</sup>Iyan amey niw si Setanas, ne is egkesuatan te amey niw, iyan daan egkesuatan niw he meveeli niw. Puun pa te puunà ne memumunù en si Setanas. Ne wazè din kelavet te tutuu he tuluuwen su wazà diyà te kandin is minsan hengkey he tutuu. Emun

egkagi sikandin, ne tarù is lalag din su tarù dà is egkeisip din. Teruen man sikandin wey ziyà te kandin ebpuun is minsan hengkey he tarù. <sup>45</sup>Tutuu mulà is kediey he lalag keniyu, ne tenced kayi kenè niw edtuuwan is egkegiyen ku. <sup>46</sup>Ne hentei keniyu is ebpeketistigus te mezaat he mibeelan ku? Wazà! Emun tutuu is egkegiyen ku, maan is kenè kew ebpeketuu? <sup>47</sup>Emun anak te Megbevayà is etew, ebpemingen din is mence lalag te Megbevayà. Umba kenè niw ebpeminegen su kenè kew mence anak din.”

### Is Lavew Pa ki Abraham

<sup>48</sup>Ne zutun midtavak ki Jesus is mence punuan he mence Hudiyu, ke sikandan te, “Tutuu ves iyan he tigSemarya ka he memeremerik is betasan! Kela ke midsuukan ka te mezaat he mulin-ulin!” <sup>49</sup>Ne midtavak daan si Jesus te, “Wazà a suuki. Emun ebentugen ku is Amey ku he Megbevayà, maan is edsulaan a keniyu? <sup>50</sup>Kenà a ebpevantug te minsan hentei, iyan, egkesuatan te Megbevayà he ebentugen a te menusiya. Ibpeehè din he venar is mence ketezengan ku. <sup>51</sup>Uteu venar is egkegiyen ku keniyu he is minsan hentei he edtuman te ibpenurù ku kandin, kenè en ebpekeagi te kemetayen!” <sup>52</sup>Ne migkagi kandin is mence Hudiyu te, “Netuenan dey he tutuu iyan he edlelungen ka te mezaat he mulin-ulin! Minsan si Abraham wey is langun he mence ebpeneuven dengan te Megbevayà, minatey zan en pudu, ne maan is egkagi ka he is minsan hentei he edtuman te ibpenurù nu kandin, kenè en ebpekeagi te kemetayen! <sup>53</sup>Lavew ke ve te kepuun dey zengan he si Abraham? Sikandin wey is mence ebpeneuven dengan, nemematey zan gihapun. Ne sikew, kunaan nu vuwa ke ebpekelavew ka kandan.” <sup>54</sup>Ne midtavak si Jesus te, “Emun ebpevantug a wazà pulus te kegkevantug kedì. Iyan ebantug kedì is Amey ku he Megbevayà. Egkegiyen niw he iyan niw sikandin ed-ezapen, <sup>55</sup>iyang, wazè niw metueni ke hentei sikandin. Siak mulà, netuenan ku ke hentei sikandin. Ke migkagi ku he wazè ku sikandin mekilala, teruen a iring keniyu. Iyan, netuenan ku ke hentei sikandin ne edtumanen ku is mence lalag din kediey. <sup>56</sup>Sikan is kepuun niw he si Abraham, utew sikandin nelipey zengan su netuenan din he ibpehendini a te kelibutan umba nelipey sikandin su ebpeebuten e zin.” <sup>57</sup>Ne zutun migkagi ki Jesus haazà is mence Hudiyu te, “Wazè pa megkelimahan he tuig is penuigen nu, ne hengkey is kegkeseuta nu ki Abraham?” <sup>58</sup>Ne midtavak si Jesus te, “Uteu venar is egkegiyen ku keniyu he te wazè pa ianak si Abraham daan e en.” <sup>59</sup>Ne zutun migkuwa zan te mence vatu su idtuleng kandin *su edhimetayen dan pezem*, iyan, mid-eles si Jesus ne mid-awà dutun te simbahan he Valey te Megbevayà.

### Is Etew he Lakap En Puun te Ked-enaka Kandin

**9** <sup>1</sup>Ne zutun te kedhiphipanew ni Jesus, neehè din is etew he puun pa te ked-enaka kandin ne lakap en. <sup>2</sup>Ne mid-insaan si Jesus te mence

sumusundan din, ke sikandan te, “He Menunudlù, hentei vuwa is mid-ulaula te mezaat, iyan be heini is lakap wey ke iyan be is iney zin wey ke amey zin be su maan is te ked-enaka kandin daan en he lakap?” <sup>3</sup>Ne midtavak si Jesus te, “Kenà tenged te salè din is kegelakap din wey kenà daan tenged te salà te amey zin wey iney zin, kekenà, iyan ingkelakap din su wey ikepaahà pinaagi kandin is gehem te Megbevayà. <sup>4</sup>Te kemulu pa maandew, *he ke và dà egkegiya, te kemulu ki pa uuyag, kinahanglan he edtumanen ta is ebpeveelan kenita te Megbevayà he midsugù kediey su emun mezukilem wazà ebpekevaal.* <sup>5</sup>Kayi te zini e pa te kelibutan, iyan a kerayag he ebpeketayew te tivuuk he menusiya.” <sup>6</sup>Ne te nekagi ni Jesus haazà, mid-ilevan din is tanà ne migkuwa zin sikan is basak he neveelan dutun te ileb din ne indazas din diyà te mata zutun te lakap. <sup>7</sup>Ke sikandin te, “Hendiyè ka te linew he eggezanan te Siluwi ne pendapug ka zutun.” (Is kehulugan te lalag he Siluwi, iyan is: midsugù.) Ne midhendutun haazà is lakap ne mibpendapug. Ne hein midlikù ebpekeehè en.

<sup>8</sup>Is minge siringan din wey is minge etew he layun ebpekeahà kandin te lilimusan he lakap, migkagi zan te, “Henduen be te iyan sikandin kes iyan dà baal zin is ebpimpinuu he ebpelimus.” <sup>9</sup>Ne migkagi is duma pa te, “Iyan iyan sikandin.” Ne migkagi zaan is duma te, “Kenà iyan, iyan, henduen be te iyan sikandin.” Ne midtavak haazà is neulian he lakap te, “Iyan a iyan sikan is lakap.” <sup>10</sup>Ne migkagi is minge etew te, “Emun iyan ka, nemenumenu is kegkeulii te mata nu?” <sup>11</sup>Ne midtavak haazà is neulian te, “Sikan is etew he eggezanan ki Jesus, mid-ilevan din is tanà ne indazas din is neveelan he vasak dini te mata ku, ne migkegiyan e zin he medhendiyà a te linew he Siluwi ne mebpendapug a. Ne midhendiyà a te egkegiyan din he linew ne mibpendapug a, ne puun dà dutun ebpekeahà ad.” <sup>12</sup>Ne mid-insà is minge etew te, “Hendei sikandin?” Ne midtavak haazà is etew te, “Wazè ku metueni.”

### Is Ked-imbistiga te Menge Perisiyu

<sup>13</sup>Ne zutun miduma zan diyà te minge Perisiyu haazà is neulian he lakap. <sup>14</sup>Andew te Kedhimeley haazà is kebeeli ni Jesus dutun te vasak he imbawì din dutun te mata te lakap. <sup>15</sup>Ne is minge Perisiyu, in-insè dan iuman dutun te etew is paagi te kegkeulii zutun te ked-ehè din. Ne ke sikandin te, “Indazas ni Jesus is basak dini te mata ku, ne mibpendapug a ne zutun ebpekeahà ad.” <sup>16</sup>Ne zutun migkagi is duma zutun te minge Perisiyu, ke sikandan te, “Heini si Jesus, kenà iyan sikandin sugù te Megbevayà su edsupaken din layun is kesuguan mehitenged te Andew te Kedhimeley.” Iyan, migkagi zaan is duma pa he minge Perisiyu te, “Emun mesinupaken he etew, kenè din egkehimu is minge egkein-inuwan he iring kayi!” Ne zutun kenè dan egkengeuyun.

<sup>17</sup>Ne tenged dutun mid-insaan dan en maan haazà is neulian he lakap, ke sikandan te, “Sikew, hengkey is kenikew he isip mehitenged kandin su

kenikew he minge mata is mibewian din?” Ne midtavak haazà is etew te, “Ebpeneuven sikandin te Megbevayà.”<sup>18</sup> Ne is minge punuan he minge Hudiyu, wazè dan dutun meketuu he lakap sikandin he neulian. Uмба, impetawag dan is iney wey amey zutun te neulian he lakap,<sup>19</sup> ne mid-insaan dan sikandan. Ke sikandan te, “Anak niw ve heini? Benar ve is egkegiyen he lakap sikandin he zaan puun pa te ked-enaka kandin? Nemenumenu is kegkeulii te minge mata zin?”<sup>20</sup> Ne midtavak is minge ginikanan dutun te neulian, ke sikandan te, “Netuenan dey he anak dey heini; ne netuenan dey zaan he lakap en sikandin puun pa te ked-enaka kandin.”<sup>21</sup> Iyan, ke nemenumenu is kebpekeehè din wey ke hentei is nekevawì te minge mata zin, wazè dey metueni. Deyzey ke iyan niw sikandin insai su megurang en sikandin; egkehimu he iyan sikandin edtavak.”<sup>22</sup> Uмба iyan haazà tavak dutun te minge ginikanan din su nahandek dan te minge punuan he Hudiyu su neuyun en he zaan is minge punuan he ke zuen egkagi he iyan si Jesus sikan is mibpili te Megbevayà he ibpahadi, ne haazà is egkagi, kenè dan en ibpeseled te minge simbahan dan.<sup>23</sup> Ne tenged dutun migkagi haazà is minge ginikanan din te, “Megurang en sikandin; iyan niw insai.”

<sup>24</sup> Ne zutun mid-umanan dan umawa haazà is neulian he lakap ne migkegiyan dan te, “Iyan nu kegiya is tutuu su kayi ka te etuvangan te Megbevayà. Netuenan dey he heini si Jesus, mesinupaken sikandin te sugù te Megbevayà.”<sup>25</sup> Ne midtavak is etew te, “Kenè ku egketuenan ke mesinupaken be sikandin wey ke kenà. Iyan dà egketuenan ku is: hein aney, lakap a iyan, ne guntaan ebpekaahà ad!”<sup>26</sup> Ne mid-uman dan megkagi te, “Hengkey is mibeelan din kenikew? Mibmenumenu zin is kebewii zin te mata nu?”<sup>27</sup> Ne midtavak haazà is neulian te, “Nekagi ku en keniye ne wazè kew mebpemineg. Maan is egkesuatan niw te ed-uman ebpmineg? Kela ke egkesuatan niw he mehimu kew zaan he minge sumusundan ni Jesus!”<sup>28</sup> Ne nepauk dan dutun ne mezaat is minge lalag dan kandin, ke sikandan te, “Iyan ka sumusundan din; sikami mulà, sumusundan key te ebpeneuven dengan he si Moises!”<sup>29</sup> Netuenan dey he zengan midlelagan si Moises te Megbevayà, iyan, heini he etew, wazè dey hanew ke hendei sikandin ebpuun.”<sup>30</sup> Ne midtavak maan haazà is etew te, “Uteu ku heini igkeinuinu! Duen gehem ni Jesus ne mibewian din is minge mata ku, ne minsan pa zutun wazè niw ves metueni ke hendei sikandin ebpuun!”<sup>31</sup> Netuenan tew he is Megbevayà, kenè din edtevangen is mesinupaken he etew, iyan, ke zuen etew he ed-azap kandin wey edtuman te egkesuatan din, iyan edtevangen din.<sup>32</sup> Puun pa te kedlimbaga te kelibutan taman en guntaan sikan tew pa mezineg is etew he ebpekevawì wey meulii is mata te etew he zaan en he lakap puun pa te ked-enaka kandin.<sup>33</sup> Ke kenà sugù si Jesus te Megbevayà wazà egkehimu zin.”

### Is Tutuu he Lakap

<sup>34</sup> Ne midtavak dutun is minge punuan te, “Ebpenerù ke ve kenami he mesinupaken ke man utew puun pa te ked-enaka kenikew!” Ne

zutun migkegiyan dan sikandin he kenè dan en maan ebmehimuwen he ebpekeseled sikandin diyà te minge simbahan dan te minge Hudiyu.

<sup>35</sup>Ne nezineg ni Jesus haazà is mid-ulaula te minge punuan he minge Hudiyu zutun te neulian he lakap, ne mibpen-ehè din, ne hein neehè din mid-insaan din te, “Edtuu ke ve te Kakey te Menusiyà?” <sup>36</sup>Ne midtavak haazà is etew te, “Kegiya nu kediey ke hentei sikandin su wey a meketuu kandin.” <sup>37</sup>Ne midtavak si Jesus te, “Neehè nu en su siak is ebpekidlalag kenikew, iyan a.” <sup>38</sup>Ne egkagi haazà is etew te, “Emun iyan heeyan, edtuuwan ku sikew.” Ne zutun mid-azap din si Jesus.

<sup>39</sup>Ne migkagi si Jesus diyà te kandin te, “Umba midhendini a te kelibutan su wey mesusi is nengeulaula te minge etew. Ne is etew he netuenan din he lakap is kedsavut din, ebewian ku wey mebmeupiya is kedsavut din. Ne is etew he egkegiyen din he kenà lakap is kedsavut din, utew pa ed-iseg is kegkelakap te kedsavut din.” <sup>40</sup>Ne zuen minge Perisiyu he nekezineg dutun te minge lalag din, ne ke sikandan te, “Lakap bes is kedsavut dey?” <sup>41</sup>Ne midtavak si Jesus te, “Emun wazè niw metueni he lakap is kedsavut niw, wazè niw geina salà, iyan, geina te egkagi kew he meupiya is kedsavut niw te hustu, kenà egkeawà is salè niw.”

### Is Ebantey te Minge Kerehidu

**10** <sup>1</sup>Ne impenurù ni Jesus is sempità, ke sikandin te, “Uteu venar is egkegiyen ku he ke zuen etew he edseled te tudil te minge kerehidu ne kenà diyà ebayà te gemawan su ziyà ebayà te selakew en he ibayà, ne haazà he etew, tekawen wey tulisan. <sup>2</sup>Ne is etew he ziyà ebayà te gemawan, iyan sikan is ed-elima te kerehidu. <sup>3</sup>Emun edseled sikandin, ebpuwasan te ebantey zutun te gemawan. Ne is minge kerehidu zin he ziyà te seled, egkekilala zan is lageng din ne ed-umawen din sikandan pinaagi te minge ngazan dan, ne ibpeguwè din sikandan. <sup>4</sup>Ne emun ibpegawas en te ed-elima is kandin he minge kerehidu, iyan sikandin edhuna ne edsunud dan kandin su neleyaman dan is lageng din. <sup>5</sup>Kenè dan edsunud te selakew he etew, kekenà, ebpeleguyan dan su wazè dan meleyami is lageng dutun te selakew he etew.”

<sup>6</sup>Sempità heini he impezineg kandan ni Jesus, iyan, wazè dan mesavut ke hengkey is ibpesavut din. <sup>7</sup>Umba, migkagi en maan diyà te kandan te, “Uteu venar is egkegiyen ku keniyu he iring a te gemawan te tudil te minge kerehidu. <sup>8</sup>Duen minge ebpenurù he midhuna kediey zini, iyan, iring dan dà te minge tulisan wey tekawen; iyan, is minge kerehidu ku, *he ke và dà egkegiya, minge etew he gaked ku, wazè dan mebpemineg kandan.* <sup>9</sup>Iyan a sikan is gemawan; ke zuen minsan hentei he edseled pinaagi kediey edlibriyen sikandin te silut. Iring sikandin te kerehidu ku he edseled te tudil ne egawas he ebpen-ahà te egkeenen. <sup>10</sup>Umba edhendutun te tudil is tekawen su wey mekepenakew, ne wey

mekehimatey, ne wey mekezezaat. Siak mulà, midhendini a te kelibutan wey mevegayi is menusiyà te untung he wazà pidtemanan wey wazè en kurang dutun te untung.

<sup>11</sup>Iyan a sikan is ed-elima te minge kerehidu he utew meelima. Ibelavag ku is untung ku wey kenà mekeizi is minge kerehidu ku. <sup>12</sup>Is etew he sinuhulan dà, kenà tutuu he ed-elima su kenà kandin is minge kerehidu. Ne emun egkeehè din is ebpekeuma he leew he asu he egngezanan te lubu, ed-ewaan din haazà is minge kerehidu ne ebpelaguy. Ne ebengaan dutun te lubu is sevaha he kerehidu ne is дума, ne ebpekedsusuwey. <sup>13</sup>Umba ebpelaguy haazà is sinuhulen su kenà iyan sikandin sikan is tutuu he ed-elima, ne kenà daan mahal ziyà te gehinawa zin haazà is minge kerehidu. <sup>14,15</sup>Iyan a kes ed-elima te minge kerehidu he utew meelima. Netuenan ku ke hentei is Amey ku, ne netuenan din daan ke hentei a is anak din. Iring din ded daan is minge etew he gaked ku, netuenan dan ke hentei a ne egketuenan ku zaan ke hentei sikandan, ne ebpehimatey a he elili te minge etew he gaked ku. <sup>16</sup>Ne zuen pa minge kerehidu ku, *he ke và dà egkegiya, minge gaked ku he etew, he kenà kayi te seled te ginhedian te minge Hudiyu. Ed-uwiten ku zaan sikandan ne ebpeming dan kedì. Ne zutun sebsevaha zà is tudil ne sebsevaha zà daan is ed-elima kandan su iyan e zà.*

<sup>17</sup>Umba utew a mahal ziyà te gehinawa te Amey ku he Megbevayà su ebpehimatey a he elili te minge gaked ku he etew ne ebenhawen e zin. <sup>18</sup>Wazà a tegela te minsan hentei he etew su ebpehimatey a te kediey he gustu. Kediey zà he ketenged is kebpehimatey ku, ne kediey zà daan he ketenged is kebenhawa kediey su insugù heini kediey te Amey ku he Megbevayà.”

<sup>19</sup>Ne hein nezingen te minge Hudiyu heini he penurù ni Jesus, kenè dan en egkengeuyun. <sup>20</sup>Mezakel kandan is egkagi te, “Ebunegen sikandin wey mid-ulinan te mezaat he mulin-ulin. Kenè tew ebpemingegen sikandin.” <sup>21</sup>Ne egkagi is дума te, “Emun mid-ulinan sikandin te mezaat he mulin-ulin, kenà iring kayi is kebpenurù din. Is mid-ulinan te mezaat he mulin-ulin, kenà ebpekevawì te lakap!”

### Kenà Edtuu is Menge Hudiyu

<sup>22</sup>Ne ziyà te inged he Hiruselim iyan en haazà timpu te pista te minge Hudiyu he zutun edsilibrahan dan is kedlumpiyu zengan te simbahan dan he Valey te Megbevayà. <sup>23</sup>Tipenguzan haazà ne ziyà si Jesus edhiphipanew te Valey te Megbevayà, diyà te migngezanan te Helungà ni Hadì Sulumun. <sup>24</sup>Ne midtigum diyà te kandin is minge punuan he minge Hudiyu, ne mid-insaan dan sikandin te, “Maan is kemulu nu pa id-eles kenami ke hentei ka? Kegiyi key. Iyan ke ve sikan is mibpili te Megbevayà he ibpahadì?” <sup>25</sup>Ne midtavak si Jesus te, “Migkagi ku en

keniyu ne wazè niw tuuwi. Is menge egkein-inuwan he midhimu ku he iyan insugù te Amey ku he Megbevayà, iyan tuus ke hentei a. <sup>26</sup>Ne wazè niw tuuwi su kenè kew menge gaked ku he etew. <sup>27</sup>Su is menge gaked ku he etew, ebpeming dan te menge lalag ku. Egkekilala ku sikandan ne edsundan dan kediey. <sup>28</sup>Ebegayan ku sikandan te untung he wazà pidteman, ne kenè en ebpatey is gimukud dan ne wazà minsan hentei he ebpekeagew kandan dini te kedì. <sup>29</sup>Is Amey ku he Megbevayà he lavew te langun, imbegey zin sikandan kediey, ne wazà minsan hentei he ebpekeagew kandan diyà te kandin. <sup>30</sup>Sevaha key zà, siak wey is Amey ku he Megbevayà.”

<sup>31</sup>Ne hein nezineg haazà te menge Hudiyu mibpengamì dan en maan te menge vatu he idtuleng dan kandin su edhimetayan dan pezem. <sup>32</sup>Ne migkagi ziyà te kandan si Jesus te, “Mezaker is impeehè ku keniyu he menge meupiya he vaal he insugù kedì te Amey ku he Megbevayà. Hendei zapit kayi te menge vaal ku is idtulenga niw kediey?” <sup>33</sup>Ne midtavak diyà te kandin haazà is menge Hudiyu te, “Kenà iyan dey idtulenga kenikew is meupiya he vaal, kekenà, geina te edsupaken nu is Megbevayà su maan is egkagi ka he Megbevayà ka te etew ke zà duen!” <sup>34</sup>Ne midtavak si Jesus te, “Duen insurat he Lalag te Megbevayà diyà te kesuguan tew he edhenduen te, ‘Migkagi ku he menge megbevayè kew.’” <sup>35</sup>Ne ke si Jesus te, “Kenà egkehimu he edhelinen is insurat he Lalag te Megbevayà. Umba, ke miggezanan din te menge megbevayà is menge kepuun tew zengan he mibegayan te lalag din, <sup>36</sup>maan is egkagi kew he edsupaken ku is Megbevayà emun egkagi a he Anak a te Megbevayà? Iyan a sikan is mibpilà te Megbevayà wey a mekehendini te kelibutan. <sup>37</sup>Is menge vaal te Amey ku he Megbevayà, iyan ebeelan ku. Emun kenà, kenà a keniyu tuuwi. <sup>38</sup>Ne emun iyan ebeelan ku is ebeelan daan te Amey ku, minsan ke kenè kew edtuu te menge lalag ku, tuu kew te ibpesavut te menge vaal ku su wey niw metueni he sevaha key zà, siak wey is Amey ku, su zini sikandin te kedì ne ziyà a zaan te kandin.”

<sup>39</sup>Ne edeopen dan en maan pezem si Jesus dutun, iyan, nekelikey sikandin.

<sup>40</sup>Ne mid-awà si Jesus dutun te Hiruselim, ne midrapas te wahig he Hurdan ne midhendiyà te tanà he zutun mebpemewtismu si Juan Megbebewtismu zengan. Ne zutun med-ubpà si Jesus. <sup>41</sup>Mezaker he menge etew is midhendiyà te kandin su egkeisip dan he, “Minsan ke wazà egkein-inuwan he mibeelan dengan ni Juan, utew venar is langun he migkagi zin mehitenged ki Jesus.” <sup>42</sup>Ne mezaker is nemeketuu ki Jesus dutun.

### Is Kebpatey ni Lazaro

**11** <sup>1</sup>Duen maama he nezeruwan. Is ngazan din si Lazaro he tigBitanya. Duen dezuwa he etevay zin he zutun daan ed-ubpà



te Bitanya, si Maria wey si Marta. <sup>2</sup>Iyan si Maria kes bahi he inhaplas din is agwa ziyà te menge paa ni Jesus, ne interapu zin dutun is menge vulvul zin. Ne meemahan dutun haazà is egkezeruwan he si Lazaro. <sup>3</sup>Ne mibpesuguan si Jesus dutun te zezuwa he vahi ne ke sikandan te, “Datù, egkezeruwan si Lazaro, is mahal ziyà te gehinawa nu.” <sup>4</sup>Ne hein nezingeg haazà ni Jesus migkagi te, “Kenà ibpatey ni Lazaro is daru zin, kekenà, iyan ketezengan ke maan is egkezeruwan sikandin su wey mevantug is Megbevayà ne wey e zaan mevantug is Anak te Megbevayà.”

<sup>5</sup>Minsan pa te mahal ziyà te gehinawa ni Jesus ensi Marta, si Maria, wey si Lazaro, <sup>6</sup>hein nezingeg din haazà is kegkezeruwi ki Lazaro, wazè pa sikandin medwaleng seled te zezuwa he andew zutun te neubpaan din. <sup>7</sup>Ne hein netapus haazà, migkegiyan din is menge sumusundan din te, “Edlikù kiw ziyà te prubinsya he Hudiya.” <sup>8</sup>Ne migkegiyan sikandin te menge sumusundan din te, “Menunudlù, deyzey ke kenè ka edlikù diyà te Hudiya su wazè pa mepirai he edhimetayan ka pezem te menge Hudiya.” <sup>9</sup>Ne midtavak si Jesus te, “Sepulù wey zezuwa he uras is sengeandew, ne ke zuen edhipanew te maandew kenà ebpekesipà su egketeyawan sikandin te andew. <sup>10</sup>Ne ke zuen edhipanew te mezukilem, ebpekesipà su kenè en merayag.” <sup>11</sup>Ne mid-uman mekgagi si Jesus te, “Nekelipezeng en is emigu tew he si Lazaro. Umba edhendiyà a te kandin su wey ku sikandin mepukew.” <sup>12</sup>Ne migkagi haazà is menge sumusundan din te, “Emun nekelipezeng en, meupiya su egkeulian en.” <sup>13</sup>Iyan ibpesavut dutun ni Jesus is: minatey en si Lazaro, iyan, kunaan te menge sumusundan din ke kedlizepeng dà duen is egkegiyan din. <sup>14</sup>Ne zutun migkagi si Jesus kandan te, “Minatey en si Lazaro. <sup>15</sup>Ne tenged keniyu inmeupiya heini te gehinawa ku te wazà a ziyà te kepatey zin su zuen ibpeehè ku keniyu wey med-iseg is kedtuu niw kediey. Ne kuwa kiw en su edhendiyè kiw te kandin.” <sup>16</sup>Ne si Tomas, kes migeraran dan te Sereping, migkagi ziyà te menge zuma zin he sumusundan te, “Edhendiyè kiw en su wey kiw mebpatey zuma ki Jesus.”

### Si Jesus is Ebpemanhew

<sup>17</sup>Ne zutun te kebpekeuma eni Jesus diyà te Bitanya, nezingeg din he heepat en he andew zutun is kedlevenga ki Lazaro. <sup>18</sup>Is inged he Bitanya, uvey zà te inged he Hiruselim su menge tetelu zà he kilumitru is elang. <sup>19</sup>Mezakel is menge Hudiya he midhendutun te ki Marta wey ki Maria su edlangan dan kandan tenged dutun te meemahan dan he minatey.

<sup>20</sup>Ne hein nezingeg ni Marta he ebpekeuma en si Jesus, midtelavuk din, ne si Maria, diyè pa sikandin te valey. <sup>21</sup>Migkagi si Marta ziyà te ki Jesus te, “Angin ke zini ka su kenà pezem ebpatey kes meemahan ku. <sup>22</sup>Ne netuenan ku he minsan guntaan ke zuen ebuyen nu ziyà te Megbevayà, ibegey zin kenikew.” <sup>23</sup>Ne migkagi si Jesus te, “Egkevanhew



zed is kakey nu.” <sup>24</sup>Ne migkagi si Marta te, “Uya, netuenan ku he egkevanhew sikandin keuzemà ke ebpemenhawen is menge minatey zutun te ketepusan he andew.” <sup>25</sup>Ne migkagi si Jesus te, “Iyan a sikan is ebpemanhew; iyan a kes ebegey te untung. Ke zuen etew he edtuu kedì, minsan ke ebpatey, uuyag gihapun is gimukud din. <sup>26</sup>Su is etew he edtuu kedì, duen din untung he wazà pidtemanan ne kenè en ebpatey is gimukud din. Bayi, edtuu ke ve kayi?” <sup>27</sup>Ne midtavak si Marta te, “Uya, edtuu a he iyan ka sikan is Anak te Megbevayà; iyan ka kes netagnà he hadi he ebpereteng dey he edhendini te kelibutan.”

<sup>28</sup>Ne te nekagi ni Marta haazà, mibeyaan din sikan is suled din he si Maria ne midnènessan din te, “Nekeuma en si Jesus ne ipbehendiyè ke zin.” <sup>29</sup>Ne hein nezineg ni Maria haazà, neketik-ew sikandin mekehitindeg ne midsinugung ki Jesus. <sup>30</sup>Ne wazè pa si Jesus mekeuma ziyà te inged su zutun pa sikandin te nesinugungan kandin ni Marta. <sup>31</sup>Ne is menge Hudiyu he edlangan kandan, diyè pa sikandan te valey he zuma ni Maria. Ne hein neehè dan si Maria is neketik-ew mekehitindeg he midlawang, midtelukun dan su kunaan dan ke edhendiyà te penlevengà su edsinegew zutun.

<sup>32</sup>Hein nekeuma si Maria ziyà te ki Jesus, mid-uvey ziyà te kandin ne midluhud. Ne ke sikandin te, “Angin ke zini ka pezem su kenà ebpatey kes meemahan ku.” <sup>33</sup>Ne hein naahà ni Jesus he edsinegew si Maria wey is menge Hudiyu he zuma zin, utew mibmezaat is gehinawa zin su neseeng. <sup>34</sup>Ne migkagi sikandin te, “Hendei niw ileveng?” Ne midtavak dan te, “Ebeyaan tew.” <sup>35</sup>Ne zutun mibpenigis is menge luhà ni Jesus. <sup>36</sup>Umba, migkagi is menge Hudiyu te, “Uteu mahal ziyà te gehinawa ni Jesus si Lazaro.” <sup>37</sup>Iyan, duen dutun menge etew he migkagi te, “Maan is wazè din bewii si Lazaro wey kenà mebpatey? Su emun newewian din is mata te lakap siguradu egkehimu zin daan heini.”

### Is Kegkevanhew ki Lazaro

<sup>38</sup>Ne zutun mid-iseg is kegkeseeng ni Jesus, ne mid-uvayan din haazà is midlevengan. Su haazà is penlevengà, surung diyà te pangpang. Duen inlekeb dutun he watu te gemawan din. <sup>39</sup>“Iawè niw heini is batu!” ke si Jesus. Ne si Marta, is etevey zutun te minatey, migkagi sikandin te, “Memahù en su heepat en guntaan he andew is kedlevenga kandin.” <sup>40</sup>Ne migkagi ziyà te kandin si Jesus te, “Migkagi ku en kenikew he ke edtuu ka, egkeehè nu is utew igkeventuga te Megbevayà.” <sup>41</sup>Ne in-awè dan dutun haazà is batu he inlekeb te surung. Ne midlingahà si Jesus diyà te langit ne migkagi te, “Amey ku, ebpeselamat a kenikew su ebpeminegen nu is ebuyuen ku. <sup>42</sup>Netuenan ku he layun ka ebpemineg te egkegiyen ku, iyan, tenged te menge etew kayi te uvey ku ed-ampù a kenikew guntaan wey zan meketuu he midsugù a kenikew zini te kelibutan.”

<sup>43</sup>Ne te nekagi zin heini, midhabet mekgagi te, “He Lazaro, gawas ka kenihan!” <sup>44</sup>Ne migawas si Lazaro he nevanhew. Nevukusan is lawa zin wey menge velad din wey paa zin te manggad. Ne is ulu zin, nevukusan te penuwilo. Ne migkagi si Jesus te, “Bedbazi niw wey ipaawà.”

### Is Bitiyara Mehitenged te Kedekepa ki Jesus

*(Juan 11:45-57; Mateo 26:1-5; Marcos 14:1,2; Lucas 22:1,2)*

<sup>45</sup>Ne haazà is menge Hudiyu zutun he miduma ki Maria, hein neehè dan haazà is mibeelan ni Jesus, mezakel kandan is midtuu ki Jesus. <sup>46</sup>Iyan, is duma kandan, midhendiyà te menge Perisiyu ne mibpenudtul zan is mibeelan ni Jesus. <sup>47</sup>Ne zutun midtigum te menge punuan he memumuhat wey menge Perisiyu is menge ebmegurangan te menge Hudiyu. Ne hein netigum dan en, migkagi zan te, “Ebmenumenu kiw su heini si Jesus, mezakel is menge egkein-inuwan he ebeelan din. <sup>48</sup>Emun ebpegedanen tew, edtuuwan te langun he menge etew he iyan sikandin sikan is mibpili te Megbevayà he ibpahadi. Ne emun iyan en heini vagad, ebayaan kiw te menge sundaru te hadi tew ziyà te Ruma, ne edèdeetan dan is simbahan tew he Valey te Megbevayà wey is gubirnu tew.” <sup>49</sup>Ne zutun migkagi is sevaha kandan he si Keyipas. Iyan sikandin lavew he memumuhat dutun he tuig. Ke sikandin te, “Wazè niw menge isip! <sup>50</sup>Wazè niw ves mesavut he kinahanglan he zuen sevaha zà he etew he ebpatay he elili te tivuuk he kehudiyuwan su wey kenà mezeeti is kebpekesavuk tew te menge Hudiyu,” ke sikandin. <sup>51</sup>Kenà kandin dà he isip haazà is kegkegiya zin dutun su geina te iyan sikandin lavew he memumuhat, impinted kandin te Megbevayà. Netagnè din he ebpatay si Jesus he elili te tivuuk he kehudiyuwan. <sup>52</sup>Ne kenà tenged te menge Hudiyu zà su netagnè din daan he pinaagi te kebpatay ni Jesus egkesevaha is langun he menge etew he egkehimu he menge anak te Megbevayà minsan hendei he inged. <sup>53</sup>Ne puun dutun he andew, ebpengahaan te menge punuan is paagi wey zan mehimetayi si Jesus. <sup>54</sup>Ne tenged dutun wazè en maan si Jesus mebpegawagawa zutun te menge inged te menge Hudiyu, kekenà, midhendiyà te inged he egngезanan te Ipraim he uvey te tanà he kenà ed-ubpaan te etew. Ne zutun sikandin med-ubpa duma te menge sumusundan din.

<sup>55</sup>Megaan en dutun is pista te menge Hudiyu he egngезanan te Kedlevayi, ne te wazè pa meuma haazà is pista, ne mezakel he menge etew is nemenekezeg diyà te Hiruselim he ebpemuun te menge zuma he inged su edtumanen dan is tuluuwan te menge Hudiyu te kebpelumpiyu. <sup>56</sup>Ebpen-ahaan dan si Jesus ne ebpelelelagè dan diyà te simbahan he Valey te Megbevayà, ke sikandan te, “Hengkey is isip niw; edtelavuk be si Jesus kayi te pista wey ke kenà?” <sup>57</sup>Ne insugù he zaan te menge punuan he memumuhat wey menge Perisiyu he ke zuen egketau ke hendei si Jesus kegiya zin kandan wey zan ikepezakep.

### Is Kedhaplas te Pehemut

(Juan 12:1-8; Mateo 26:6-13; Marcos 14:3-9)

**12** <sup>1</sup>Mekeenem pa zutun is Pista te Kedlevayi, ne nekeuma si Jesus diyà te Bitanya he inged ni Lazaro, kes mibanhew ni Jesus. <sup>2</sup>Ne ziyà te Bitanya midtukud dan te keemuran su negalew zan tenged te kebpekeuma eni Jesus. Iyan si Marta mengengenat kandan, ne elin si Lazaro zuma ni Jesus dutun te ebpemengaan. <sup>3</sup>Ne si Maria, migkuwa zin is sengesalmun he agwa te nardu he utew mahal, ne mid-uvayan din si Jesus ne inhaplas din diyà te menge paa ni Jesus ne interapu zin is menge vulvul zin te paa ni Jesus. Ne nekeeneb dutun te tivuuk he seled te valey is mehemut. <sup>4</sup>Ne si Hudas he tigKeriyuti, is sevaha he sumusundan ni Jesus, iyan sikandin ed-akal ki Jesus ne migkagi sikandin te, <sup>5</sup>“Es, Es! Pira vuwa he gatus is bali kayi? Deyzey ke imbelegyà heeyan is agwa wey ikevegey is halin din diyà te menge egkengeayuayu.” <sup>6</sup>Iyan ingkekegiya zin dutun, kenà te hizu zin te menge egkengeayuayu, kekenà, tenged te tekawen sikandin. Iyan sikandin ibpetipig eni Jesus te selapi dan ne ebpenekawen din is duma zutun. <sup>7</sup>Ne zutun migkagi si Jesus te, “Pesegdana niw si Maria. Petipigi kandin is samà kayi te agwa wey ikehaplas te lawa ku emun idleveng ad. <sup>8</sup>Is menge egkengeayuayu, layun niw egketevangi sikandan, iyan, siak, kenà a egkeuget dini te keniyu,” ke sikandin.

<sup>9</sup>Nezineg te utew mezakel he menge etew he ziyà si Jesus te inged he Bitanya, ne nemenhendutun dan. Kenà iyan dan dà ed-ahaan si Jesus, kekenà, ed-ahaan dan daan si Lazaro sikan is mibanhew zin. <sup>10</sup>Ne tenged kayi neisip te menge punuan he menge memumuhat he edhimetayan dan daan si Lazaro <sup>11</sup>su tenged kandin mezakel is menge Hudiyu he midsuwey te impenurù te menge memumuhat su edsunuzen dan si Jesus.

### Is Kedhendiyà ni Jesus te Hiruselim

(Juan 12:12-19; Mateo 21:1-11; Marcos 11:1-11; Lucas 19:29-40)

<sup>12</sup>Ne nepawà dutun te kedheplasi ki Jesus, sikan is utew mezakel he menge etew he ebpemenelavuk dutun te pista, nezineg dan he edhendiyà si Jesus te Hiruselim. <sup>13</sup>Ne migkuwa zan te menge zehunen he subpang, ne migawas dan dutun te inged su edsinugungen dan si Jesus. Migkagi zan te, “Deliga is Nengazen! Deliga zaan heini is ebpekeuma he midsugù te Nengazen! Is hadi tew te menge kevuwazan ni Israyil, berakat he tuvazi sikandin te Megbevayà!” <sup>14</sup>Ne migkuwa ni Jesus is nati te kudà he asnu ne mid-untuzan din. Ne pinaagi zutun netuman is insurat he tagnà he migkagi te,

<sup>15</sup>“Sikiyu is menge meginged te Hiruselim,  
kenè kew mahandek su ebpekeuma en

is hadì niw he ed-untud te nati he asnu.”

<sup>16</sup>Ne haazà is kedseled ni Jesus diyà te Hiruselim, wazè pa mesavut te menge sumusundan din he kegketuman haazà te netagnà dengan, asal, hein midlikù en si Jesus diyà te langit, netenuzan dan is mibeelan din ne nesavut dan he neulaula heini sumalà is netagnà dengan diyà te insurat he Lalag te Megbevayà.

<sup>17</sup>Is menge etew he nekeahà ki Jesus dutun te ked-umawa zin wey kebenhawa zin ki Lazaro, midsangyew zan is neehè dan dutun. <sup>18</sup>Umba mibpemenelavuk ki Jesus is utew mezakel he menge etew su nezineg dan he mibanhew zin si Lazaro. <sup>19</sup>Ne zutun migkagi is menge Perisiyu te, “Uteu mezakel he menge etew is edsundan kandin! Wazè tew en bes egkehimu.”

### Is Kegkegiya ni Jesus te Kemetayen Din

<sup>20</sup>Ne zuen menge Gerisyahanen he nemenelavuk daan dutun te pista su edsimba zan te Megbevayà diyà te Hiruselim. <sup>21</sup>Ne midhendiyè dan te ki Felipe. (Ne si Felipe, tigBitsayda, diyà te prubinsya he Geliliya.) Ne ke sikandan te, “Egkesuat key he ebpekidlalag ki Jesus.” <sup>22</sup>Ne si Felipe, migkagi zin heini ziyà te ki Andres, ne zutun mibpezumehè dan pehendiyà te ki Jesus, ne midtudtul zan kandin. <sup>23</sup>Ne migkagi si Jesus te, “Egkesipegan en utew is timpu he ibpegawagawa ziyà te minsan hentei is utew ku kebpekelavew te langun. <sup>24</sup>Uteu venar is egkegiyen ku keniyu he emun kenà idleveng is benì diyà te tanà, kenà egkevuwad. Ne emun igkeleveng en ne edtuvù; ne ebegas te mezakel. *Iring din ded daan kedì, su emun ebpatey a ne mezakel is egkevegayan te vegu en he untung.* <sup>25</sup>Is etew he egkenugunan din is untung din dini te kelibutan, ebpatey sikandin gihapun, iyan, is etew he tenged kediey kenè din egkenugunan is untung din dini te kelibutan, egkekuwa zin is untung he wazà pidteman.

<sup>26</sup>Ke zuen etew he egkesuat he mehimu he suluguen ku, kinahanglan he edsunuzen e zin, su ke hendei a ne zutun daan is suluguen ku. Ne ke zuen edtuman te menge sugù ku, edeligen sikandin te Amey ku he Megbevayà.

<sup>27</sup>Uteu mesakit is gehinawa ku guntaan. Hengkey vuwa is egkegiyen ku? Kenà egkehimu he edhengyuen ku ziyà te Amey ku he kenè din ipaantus kediey heini is ebpeebuten ku he utew merasey, su umba midhendini a te kelibutan su wey ku mesegazi heini is ibpaantus kedì.”

<sup>28</sup>Ne zutun migkegiyan ni Jesus is Amey zin he Megbevayà, ke sikandin te, “Amà, himuwa nu he mevantug ka te menge etew.” Ne zutun duen lalag he ebpuun te langit he egkagi te, “Midhimu ku en, ne ed-umanan ku edhimuwa.”

<sup>29</sup>Ne zuen mezakel he menge etew zutun ne hein nezineg dan haazà, ke sikandan te, “Rugung!” Ne egkagi is duma te, “Belinsuguen te Megbevayà he ebpekidlalag ki Jesus!” <sup>30</sup>Ne migkagi si Jesus te, “Umba mibpekidlalag

is Megbevayà, kenà tenged kediey, kekenà, tenged keniyu su wey niw mezing is egkegiyen din. <sup>31</sup>Is Megbevayà, puun guntaan edhukuman din te silut is tivuuk he menusiyà he kuntada zin, ne egkezaag din en si Setanas, sikan is ebayàbayà dini te kelibutan. <sup>32</sup>Ne siak, emun ibayew ad pinaagi te tukud he ibpehitndeg, duen ibpekekabig ku te langun he menge etew.” <sup>33</sup>Iyan ingkekegiya ni Jesus dutun su ibpesavut din is paagi te kedhimetayi kandin. <sup>34</sup>Ne migkagi zutun is menge etew te, “Duen impenurù kenami he ebpuun te insurat he Lalag te Megbevayà he kenè en ebpatay is mibpilì te Megbevayà he ibpahadi. Ne sikew, egkagi ka he ibayew ziyà te tukud is Kakey te Menusiyà. Hentei heini is egkegiyen nu he Kakey te Menusiyà?” <sup>35</sup>Ne migkagi ziyà te kandan si Jesus te, “Siak is kerayag he ebpeketayew te kedsavut niw, egkesipegan en is ked-ewai ku keniyu. Te kemulu pa merayag, purungi niw susiya is ibayè niw su kela ke egkezukileman kew. Is edhipanew he merusirem is ibayè din, kenè din egketuenan ke hendei sikandin ebpekepevayà. <sup>36</sup>Siak is kerayag. Te kemulu e pa zini te keniyu, sarig kew kediey te kerayag su wey layun meteyawi is isip niw.”

#### Kenà Edtuu is Menge Eteu

Ne zutun te nekagi ni Jesus haazà, mid-ewaan din haazà is mezakel he menge etew ne mid-eles sikandin. <sup>37</sup>Minsan pa te mezakel is nengeehè dan he menge egkein-inuwan he mibeelan din, wazè dan sikandin tuuwi. <sup>38</sup>Su pinaagi kandan netuman sikan is netagnà dengan ni Esaias, kes ebpeneuven te Megbevayà. Su ke si Esaias te,

“Nengazen, wazà edtuu te ibpesavut dey.

Wazà nesayud he impeehè nu en kandan is gehem nu.”

<sup>39,40</sup>Ne migkagi zaan si Esaias te,

“Is Megbevayà, midhimu zin sikandan

he lakap wey kenè dan mekeahà.

Midhimu zin daan he mezesen is gehinawa zan

wey zan kenà meketuu su kela ke ed-iniyugan dan

is mezaat he ulaula ne ebpetavang dan kandin.”

Umba wazè dan dutun meketuu ki Jesus. <sup>41</sup>Umba migkagi ni Esaias haazà is menge lalag su netuenan din dengan he utew zekelà is gehem ni Jesus, ne iyan si Jesus egkegiyen din dutun.

<sup>42</sup>Ne minsan pa zutun mezakel is nemeketuu ki Jesus he menge punuan he menge Hudiyu, iyan, wazè dan kegiya he neketuu zan kandin su nahandek dan te menge Perisiyu su kela ke ewaa is ketenged dan te kedseled te menge simbahan. <sup>43</sup>Umba wazè dan kegiya su iyan dan impelavi is kedeliga kandan te menge etew, kenà is kedeliga kandan te Megbevayà.

<sup>44</sup>Ne zutun mibpekezaging megkagi si Jesus te, “Is edtuu kedì, kenà iyan e zà egketuuwan din, kekenà, egketuuwan din daan is Megbevayà

he midsugù kedì. <sup>45</sup>Is nekeahà kediey, nekeahà daan te Megbevayà he midsugù kedì. <sup>46</sup>Umba midhendini a is kerayag te kelibutan su wey ku meteyawi is isip te menge etew. Ne ke zuen edtuu kedì, kenè en egkerusireman is isip din. <sup>47</sup>Ne ke zuen etew he nezineg din heini is menge penurù ku ne kenè din edtumanen, kenè ku sikandin edhukuman te silut su wazà a medhendini te kelibutan wey ku mesiluti is menusiya, kekenà, wey ku melibri te silut is menusiya. <sup>48</sup>Is etew he kenà edawat kedì ne kenà edtuman te menge penurù ku, edhukuman sikandin te silut keuzemà dutun te ketepusan he andew, su iyan idsiluti kandin is menge penurù ku he wazè din dewata. <sup>49</sup>Su is menge penurù ku, kenà dini zà ebpuun te kediey zà he isip, su midsugù a te Amey ku he Megbevayà ne insugù din kediey is ibpenurù ku. <sup>50</sup>Netuenan ku he is insugù din kediey he menge lalag, iyan ebpekevegey te untung he wazà pidtemanan. Ne tenged kayi egkegiyen ku is ibpekagi zin kediey.”

### Is Kedlùlù ni Jesus te Menge Paa te Menge Sumusundan Din

**13** <sup>1</sup>Sengeandew pa zutun ne egketuman en is Pista te Kedlevayi. Netuenan ni Jesus he uvey en is ked-awè din dini te kelibutan su ed-ulì en diyà te Amey zin he Megbevayà. Utew mahal ziyà te gehinawa zin is menge sumusundan din dini te kelibutan, ne zutun ibpeehè din ke hengkey kemahal sikandan diyà te gehinawa zin.

<sup>2</sup>Si Jesus wey is menge sumusundan din, ne edlavung dan dutun. Ne si Hudas he tigKeriyuti he anak ni Simon, daan en he impeseled ni Setanas diyà te isip din is ked-ekali zin ki Jesus. <sup>3</sup>Ne si Jesus, netuenan din he insarig kandin te Amey zin is kebayaàbaya te langun. Netuenan din daan he ziyà sikandin ebpuun te Megbevayà ne ziyà daan sikandin ed-ulì. <sup>4</sup>Ne zutun te edlavung dan, midhitindeg si Jesus ne midluwas din is kumbalè din ne zuen imbevakes din he tualya, <sup>5</sup>ne midsulugan din te wahig is pelenggana. Ne zutun mibpenlùluan din is menge paa te menge sumusundan din, ne mibpenerepuwan din dutun te tualya. <sup>6</sup>Ne hein iyan en si Simon he migeraran ki Pedro, migkagi si Pedro te, “Edlùluan nu ve is menge paa ku?” <sup>7</sup>Ne midtavak si Jesus te, “Kenè nu egkesavut is ebeelan ku guntaan, iyan, keuzemà egkesavut nu.” <sup>8</sup>Ne migkagi si Pedro te, “Kenà egkehimu he iyan ka ebpenlùlù te menge paa ku!” Ne midtavak si Jesus te, “Emun kenè ku sikew egkelùluan, kenè ku sikew sumusundan.” <sup>9</sup>Ne zutun midtavak si Pedro te, “Ne emun iyan heeyan ne kenà iyan dà is paa ku, kekenà, elin nu zaan lùlui is menge velad ku wey ulu ku!” <sup>10</sup>Ne migkagi si Jesus te, “Sikan is nekepemezigù en, iyan dà kinahanglan he edlùluan is menge paa zin su nelumpiyuwan en is lawa zin. Ne sikiyu zaan, nepurung kew en melumpiyuwi. Asal is sevaha keniyu wazà melumpiyuwi.” <sup>11</sup>Umba migkagi he wazà melumpiyuwi is sevaha su netuenan din ke hentei is ed-akal kandin wey mehimetayi.

<sup>12</sup>Ne hein netapus din haazà is kebpenlului zin te minge paa zutun te minge sumusundan din, insun-ud din is kumbalè din ne mibpinuu. Migkagi sikandin diyà te kandan te, “Egkesavut niw ve is kehulugan kayi te mid-ulaula ku keniyu?” <sup>13</sup>Iyan niw id-umew kedì is Menunudlù wey Egalen, ne hustu en heeyan su iyan a iyan egalen niw. <sup>14</sup>Ne siak is menunudlù wey egalen niw, emun engayan a he ebpenlulù te minge paa niw te minge sakup ku, kinahanglan he ebpelululuey kew te minge paa te uman sevaha keniyu. <sup>15</sup>Umba mid-ulaula ku heini kayi te keniyu su wey niw meiringi. Kinahanglan he mebpevayàbayà is kada sevaha keniyu te zuma zin. <sup>16</sup>Uteu venar is egkegiyen ku keniyu he is suluguen, kenà lavew sikandin te egalen din, ne is sugù daan, kenà sikandin lavew te midsugù kandin. <sup>17</sup>Emun egkesavut niw en heini is impenurù ku keniyu, igkelipey niw utew ke edtumanen niw.

### Is Kegkegiya ni Jesus te Kedlimbungi Kandin

<sup>18</sup>Kenè kew pudu is egkegiyan ku kayi su netuenan ku ke hengkey is gehinawa te uman sevaha keniyu te minge pinilì ku. Duen sevaha keniyu he ed-ekalan e zin. Umba egkeulaula heini su wey metuman sikan is netagnà dengan diyà te insurat he Lalag te Megbevayà he edhenduen te, ‘Is duma ku he ebpekidugan kediey, iyan nehimu he kuntada ku.’ <sup>19</sup>Umba,” ke si Jesus, “te kenè pa heini egkehitaavù, egkegiyen ku en keniyu he zaan su emun egketuman en, ebpeketuu kew he iyan a sikan is mibpilì te Megbevayà he ibpahadì. <sup>20</sup>Uteu venar is egkegiyen ku keniyu he ke zuen etew he edewaten din is edsuguen ku, edewaten e zin daan, ne is edawat kediey, edewaten din daan is Amey ku he midsugù kediey.”

### Is Edlimbung ki Jesus

*(Juan 13:21-30; Mateo 26:20-25; Marcos 14:17-21; Lucas 22:21-23)*

<sup>21</sup>Ne te kegkegiya zutun ni Jesus, utew mibmesakit is gehinawa zin ne migkegiyan din is minge sumusundan din te, “Uteu venar is egkegiyen ku keniyu he ed-ekalan a te sevaha keniyu wey a mehimetayi.” <sup>22</sup>Ne mibpetengtengtengà haazà is minge sumusundan din su wazè dan metueni ke hentei is egkegiyen din. <sup>23</sup>Ne zutun te zurug ni Jesus kes sumusundan din he pinedtayè din utew. <sup>24</sup>Ne haazà he sumusundan, mid-uyawan ni Simon he iyan kes migeraran ki Pedro. Ke si Pedro te, “Insai nu sikandin ke hentei is egkegiyen din.” <sup>25</sup>Ne haazà he sumusundan, geina te uvey sikandin ni Jesus, mid-insaan din si Jesus te, “Hentei kenami is ed-akal kenikew?” <sup>26</sup>Ne midtavak si Jesus te, “Emun igkezehulit ku en heini is supas, ne is ebegayan ku, iyan sikandin.” Ne indehulit din haazà is supas, ne imbegey zin ki Hudas he anak ni Simon he tigKeriyuti. <sup>27</sup>Ne hein nezawat ni Hudas haazà is supas, ne mid-ehukan sikandin ni Setanas ne migkegiyan ni Jesus te, “Gègaani nu is



ebeelan nu!”<sup>28</sup> (Ne wazà minsan hentei kandan te minge sumusundan dutun he nekesavut ke maan is migkagi ni Jesus haazà.<sup>29</sup> Kunaan te zuma he ibpepemasa ni Jesus sikandin te egkinehnglanan dan he idsilibra te pista, ne emun kenà, duen ibpevegey ni Jesus diyà te minge egkengeayuyu. Umba iyan haazà netagù diyà te gehinawa zan su si Hudas, iyan edtipig te selapì dan.)<sup>30</sup> Ne hein nekaan ni Hudas haazà is supas, midlawang ne mezukilem en dutun.

### Is Begu he Sugù

<sup>31</sup> Ne hein migenat en si Hudas, migkagi si Jesus te, “Megaan en egkeahà ke sengemenu is kezekelà te gehem ku te Kakey te Menusiyà, ne pinaagi kedì egkeahà daan ke sengemenu is kezekelà te gehem te Amey ku he Megbevayà.<sup>32</sup> Ne emun pinaagi kedì egkeahà guntaan is dekelà he gehem te Amey ku he Megbevayà, kenà utew egkeuget ne ibpeehè din daan is kediey he dekelà he gehem.<sup>33</sup> Sikiyu is minge minahal ku he minge sumusundan, egketegtegaad dà guntaan ne egkeawaan ku en sikiyu. Ebben-ahaan a keniyu ne iring te migkagi ku ziyà te minge Hudiyu, egkegiyen ku zaan dini te keniyu he ke hendei a ebpevayà kenè kew ebpekezuma.<sup>34</sup> Begu en he sugù is ibpetuman ku keniyu. Iyan is: kinahnglan he mahala ziyà te gehinawa te uman sevaha keniyu is minsan hentei keniyu. Iring te mahal kew zini te gehinawa ku, kinahnglan he mahal ziyà te gehinawa te uman sevaha keniyu is minsan hentei keniyu.<sup>35</sup> Emun ed-ul-ulahan niw heini, egkeahà te langun he minge etew he minge sumusundan ku sikiyu.”

### Is Kegkegiya ni Jesus te Kebpemarew ni Pedro

(Juan 13:36-38; Mateo 26:31-35; Marcos 14:27-31; Lucas 22:31-34)

<sup>36</sup> Ne zutun migkagi ki Jesus si Simon, kes migeraran ki Pedro, ke sikandin te, “Ebpehedei ka?” Ne midtavak si Jesus te, “Ke hendei a ebpevayà kenè kew pa ebpekezuma; iyan, keuzemà ebpeketelukun kew gihapun.”<sup>37</sup> Ne migkagi med-uman si Pedro te, “Maan is kenà a ebpekezuma kenikew guntaan? Kenè ku sikew ed-ewaan minsan pa ke kinahnglan he ebpehimatey a tenged kenikew!”<sup>38</sup> Ne midtavak si Jesus te, “Ebpehimatey ke ve tenged kediey? Benar iyan is egkegiyen ku kenikew he te kenè pe kan ebpengukarà is manuk ne ketetelu ke en ebpekekagi he kenà a kenikew egkekilala.”

### Si Jesus is Dalan Pehendiyà te Megbevayà

**14** <sup>1</sup> “Kenà mebmesakit is gehinawa niw,” ke si Jesus, “kekenà, sarig kew te Megbevayà ne sarig kew zaan kediey.<sup>2</sup> Mezakel is minge egkeubpaan diyà te ed-ubpaan te Amey ku, su ke kenà tutuu heini, wazè ku geina sikiyu kegiyi he edhendiyà a te ked-andam te egkeubpaan niw.



<sup>3</sup>Ne emun ebpekehendiyà ad su ed-endaman ku sikiyu te egkeubpaan, edlikuan ku sikiyu ne ziyà ku sikiyu ed-uwita te ed-ubpaan ku. Ne zutun, ke hendei a, ne zutun kew zaan. <sup>4</sup>Ne netuenan niw en is ibayà pehendiyà te ebayaan ku.” <sup>5</sup>Ne migkegiyan si Jesus ni Tomas te, “Wazè dey metueni ke hendei ka ebpevayà. Ebmenmenuwen dey ve te kegketureduwa zey te ibayè nu?” <sup>6</sup>Ne midtavak si Jesus te, “Iyan a sikan is ibayà; iyan a kes tutuu he edtuuwan; iyan a kes ebpuunan te untung he wazà pidtemanan. Wazà ebpekehendiyà te ed-ubpaan te Amey ku emun kenà a iyan ibayè din. <sup>7</sup>Emun egketuenan niw ke hentei a, egketuenan niw zaan ke hentei is Amey ku. Puun guntaan netuenan niw en ke hentei sikandin su neehè niw en sikandin.”

<sup>8</sup>Ne zutun migkagi ziyà te kandin si Felipe te, “Ipeehè nu kenami is Amey nu he Megbevayà ne iyan dà egkinehenglanan dey.” <sup>9</sup>Ne midtavak si Jesus te, “Neuget en utew is kebpekiduma ku kenikew, Felipe, ne wazè nu ves metueni ke hentei a? Su is nekeahà kedì, ne nekeehè en daan te Amey ku he Megbevayà. Maan is egkesuat ka he ibpeehè ku kenikew is Amey ku? <sup>10</sup>Wazè ke ves medtuu he zini te kedì is Amey ku, ne ziyà a zaan te kandin su sevaha key zà? Minsan is menge lalag ku keniyu, kenè ku egkegiyen te kediey zà he isip su is Amey ku he zini ed-ubpà te kediey, kandin he vaal heini. <sup>11</sup>Tuu kew te egkegiyen ku he ziyà a te Amey ku ne zini sikandin te kediey. Ne emun kenè kew ebpeketuu kayi tenged dà te migkagi ku, tuu kew tenged te menge vaal ku su is menge vaal ku, egkeehè niw zutun he tutuu is egkegiyen ku keniyu. <sup>12</sup>Uteu venar is egkegiyen ku keniyu he ke zuen edtuu kediey, egkehimu zin is nengeveelan ku, asal lavew pa he mekegegehem is egkeveelan din tenged te ed-ulì a ziyà te Amey ku he Megbevayà. <sup>13</sup>Ke zuen ebuyuen niw kediey tenged te kedtuu niw kediey, ebeelan ku su wey mevantug is Amey ku tenged kediey. <sup>14</sup>Su is minsan hengkey he ebuyuen niw tenged te kedtuu niw kediey, ebeelan ku.

### Insaad ni Jesus is Wagas he Mulin-ulin

<sup>15</sup>Emun mahal a ziyà te gehinawa niw, edtumanen niw is menge sugù ku keniyu, <sup>16</sup>ne edhengyuan ku is Amey ku su wey zin ikevegey keniyu is Menenavang he ed-ilis kediey he kenà edsuwey keniyu te minsan keenu. <sup>17</sup>Iyan sikandin sikan is Wagas he Mulin-ulin he tutuu is ibpenurù din. Kenà heini egkezawat te menge etew zini te kelibutan he kuntada te Megbevayà su kenè dan egkekilala sikandin ne kenè dan egkesavut ke hentei sikandin. Sikiyu mulà, nesavut niw en ke hentei sikandin su ziyà ed-ubpà te keniyu ne kenà daan ed-awà diyà te keniyu.

<sup>18</sup>Ne kenè ku sikiyu ed-ewaan he iring te nengeilu su edlikuan ku zed sikiyu. <sup>19</sup>Kenè en egketegtegaad ne kenà ad maan egkeahà te menge kuntada ku he etew zini te kelibutan, iyan, sikiyu mulà, egkeehè e pa

egkeuman keniyu. Kenà egkeawà is untung ku te minsan keenu, umba zuen niw en daan untung he kenà egkeawà te minsan keenu. <sup>20</sup>Ne zutun te andew te kedlikui ku keniyu, egketuenan niw he siak, diyà a te Amey ku wey is Amey ku, dini zaan te kediey, ne sikiyu, dini kew te kediey ne ziyà a zaan te keniyu.

<sup>21</sup>Is etew he edewaten din is minge sugù ku ne edtumanen din, iyan sikandin etew he utew a mahal ziyà te gehinawa zin. Ne mahal zaan sikandin dini te gehinawa zey te Amey ku, ne edhimuwen ku he metueni zin he iyan a zuma zin.” <sup>22</sup>Ne zutun migkagi si Hudas (kenà sikan is Hudas he tigKeriyuti), ke sikandin diyà te ki Jesus te, “Maan is edhimuwen nu he metueni zey sikew ne kenè nu edhimuwen he metueni ka te minge etew he wazà medtuu kenikew?” <sup>23</sup>Ne midtavak si Jesus te, “Ke zuen etew he mahal a ziyà te gehinawa zin, edtumanen din is minge sugù ku, ne zutun mahal sikandin diyà te gehinawa te Amey ku. Ne siak wey is Amey ku, edhendiyè key te kandin ne ziyà key ed-ubpà te kandin. <sup>24</sup>Ke zuen etew he kenà a mahal ziyà te gehinawa zin, kenè din edtumanen is minge sugù ku. Heini is minge lalag ku, kenà dini zà te isip ku ebpuun, kekenà, diyà ebpuun te Amey ku he iyan midsugù kediey.

<sup>25</sup>Egkegiyen ku keniyu heini is langun te kemulu e pa zini te keniyu. <sup>26</sup>Ne edsuguen te Amey ku zini te keniyu is Menenavang he ed-ilis kediey. Iyan sikandin sikan is Wagas he Mulin-ulin ne ibpenurù din keniyu is langun, ne ibpetenuzan din keniyu is langun he migkagi ku keniyu.

<sup>27</sup>Edtegakan ku is isip niw te kelinew. Is kelinew he zini te isip ku, iyan idtagak ku keniyu. Is minge etew zini te kelibutan he kenà edtuu, kenè dan ebpekevegey keniyu te kelinew he iring kayi. Ne kinhanglan he kenà mebmesakit is gehinawa niw ne kenè kew zaan mahandek. <sup>28</sup>Nezineg niw is migkagi ku he ed-ewaan ku sikiyu ne edlikù e zed dini te keniyu. Angin ke tutuu he mahal a ziyà te gehinawa niw su igkelipey niw pezem heini su guntaan egkehimu he ed-ulì a ziyà te Amey ku he iyan lavew kenà a. <sup>29</sup>Ne te wazè pa meuma is ked-ewai ku keniyu, migkagi ku en keniyu heini he zaan su emun egkeulaula en, ebpeketuu kew he iyan a sikan is hadì he mibpilì te Megbevayà. <sup>30</sup>Mevavè dà utew is minge lalag ku keniyu su megaan en ebpekeuma si Setanas is egalen te minge etew zini te kelibutan he kuntada ku. Wazè din kegehém kediey, <sup>31</sup>iyán, is ed-ul-olahan ku guntaan, ne iyan insugù kediey te Amey ku he Megbevayà. Edtumanen ku heini su wey metueni te menusiya he mahal zini te gehinawa ku is Amey ku.

Ne kuwa kew en su ed-awè kiw kayi.”

### Is Pinemula wey is Menge Subpang Din

**15** <sup>1</sup>“Iyan a,” ke si Jesus, “sikan is puun te pinemula he paras ne is Amey ku he Megbevayà, iyan tegipinemula. <sup>2</sup>Ke zuen subpang

ku he kenà ebpemegas, id-awè din. Ne is langun he minge subpang ku he ebpemegas, edlumpiyuwan din su wey mekesigudu mekepemegas.

<sup>3</sup>Nelumpiyuwan kew en pinaagi te kedhemeni niw te impenurù ku keniyu.

<sup>4</sup>Kenè kew suwey kediey iring te kenà a zaan edsuwey keniyu. Wazà subpang he ebpekepemegas ke ebpekesuwey ziyà te lawa te pinemula, ne sikiyu zaan, emun edsuwey kew kediey kenè kew ebpekepemegas.

<sup>5</sup>Su iyan a sikan is lawa ne iyan kew minge subpang ku. Is etew he kenà edsuwey kedì iring te kenà a zaan edsuwey kandin, iyan ebpekepenigudu ebpekepemegas. Wazà egkehimu niw ke ebpekesuwey kew kediey. <sup>6</sup>Su ke zuen etew he edsuwey kediey, ed-engkezan sikandin iring te subpang he idtimbang wey megangu. Ne is minge subpang he nengegangu, edtigumen ne idtimbang diyà te hapuy wey metutung. <sup>7</sup>Ne sikiyu, emun kenè kew edsuwey kedì ne edhemenan niw is minge penurù ku, is minsan hengkey he ebuyuen niw kediey, ibegey ku keniyu. <sup>8</sup>Emun ebpenigudu kew ebpemegas, *he ke và dà egkegiya, ke layun meupiya is minge vaal niw, egkezeligan te minge etew is Amey ku he Megbevayà ne egketuenan he tutuu kew iyan he minge sumusundan ku.* <sup>9</sup>Iring te mahal a ziyà te gehinawa te Amey ku, mahal kew zaan dini te gehinawa ku. Hemeni niw is kebmahala ku keniyu zini te gehinawa ku. <sup>10</sup>Emun edtumanen niw is minge sugù ku keniyu, ne kenè kew egkeawà te kebmahala ku keniyu zini te gehinawa ku iring te midtuman ku is minge sugù kediey te Amey ku he Megbevayà ne kenà ad daan egkeawà te kebmahala zin kedì diyà te gehinawa zin.

<sup>11</sup>Umba migkagi ku keniyu heini is langun su wey niw ikelipey is kediey he kelipey ne wey kew utew melihey. <sup>12</sup>Iyan heini sugù ku keniyu he kinahanglan he mahal ziyà te gehinawa te uman sevaha keniyu is minsan hentei keniyu iring te mahal kew zini te gehinawa ku. <sup>13</sup>Ke zuen etew he ebpehimatey wey melibri is minge emigu zin, tuus heini he utew mahal is minge emigu zin diyà te gehinawa zin; wazè en kebmahal he ebpekeiring kayi. <sup>14</sup>Menge emigu ku sikiyu ke edtumanen niw is idsugù ku keniyu. <sup>15</sup>Kenè ku en maan sikiyu egngezanan te minge suluguen ku su is suluguen, kenà egkegiyan te egalen din ke hengkey is ebeelan te egalen din. Egngezanan ku sikiyu he minge emigu ku su is langun he impesavut kediey te Amey ku he Megbevayà, impesavut ku zaan keniyu. <sup>16</sup>Kenè kew iyan nekepili kediey, kekenà, iyan a nekepili keniyu. Intezù ku sikiyu wey kew mekepemegas te minge meupiya he ulaula ne wey kenà daan mahanew is begas niw. Ne is minsan hengkey he ebuyuen niw ziyà te Amey ku he Megbevayà tenged te kedtuu niw kediey, ibegey zin keniyu. <sup>17</sup>Iyan sugù ku keniyu is: kinahanglan he mahal ziyà te gehinawa te uman sevaha keniyu is minsan hentei keniyu.

### Is Kegkuntedaha te Menge Etew ki Jesus

<sup>18</sup>Emun egkuntedahan kew te minge etew zini te kelibutan he kuntada te Megbevayà, kenè kew meinuinu su zaan e zan he egkuntedahan.

<sup>19</sup>Emun дума kew te minge kuntada te Megbevayà ebmahalen kew zan, iyan, geina te kenè kew zan дума ne egkuntedahan kew zan su mibpili ku sikiyu wey kew mekesuwey ziyà te kandan. <sup>20</sup>Tentenuzi niw is migkagi ku keniyu he is suluguen, kenà lavew te egalen din. Su ke mibpesipelahan e zan is egalen niw, iyan kew pe be kenè dan pesipelahi. Ke edtumanen te minge etew is kedì he penurù, edtumanen dan daan is keniyu. <sup>21</sup>Iyan, ebpesipelahan kew te minge etew tenged te kedtuu niw kediey su wazè dan mekilala is Amey ku he midsugù kediey. <sup>22</sup>Angin ke wazà a mekehendini te kelibutan ne wazà a zaan mekepesavut kandan su kenà sikandan egkevesulan tenged te salè dan, iyan, guntaan wazè dan en igkepesangil. <sup>23</sup>Is egkuntada kediey, kenà iyan e zà egkuntedahan din, kekenà, egkuntedahan din daan is Amey ku he Megbevayà. <sup>24</sup>Duen mibeelan ku he neehè dan he minge egkein-inuwan he kenà egkeveelan te minsan hentei he menusiya. Angin ke wazè dan maahà heini su kenà sikandan egkevesulan tenged te mezaat he mid-ulaula zan kedì. Iyan, neehè dan en ne minsan pa zutun, siak wey is Amey ku, egkuntedahan key zan. <sup>25</sup>Pinaagi kayi netuman diyà te kandan is tagnà diyà te kesuguan he impenurù dengan kandan he edhenduen te, ‘Minsan ke wazè dan ketezengan te igkuntedaha zan kedì, ne egkuntedahan e zan.’ ” <sup>26</sup>Ne mid-uman megkagi si Jesus te, “Is Menenang he ebpuun te Amey ku, edsuguen ku zini te keniyu. Iyan sikandin sikan is Wagas he Mulin-ulin he ebpenurù te tutuu he edtuuwan. Ne emun ebpekeuma en dini te kelibutan, ibpesavut din ke hentei a. <sup>27</sup>Ne ebpekepesavut kew zaan kayi su puun pa te aney ku en kebpenurù, дума ku en sikiyu.”

**16** <sup>1</sup>“Umba migkagi ku keniyu heini is langun,” ke si Jesus, “su wey kenà mehugkà is kedtuu niw kediey te egkehitavù keniyu keuzemà. <sup>2</sup>Su id-awè dan is ketenged niw te kedseled diyà te simbahan, ne kenà iyan dà heini su keuzemà ke zuen edhimatey keniyu, kunaan din ke igkesuat te Megbevayà haazà is mibeelan din. <sup>3</sup>Umba ebeelan dan heini keniyu su siak wey is Amey ku, wazè key zan mekilala. <sup>4</sup>Umba egkegiyen ku heini keniyu he zaan su emun egkehitavù heini is kebpekeantus niw te kemeregenan, egketenuzan niw he inlaguy ku en keniyu heini he zaan.

Wazè ku sikiyu kegiyi kayi zengan hein begu kiw pa he nekeduzuma su kemulu e pa zutun дума niw.

### Is Baal te Wagas he Mulin-ulin

<sup>5</sup>Iyan, guntaan ed-uli ad diyà te Amey ku he midsugù kedì. Ne wazà sevaha keniyu he ed-insà kedì ke hendei a ebpevayà, <sup>6</sup>kekenà, utew kew egkengeseeng tenged te migkagi ku keniyu is egkengeantus niw he kemeresayan keuzemà. <sup>7</sup>Ne minsan pa kayi, benar iyan is egkegiyen ku he igkezeyzey niw is ked-ewai ku keniyu su emun kenè ku sikiyu ed-

ewaan, kenà ebpekehendini te keniyu is Menenavang. Ne emun ed-awà a, edsuguen ku sikandin dini te keniyu. <sup>8</sup>Ne emun dini en sikandin, ibpesavut din te menusiya he mezaat is ulaula te menusiya wey ibpesavut din he zuen metazeng he ibaya wey ibpesavut din daan kandan he edsilutan sikandan te Megbevaya. <sup>9</sup>Iyan ibpesevuta zin kandan he mezaat is ulaula zan su wazè dan medtuu kediey. <sup>10</sup>Ibpesavut din kandan is metazeng he ibaya su ed-uli ad diya te Amey ku ne kenè e en egkeahà keniyu. <sup>11</sup>Ibpesavut din is kedsiluti kandan te Megbevaya su si Setanas he egalen dan te minge kuntada te Megbevaya, midhukuman en te silut.

<sup>12</sup>Mezakel pa is egkegiyen ku pezem keniyu, iyan, kenè niw pa egkesavut. <sup>13</sup>Ne sikan is Wagas he Mulin-ulin he ebpenurù te tutuu he tuluuwen, emun dini en sikandin te keniyu, ibpesavut din keniyu is langun he tutuu. Kenè din iyan ibpesavut is kandin dà he isip, kekenà, iyan ibpesavut din is nezineg din diya te Amey ku. Ibpesavut din daan keniyu is egkeulaula keuzemà. <sup>14</sup>Ebentugen e zin su ibpesavut din keniyu is penurù ku wey ulaula ku. <sup>15</sup>Umba migkagi ku he ibpesavut din keniyu is penurù ku su is langun he egkegiyen te Amey ku, iyan ku zaan egkegiyen.

### Is Seeng Egkeilisan te Kelipey

<sup>16</sup>Nesipegan en is timpu he kenà ad keniyu egkeahà ne kenà daan utew egkeuget dutun ne egkeahà a keniyu egkeuman.” <sup>17</sup>Ne zutun mibpein-insey is дума he minge sumusundan din te, “Hengkey vuwa is ibpesavut din kayi te lagag din he nesipegan en is timpu he kenè tew en sikandin egkeahà ne kenà daan utew egkeuget dutun ne egkeehè tew en maan, wey hengkey is ibpesavut din te migkagi zin he ed-uli sikandin diya te Amey zin?” <sup>18</sup>Ne ke sikandan daan te, “Hengkey vuwa is ibpesavut din te migkagi zin he nesipegan en is timpu? Kenè tew egkesavut ke hengkey is ibpesavut din.” <sup>19</sup>Ne netueanan ni Jesus he zuen egkesuatan dan he id-insà kandin umba migkagi sikandin te, “Iyan buwa id-insè niw ke hengkey is ibpesavut ku te migkagi ku geina he nesipegan en is timpu he kenà ad keniyu egkeahà, ne kenà daan utew egkeuget dutun ne egkeahà ad maan keniyu. <sup>20</sup>Uteu venar is egkegiyen ku keniyu he is minge kuntada ku, igkelipey zan utew is egkehitavù kedi, iyan, sikiyu, ebpekesinegew kew su egkeseeng kew. Iyan, egkeilisan is kegkeseeng niw te zekelà he kelipey. <sup>21</sup>Emun ebeliliten is bahi, egkerasey te mesakit su ed-anak en. Ne emun edlusazan en, egkelipatan din is mesakit su igkelipey zin is begu en he etew he in-anak. <sup>22</sup>Iring din ded daan, egkeseeng kew guntaan, iyan, dutun te kebpeked-uman tew kebpeked-aahà, utew kew zutun egkelipey, ne wazà minsan hentei he egkeawè din is kelipey niw.

<sup>23</sup>Ne zutun he andew wazè en kinahanglan he zuen id-insè niw kediey. Uteu venar is egkegiyen ku keniyu he ke zuen minsan hengkey he

ebuyuen niw ziyà te Amey ku, ibegey zin keniyu tenged te kedtuu niw kediey. <sup>24</sup>Wazè niw pa mibuyù diyà te kandin ebpuun te kedtuuwi niw kediey. Buyù kew wey kew mekezawat su wey kew utew melipey.

<sup>25</sup>Migamit ku is minge sempità te kebpenurua ku keniyu, iyan, megaan en egkeuma is andew he kenè en maan minge sempità pa is egemiten ku su zutun, melemu niw en he egkesavut is egkegiyen ku. Ne zutun utew niw egkekeleduwi is egkegiyen ku keniyu mehitenged te Amey ku he Megbevayà. <sup>26</sup>Ne zutun he andew tenged te kedtuu niw kediey, iyan kew en egkagi te ebuyuen niw ziyà te Amey ku, ne kenè en kinahanglan he iyan e pa egkagi te ebuyuen niw ziyà te Amey ku <sup>27</sup>su utew kew mahal ziyà te gehinawa te Amey ku tenged te mahal a zaan diyà te gehinawa niw wey tenged daan te midtuu kew he ziyà a ebpuun te Amey ku he Megbevayà. <sup>28</sup>Diyà a ebpuun te Amey ku ne midhendini a te kelibutan. Ne guntaan ed-ewaan ku heini is kelibutan ne ed-uli ad diyà te Amey ku.”

<sup>29</sup>Ne zutun migkagi haazà is minge sumusundan din te, “Ne utew en keladu is egkegiyen nu su kenè en maan sempità. <sup>30</sup>Nesavut dey en he netuenan nu is langun su minsan is id-insà kenikew, kenè en kinahanglan he egkegiyen pa su netuenan nu en he zaan, umba edtuuwan dey en he sikew, diyà ka ebpuun te Megbevayà.” <sup>31</sup>Ne migkagi kandan si Jesus te, “Human kew ves meketuu? <sup>32</sup>Egkesipegan en is timpu he zutun ebpekedsusuwey kew is langun; ed-uli is kada sevaha keniyu ziyà te ed-ubpaan din ne egkeewaan a. Ne minsan pa zutun duen ku pa zuma su iyan duma ku is Amey ku he Megbevayà. <sup>33</sup>Umba migkagi ku keniyu heini is langun su wey mebmelinawen layun is gehinawa niw tenged kediey. Dini te kelibutan ebpesipelahan kew te minge etew he kuntada ku, iyan, kenè kew mahandek su nezaag ku en sikan is egalen te minge kuntada ku!”

### Is Ampù ni Jesus Mehitenged te Keugelingen Din

**17** <sup>1</sup>Ne hein nekepasad si Jesus dutun he egkagi, midlingahà diyà te langit ne ke sikandin te, “Amà, iyan en heini sikan is netagnà he timpu. Ipeehè nu en is dekelà he bentugan ku te Anak nu wey ku zaan ikepaahà is kezekelà te kenikew he bentugan. <sup>2</sup>Inсарig nu kediey is kebakabayà te tivuuk he menusiya su wey ku mevegayi te untung he wazà pidtemanan is langun he minge etew he imbegey nu kediey. <sup>3</sup>Ne iyan heini paagi he egkezawat dan is untung he wazà pidtemanan. Kinahanglan he egkesavut dan ke hentei ka is sevaha zà he tutuu he Megbevayà wey kinahanglan he egkesavut dan daan ke hentei a is Anak nu he si Jesu Kristu. <sup>4</sup>Dini te kelibutan, impeehè ku is utew zekelà he bentugan nu su is minge vaal he insugù nu kediey, nepasad ku en. <sup>5</sup>Ne guntaan, Amà, iuli nu kediey ziyàn te etuvangan nu sikan is daan he

utew ku keggelavew he iyan kes keggelavew ku zengan hein diyen e pa te kenikew te wazè pa limbaga is kelibutan.

### Is Ampù ni Jesus Mehitenged te Menge Sumusundan Din

<sup>6</sup>Is menge etew he imbegey nu kediey zini te kelibutan, impesavut ku kandan ke hentei ka. Kenikew sikandan he zaan ne imbegey nu kediey ne midtuman dan en is insugù nu kandan. <sup>7</sup>Netuenan dan en human he is langun he egkehimu ku, ne ziyè dà ebpuun te kenikew <sup>8</sup>su is impepenurù nu kediey, impenurù ku en kandan ne netuenan dan he tutuu iyan he ziyen a ebpuun te kenikew. Ne midtuu zan he midsugù a kenikew.

<sup>9</sup>Edhengyuan ku sikew tenged kandan; kenè ku sikew edhengyuan he tevangi nu is menge etew he kenà edtuu kedì, kekenà, edhengyuan ku sikew he tevangi nu is menge etew he imbegey nu kediey su kenikew zaan sikandan. <sup>10</sup>Ne is menge etew he gaked nu, kediey zaan, ne is langun he kediey, kenikew zaan. Ne pinaagi kandan egkeahà is bentugan ku. <sup>11</sup>Ne guntaan ed-uli ad diyen te kenikew ne kenè e en ed-ubpà dini te kelibutan, iyan, heini is menge etew he gaked ta, dini zan pa te kelibutan. Wagas he Amey ku, pinaagi te gehem te ngazan nu, ipata nu heini is menge imbegey nu kediey he etew su wey mesevaha sikandan iring te sevaha ki zà. <sup>12</sup>Te kemulu e pa zuma zan, is menge etew he imbegey nu kediey, midlig-enan ku sikandan pinaagi te gehem te ngazan nu he iyan daan kes ngazan he imbegey nu kediey. Mibentayan ku sikandan ne wazà minsan sevaha he egketazin kandan. Sikan is etew he netagnà is kedsiluti kandin, egketazin sikandin su egketuman is tagnà diyà te insurat he Lalag te Megbevayà. <sup>13</sup>Ne guntaan ed-uli ad diyen te kenikew ne edhengyuan ku kenikew heini te kemulu e pa zini te kelibutan su wey mepurung sikandan mengelipey te kediey he keliipey. <sup>14</sup>Sikan is lalag nu he ibpepenurù nu kediey, impenurù ku en kandan, ne migkuntada sikandan te menge etew zini te kelibutan he kuntada nu su wazè dan upakat kayi iring te wazè daan kedì he upakat te menge kuntada nu. <sup>15</sup>Kenè ku iyan edhengyuan he iawè nu zini te kelibutan heini is menge gaked ta he etew, kekenà, iyan edhengyuan ku kenikew he ipata nu sikandan wey kenà sikandan mekeizi ni Setanas. <sup>16</sup>Wazè dan upakat te menge etew he kuntada nu iring te wazè ku zaan upakat dutun te menge kuntada nu. <sup>17</sup>Heini is menge gaked ta he etew, pinaagi te tutuu he tuluuwen, himuwa nu sikandan he menge suluguen nu. Is lalag nu, iyan tutuu he tuluuwen. <sup>18</sup>Iring te midsugù a kenikew zini te kelibutan, edsuguen ku zaan sikandan wey zan ikepesavut is tivuuk he menusiyà. <sup>19</sup>Ne tenged kandan ibpeveyveyaan ku kenikew is gehinawa ku su wey zan daan ikepurung ikepeveyveyai kenikew is gehinawa zan.

### Is Ampù ni Jesus Mehitenged te Langun he Edtuu Kandin

<sup>20</sup>Edhengyuan ku sikew kenà tenged dà kayi te menge gaked ta guntaan, kekenà, tenged daan te langun he edtuu kediey keuzemà



pinaagi te kedwali zan. <sup>21</sup>Amà, idhangyù ku sikandan pudu wey mesevaha zà is isip dan iring te kegkesevaha ta. Dini ka te kedì ne ziyàn a zaan te kenikew. Edhengyuen ku zaan he mesevaha sikandan dini te kenita su wey meketuu is menusiyà he midsugù a kenikew. <sup>22</sup>Is kegkehimu ku he lavew he imbegey nu kediey, imbegey ku zaan kandan wey zan mesevaha te isip iring te kegkesevaha ta. <sup>23</sup>Su ziyà a te kandan ne zini ka zaan te kedì wey mehustu is kegkesevaha te isip dan su wey metueni te tivuuk he menusiyà he midsugù a kenikew, ne wey metueni zaan te menusiyà he mahal sikandan diyàn te gehinawa nu iring daan te mahal a ziyàn te gehinawa nu.

<sup>24</sup>Amà, is menge etew he imbegey nu kediey, egkesuatan ku he ziyè dan mekeamur te kediey diyà te ed-ubpaan ku keuzemà wey zan maahà is mekegegehem he anlag ku he imbegey nu kediey zengan te wazè pa tukuza heini is kelibutan. Umba mibegayan a kenikew te anlag su mahal a ziyàn te gehinawa nu. <sup>25</sup>Wagas he Amey ku, is menge etew zini te kelibutan he kuntada nu, wazè dan mesavut ke hentei ka, iyan, siak, nesavut ku; ne heini is menge etew he gaked ta, nesavut dan he midsugù a kenikew zini. <sup>26</sup>Impesavut ku kandan ke hentei ka ne ibpenigudu ku pa ibpesavut kandan heini su wey mehimu he ziyà a te kandan ne mahal ziyà te gehinawa te uman sevaha kandan is minsan hentei kandan iring te mahal a zaan diyàn te gehinawa nu.”

### Is Kedekepa ki Jesus

*(Juan 18:15-18; Mateo 26:69,70; Marcos 14:66-68; Lucas 22:55-57)*

**18** <sup>1</sup>Ne te neketapus si Jesus dutun he ebpengumew-umew, sikandin wey is menge sumusundan din, midrapas dan te zal-ug he egngезanan te Kidrun. Ne zuen menge kayu he impemula zutun ne zutun dan mebpundu. <sup>2</sup>Ne si Hudas, sikan is ed-akal kandin wey mehimetayi, netuenan din haazà is mibpunduwan dan su si Jesus wey is menge sumusundan din, layun dan edtigum dutun. <sup>3</sup>Ne zutun nekeuma si Hudas he edumahan te sengekumpeniya he sundaru wey pulis he midsugù te menge punuan he memumuhat wey menge Perisiyu. Ne ebpenusulù he nengegumeenan sikandan. <sup>4</sup>Ne zutun, si Jesus, geina te wazà mekeeles diyà te kandin is langun he egkehitavù kandin, midsinugung din sikandan ne mid-insà te, “Hentei is ebpen-ahaan niw?” <sup>5</sup>Ne midtavak dan te, “Si Jesus he tigNeserit.” Ne migkagi si Jesus te, “Iyan a ebpen-ahaan niw.”

Ne zutun en daan si Hudas, kes mid-akal ki Jesus. <sup>6</sup>Ne hein migkagi si Jesus te, “Iyan a,” nemekepemuley-ang dan ne nengepiley zan. <sup>7</sup>Ne mid-uman med-insà si Jesus te, “Hentei is ebpen-ahaan niw?” Ne midtavak dan med-uman te, “Si Jesus he tigNeserit.” <sup>8</sup>Ne migkagi si Jesus te, “Migkagi ku en he iyan a. Emun iyan a ebpen-ahaan niw, kenè niw mulà

dekepa heini is menge zuma ku.”<sup>9</sup> (Umba nekagi zin heini su egketuman sikan is in-ampù din he egkagi te, “Is minsan sevaha zà te menge etew he imbegey nu kediey, wazà netazin.”)<sup>10</sup> Duen ubpit ni Simon Pedro ne midhulavut din ne midtibas din is suluguen te lavew he memumuhat ne netenaan haazà diyà te kewanan he telinga ne nesapla haazà is telinga zin. Is ngazan dutun te suluguen, si Malkus.<sup>11</sup> Ne midawey ni Jesus si Pedro, ke sikandin te, “Igumè nu heeyan is ubpit nu su is ibpaantus kedì te Amey ku, kenè ku ve ed-entusen?”

### Is Ked-uwita ki Jesus Diyà te ki Anas

<sup>12</sup> Ne zutun, haazà is menge sundaru wey is kepitan dan wey elin daan is menge pulis te menge Hudiyu, midakep dan si Jesus ne mibakus dan.<sup>13</sup> Ne midhunaan dan uwita sikandin diyà te ki Anas su enugang si Anas ni Keyipas te lavew he memumuhat dutun he tuig.<sup>14</sup> Iyan si Keyipas kes midsambag te menge Hudiyu he kinahanglan he ebpatay is sevaha he etew he elili te tivuuk he kehudiyuwan.

### Is Nehuna he Kebarew ni Pedro

(Juan 18:15-18; Mateo 26:69,70; Marcos 14:66-68; Lucas 22:56,57)

<sup>15</sup> Si Pedro wey is sevaha pa he sumusundan, edteltelukun dan ki Jesus. Ne haazà he sumusundan, nekilala sikandin te lavew he memumuhat ne tenged dutun miduma ki Jesus ne midseled dutun te lama te valey te lavew he memumuhat.<sup>16</sup> Ne si Pedro mulà, diyè dà sikandin te gawas uvey te pultahan. Ne zutun midlawang is sevaha he sumusundan he kilala te lavew he memumuhat ne midlelagan din haazà is bahi he impevantey zutun te pultahan ne impeseled din si Pedro.<sup>17</sup> Ne haazà is bahi zutun te pultahan, mid-insaan din si Pedro te, “Sumusundan ke ve zaan kenian te etew?” Ne midtavak si Pedro te, “Kenà.”

<sup>18</sup> Ne midtetavun te uring is menge pulis wey menge suluguen su megenew haazà, ne edhizazang dan dutun. Ne mid-amur zutun si Pedro te kandan su edhizazang.

### Is Ked-imbistigaha ki Jesus Duen te Lavew he Memumuhat

(Juan 18:19-24; Mateo 26:57-66; Marcos 14:55-64; Lucas 22:66-71)

<sup>19</sup> Ne zutun in-insà ki Jesus te lavew he memumuhat is menge sumusundan din wey is penurù din.<sup>20</sup> Ne midtavak si Jesus te, “Wazà mekeeles is menge penurù ku ziyà te menge etew su ziyà a mebpenurù te menge simbahan wey ziyà daan te Valey te Megbevayà he egketiguman te tivuuk he kehudiyuwan. Wazè ku ieles is minsan hengkey he lalag ku.<sup>21</sup> Maan is iyan a ed-insaan nu? Insai niw is nemekezineg kedì su netuenan dan is migkagi ku kandan.”<sup>22</sup> Ne te nekagi ni Jesus haazà, midsumbag sikandin te sevaha he pulis he edhithitindeg dutun te uvey

zin ne migkagi haazà is pulis te, “Maan is nekegehem ka he edtavak te iring kenian diyà te lavew he memumuhat?” <sup>23</sup>Ne midtavak kandin si Jesus te, “Emun mezaat is migkagi ku, kegiya nu ke hengkey is mezaat he nekagi ku, ne emun ke wazà mezaat, maan is midsumbag a kenikew?”

<sup>24</sup>Ne zutun impeuwit ni Anas si Jesus he mibakus diyà te ki Keyipas he iyan tutuu he lavew he memumuhat.

**Sikan is Ikezuwa wey Sikan is Huziyan he Kebarew ni Pedro**

*(Juan 18:25-27; Mateo 26:71-75; Marcos 14:69-72; Lucas 22:58-62)*

<sup>25</sup>Ne kemulu pa si Pedro zutun is edhidhizang. Ne zuen minge etew zutun he mid-insà kandin te, “Kenè ke ve sumusundan daan ni Jesus?” Iyan, mibarew ni Pedro. Ke sikandin te, “Kenà a iyan.” <sup>26</sup>Ne zuen daan dutun sevaha he suluguen te lavew he memumuhat. Haazà he suluguen, megeget duen te nelepungan ni Pedro te telinga. Ne migkegiyan din si Pedro te, “Henduen be te neehè ku sikew geina ziyà te midekepan ki Jesus. Duma ke zin buwa?” <sup>27</sup>Ne mibarew en maan si Pedro ne segugunà mid-ukarà is manuk.

**Is Ked-imbistigaha ni Pilatu ki Jesus**

*(Juan 18:28-38; Mateo 27:1,2,11-14; Marcos 15:1-5; Lucas 23:1-5)*

<sup>28</sup>Ne zutun mid-uwit dan en maan si Jesus puun dutun te valey ni Keyipas ne midhendiyè dan te turugan te gubirnedur he Rumanu. Ne meselem pa utew zutun. Ne ziyè dà is minge punuan he minge Hudiyu te gawas su wey kenè dan mekesupak te vetasan dan te kekgelumpiyuwi su ke edseled dan dutun wazà itugut kandan is kedtampu te kegkaan te Idlavung te Kedlevayi. <sup>29</sup>Tenged dutun migawas si Gubirnedur Pilatu ziyà te kandan ne ke sikandin te, “Hengkey is idsumbunga niw kayi te etew?” <sup>30</sup>Ne midtavak is minge punuan te, “Emun kenà selaan heini, kenè dey pezem id-etuvang kenikew.” <sup>31</sup>Ne midtavak si Pilatu te, “Kuwa niw sikandin dini su iyan kew susi kandin sumalà is ibpenurù te kesuguan niw.” Ne migkagi is minge Hudiyu te, “Wazà itugut kenami te velaud niw te minge Rumanu is kedhukum te kemetayen.” <sup>32</sup>(Umba neulaula heini su egketuman is midtagnà ni Jesus he edhimetayan sikandin pinaagi te kedrensanga te krus.) <sup>33</sup>Ne midseled si Pilatu zutun te turugan ne mid-umew zin si Jesus. Ne migkagi si Pilatu te, “Hadì ke ve te minge Hudiyu?” <sup>34</sup>Ne midtavak si Jesus te, “Kenikew zè be he isip heini is insè nu ke hadì a wey ke ziyè be ebpuun heini te selakew en he etew?” <sup>35</sup>Ne midtavak si Pilatu te, “Hudiyu e ve! Is minge zuma nu he Hudiyu wey is minge punuan he memumuhat, iyan mid-uwit kenikew zini. Hengkey is salè nu?” <sup>36</sup>Ne midtavak si Jesus te, “Is kegehem ku te kedhadì, kenà dini ebpuun te kelibutan. Su ke zini ebpuun mibpekidtebek en geina is minge sakup ku wey a kenà mezakep te minge Hudiyu, iyan, kenà dini

te kelibutan ebpuun is kegehém ku te kedhadì.” <sup>37</sup>Ne migkagi si Pilatu te, “Hadì ke ves?” Ne midtavak si Jesus te, “Tutuu heeyan is nekagi nu su hadì a. Umba midhendini a te kelibutan. Umba neetew a zini te lumpad. Midhendini a su wey ku ikepesavut ke hengkey is tutuu he tuluuwen. Is langun he menge etew he egkesuatan dan he metueni zan is tutuu he tuluuwen, ebpeming dan kediey.” <sup>38</sup>Ne zutun migkagi si Pilatu te, “Meupiya pezem ke zuen netau te tutuu he tuluuwen.”

Ne zutun te nekagi zin heini, midlawang en maan si Pilatu ziyà te menge Hudiyu ne ke sikandin diyà te kandan te, “Wazè ku egketuanan he salè din. <sup>39</sup>Ne zini te keniyu te menge Hudiyu, duen betasan niw he emun Pista te Kedlevayi, ibpaawà ku is sevaha he egkesuatan niw he pirisu. Egkesuatan niw ve he ibpaawè ku heini is hadì niw te menge Hudiyu?” <sup>40</sup>Ne mibpememensag dan te, “Kenà iyan sikandin, kekenà, iyan nu ipaawà si Berabas.” (Ne haazà si Berabas, tulisan.)

### Is Kedhukumi ki Jesus te Kemetayan

(Juan 19:1-16; Mateo 27:15-31; Marcos 15:6-20; Lucas 23:13-25)

**19** <sup>1</sup>Ne zutun insugù ni Pilatu he ipevugel si Jesus. <sup>2</sup>Ne hein netapus te menge sundaru haazà is kebugela zan kandin, mibengkulè dan is dugiyen he gawed ne insuup dan diyà te ulu zin. Ne zutun impekukumbalè dan kandin is merigà he kumbalà su uvag hadì. <sup>3</sup>Ne mid-uvayan dan su ebelvelayen dan. Ke sikandan te, “Kumusta ka, sikew is hadì te menge Hudiyu!” Ne midsumbag dan sikandin.

<sup>4</sup>Ne zutun midlawang en maan si Pilatu ne migkegiyan din haazà is menge Hudiyu te, “Ibpelawang ku en maan sikandin dini te etuvangan niw su wey niw metueni he wazè ku naahà he salà he neveelan din.” <sup>5</sup>Ne zutun midlawang si Jesus he kemulu midsuupan is ulu zin te zugiyen wey midsun-uzan te merigà he kumbalà. Ne migkagi si Pilatu te, “Tengtengi niw sikandin!” <sup>6</sup>Ne is menge punuan he memumuhat wey is menge pulis, hein neehè dan si Jesus, mibpememensag dan te, “Himetayi, iransang te krus!” Ne midtavak si Pilatu te, “Iyan kew medransang kandin te krus su siak, wazè ku egketuanan he salè din!” <sup>7</sup>Ne migkagi ziyà te kandin haazà is menge Hudiyu te, “Sumalà te kesuguan dey, kinahanglan he edhimetayan heini he etew su midsupak din is kesuguan su migkagi zin he iyan sikandin sikan is Anak te Megbevayà.”

<sup>8</sup>Ne te kegkezinèga ni Pilatu kayi, mid-iseg is kegkehandek din, <sup>9</sup>ne midseled en maan sikandin dutun te turugan ne ke sikandin diyà te ki Jesus te, “Hendei ka ebpuun?” Ne wazà dutun medtavak si Jesus. <sup>10</sup>Ne mid-uman megkagi si Pilatu te, “Maan is kenè ka egkagi? Wazè nu ve metueni he zekelà is kegehém ku; igkepaawè ku sikew ne egkehimu zaan he idsugù ku he iransang ka te krus?” <sup>11</sup>Ne midtavak si Jesus te, “Is kegehém nu te kebayabayà kediey, ke wazè pa ivegey heini te Megbevayà

diyà te kenikew, wazè nu geina egkehimu. Umba sikan is midsugù he uwita a zini te kenikew, iyan edhuna he zekelà is salè din, kenà sikew.”<sup>12</sup> Ne zutun, mid-iseg is gustu ni Pilatu he edlibriyen din si Jesus, iyan, mibpememensag en maan haazà is menge Hudiyu, ke sikandan te, “Emun ibpaawè nu heeyan he etew, egkuntedahan nu is hadi tew ziyà te Ruma he si Cesar su is etew he iring kayi he ebpahadi, ebpekigkuntada ki Cesar.”<sup>13</sup> Ne zutun te nezineg haazà ni Pilatu, impelawang din si Jesus ne mibpinuu zutun te pinuwè din te hukmanan, kes migngезanan dan te Gebata te kinеgiyan he Hibriyuhanan, *ne ke và dà kenitew, midseegan te vatu.*

<sup>14</sup> Ne neudtu en dutun. Ne haazà he andew, iyan andew te kedtegenahi zan te Pista te Kedlevayi. Ne zutun migkagi si Pilatu ziyà te menge Hudiyu te, “Heini en sikan is hadi niw!”<sup>15</sup> Ne zutun mibpememensag en maan haazà is menge Hudiyu te, “Himetayi en, iransang te krus!” Ne migkagi ziyà te kandan si Pilatu te, “Ibperansang ku ve is hadi niw te krus?” Ne midtavak is menge punuan he memumuhat te, “Iyan dà hadi dey si Cesar!”<sup>16</sup> Ne zutun intugut ni Pilatu he iransang si Jesus diyà te krus.

### Is Kedrensanga ki Jesus Diyà te Krus

*(Juan 19:17-27; Mateo 27:32-44; Marcos 15:21-32; Lucas 23:26-43)*

Ne is menge sundaru, mid-uwit dan si Jesus<sup>17</sup> ne migawas dan dutun te inged ne impetiang dan ki Jesus haazà is krus he edrensangan kandin. Midhendiyè dan te egngезanan te Tulan te Ulu. (Ne te kinеgiyan he Hibriyuhanan egngезanan te Gulguta.)<sup>18</sup> Ne zutun inransang si Jesus te menge sundaru. Ne zuen pa zezuwa he inransang dan daan diyà te krus. Impasek dan is krus te sevaha ziyà te egkegивang, ne is sevaha, diyà te egkekewanan, ne ziyà te teliwazà si Jesus.<sup>19</sup> Duen insurat ni Gubirnedur Pilatu he impezeket dan dutun te zivavew te krus. Is menge lalag he insurat, edhenduen te, “Si Jesus he TigNeserit he Hadi te Menge Hudiyu.”<sup>20</sup> Mezakel he menge Hudiyu is nemekevasa zutun su uvey te inged he Hiruselim haazà is midrensangan ki Jesus. Tetelu he kinеgiyan is kedsurata zutun: Linatin, kinеgiyan he Gerisyahanen, wey kinеgiyan he Hibriyuhanan.<sup>21</sup> Ne zutun migkagi haazà is menge punuan he menge memumuhat diyà te ki Pilatu te, “Deyzey ke wazè nu pezem isurat is ‘Hadi te Menge Hudiyu.’ Iyan nu isurat is, ‘Migkagi heini is etew he hadi sikandin te menge Hudiyu.’ ”<sup>22</sup> Ne midtavak si Pilatu te, “Kenè en egkeilisan. Iyan en is insurat ku.”

<sup>23</sup> Ne haazà is menge sundaru, hein ingkeransang dan en si Jesus diyà te krus, migkuwa zan is ugelingen din ne mibahin dan te heepat he vahin su wey zan pudu mekekuwa is menge sundaru zutun. Ne zuen kumbalè din he te kedhevela zutun wazè din pidtemuwan.<sup>24</sup> Ne tenged dutun

migkagi is minge sundaru te, “Kenè tew ebindasen, kekenà, edripahan tew wey tew metueni ke hentei kenitew is ebpegekaked.” Umba neulaula zan heini su egketuman kes netagnà dengan he Lalag te Megbevayà he insurat he edhenduen te,

“Mibahinbahin dan is ugelingen ku  
ne midripahan dan is bisti ku.”

Ne neulaula haazà dutun te minge sundaru.

<sup>25</sup>Ne zutun te uvey te krus ni Jesus, edhithitindeg is iney zin ne zutun daan sikan is suled he vahi te iney ni Jesus, wey si Maria kes esawa ni Kelupas, wey elin daan si Maria Megdelina. <sup>26</sup>Ne hein naahà ni Jesus is iney zin wey sikan is sumusundan he mahal ziyà te gehinawa ni Jesus, migkegiyan din is iney zin te, “Inà, iyan en heeyan anak nu.” <sup>27</sup>Ne zutun migkegiyan din sikan is sumusundan din te, “Iyan en heeyan iney nu.” Ne puun dà dutun he andew ziyè en med-ubpà is iney ni Jesus te valey zutun te sumusundan ni Jesus.

### Is Kebpatey ni Jesus

*(Juan 19:28-37; Mateo 27:45-56; Marcos 15:33-41; Lucas 23:44-49)*

<sup>28</sup>Ne zutun netueanan ni Jesus he nepasad din en is langun he netagnà mehitenged kandin, ne migkagi te, “Egkemezahan a.” Ne pinaagi zutun netuman is netagnà dengan diyà te insurat he Lalag te Megbevayà. <sup>29</sup>Ne zuen umuy zutun he nepenù te mepezes he inumen. Migkuwa zan is ispungha ne intereb dan dutun, ne midtiyuk dan haazà te zeisek he kayu he egngezanan te hisup, ne indiwalwal ziyà te vèbè ni Jesus. <sup>30</sup>Ne hein nesupsup ni Jesus haazà, migkagi te, “Nepasad ku en is langun.” Ne midungul ne zutun minatey.

<sup>31</sup>Mahapun haazà ne iyan andew te kedteganaha te Pista te Kedlevayi. Is minge punuan he minge Hudiyu, midhendiyè dan te ki Pilatu ne midhangyù dan he ipepenlepui zin is minge paa zuen te impenransang te krus wey mebpematey su wey mehimu he ikeawà is minge lawa zan puun te krus te kenè pa Andew te Kedhimeley. Su haazà he Andew te Kedhimeley, utew mahal he andew ziyà te minge Hudiyu. <sup>32</sup>Ne midsugù din is minge sundaru. Ne mibeyaan dan ne mibpenlepuan dan is minge paa zuen te sevaha he inransang duma ki Jesus, ne human dan sikan is sevaha pa. <sup>33</sup>Ne hein iyan en si Jesus, neehè dan he minatey en, umba, wazè dan en penlepui sikandin. <sup>34</sup>Iyan, is sevaha zutun te minge sundaru, mibpilak din te vangkew is tengkilizan ni Jesus ne zuen midtudà he ebpuun dutun he lengesa wey wahig. <sup>35</sup>Siak is midsurat kayi, edtistigusan ku he tutuu heini su neehè ku en. Netueanan ku he tutuu heini is insurat ku. Umba insurat ku su wey kew zaan meketuu. <sup>36</sup>Umba neulaula haazà su egketuman sikan is tagnà diyà te insurat he Lalag te Megbevayà he edhenduen te, “Wazà minsan sevaha te minge tulan

din he egkelepù.” <sup>37</sup>Wey zuen daan insurat he tagnà he edhenduen te, “Edtengtengan dan is etew he mibpilak dan.”

### Is Kedlevenga ki Jesus

(Juan 19:38-42; Mateo 27:57-61; Marcos 15:42-47; Lucas 23:50-56)

<sup>38</sup>Ne hein nepasad haazà, si Jose he tig-Eremetiya, midhendiyà sikandin te ki Pilatu. (Ne haazà si Jose, sumusundan ni Jesus, iyan, meeles su egkehandek te menge punuan he menge Hudiyu.) Midhangyù he egkuwaan din is lawa ni Jesus ne midtugutan ni Pilatu. Ne mibeyaan ni Jose is lawa ni Jesus ne mid-uwit din. <sup>39</sup>Ne si Nikudimu, sikan is nenumbaley ziyà te ki Jesus te sevaha he mezukilem, miduma zaan dutun. Duen mid-uwit din he kelimahan he kilu he pehemut he alus he midsehugan te pehemut he mira. <sup>40</sup>Ne migkuwa zan is lawa ni Jesus ne mibukusan dan te meputi he manggad ne inragkes dan dutun is menge pehemut sumalà is betasan te menge Hudiyu te kedleveng. <sup>41</sup>Ne ziyà te uvey te midrensangan ki Jesus duen lugar he mibpememulaan te kayu. Ne zuen dutun surung he penlevengà he sikan pa mepasad he wazè pa melevengi. <sup>42</sup>Ne geina te egkezegusu zan su iyan haazà andew te kedtegana te pista, wey geina te uvey zà daan dutun te midrensangan ki Jesus, ne zutun dan isavuk haazà is lawa zin.

### Is Kegkevanhew ni Jesus

(Juan 20:1-10; Mateo 28:1-8; Marcos 16:1-8; Lucas 24:1-12)

**20** <sup>1</sup>Ne zutun te egkerkeriwaswas en te andew he Duminggu, midhendutun te surung he penlevengà si Maria Megdelina te kemulu pa merusirem. Neehè din he naawà kes batu he inlekeb dutun te gemawan te surung. <sup>2</sup>Ne tenged dutun, mibpelelaguy ne midhendiyà te ki Simon Pedro wey zuen te sevaha he sumusundan, sikan is mahal ziyà te gehinawa ni Jesus. Ne migkegiyan sikandan ni Maria te, “Is Nengazen tew he si Jesus, in-awè dan duen te midlevengan kandin ne wazè dey metueni ke hendei zan uwita.” <sup>3</sup>Ne migaanggaan si Pedro wey haazà is duma zin he sumusundan su edhendutun dan te surung. <sup>4</sup>Ne mibpelelaguy zan is dezuwa, iyan, nehunaan si Pedro zuen te zuma zin he sumusundan, ne nehuna he nekeuma zutun te surung he penlevengà. <sup>5</sup>Ne midtikintikin sikandin su edsinilingen din haazà is surung. Neehè din sikan is menge meputi he manggad he nekesavuk dutun, iyan, wazà sikandin medseled. <sup>6</sup>Ne zutun nekeuma si Simon Pedro is nehuziyan, ne midseled mulà sikandin. Neehè din daan kes menge meputi he manggad <sup>7</sup>ne elin daan neehè din kes penyuwilu he imbukus te ulu ni Jesus. Wazà heini iamur zutun te menge zuma he manggad su midlumpi ne nekesivey te nesevukan. <sup>8,9</sup>Ne zutun midseled daan sikan is sumusundan he nehuna he nekeuma. Neehè din daan haazà is langun, ne minsan pa te wazè dan



pa metueni is minge insurat he tagnà he kinahanglan he ebenhawen si Jesus, midtuu sikandin dutun *he nevanhew en si Jesus*. <sup>10</sup>Ne zutun mid-uli haazà is dezuwa he sumusundan.

**Is Kebpaahà ni Jesus ki Maria Megdelina**  
(*Juan 20:11-18; Mateo 28:9,10; Marcos 16:9-11*)

<sup>11</sup>Ne si Maria mulà, kemulu pa sikandin dutun te gawas te surung is edsinegew. Ne zutun te edsinegew sikandin, edtikintikin is edsiniling dutun te surung. <sup>12</sup>Ne zutun neehè din is dezuwa he velinsuguen te Megbevayà he utew meputi is bisti zan. Ebpimpinuu zan dutun te nesevukan te lawa ni Jesus; haazà is sevaha, ne ziyà te egkeulunan ne is sevaha, diyà te egkesikuwayan. <sup>13</sup>Ne mid-insaan dan si Maria te, “Bayi, hengkey is idsinegew nu?” Ne ke si Maria te, “Migkuwa te etew is lawa te Nengazen, ne wazè ku metueni ke hendei zan uwita!” <sup>14</sup>Ne zutun midlilingey sikandin ne neehè din si Jesus is edhithitindeg dutun, iyan, wazè din mekilala si Jesus. <sup>15</sup>Ne migkegiyan ni Jesus te, “Bayi, hengkey is idsinegew nu? Hentei is ebpen-ahaan nu?” Ne kunaan ni Maria ke iyan sikandin sikan is ed-elima te minge pinemula zutun, umba migkagi te, “Mama, ke iyan ka migkuwa te lawa zin, kegiya nu ke hendei nu isavuk su egkuwaan ku.” <sup>16</sup>Ne zutun migkagi si Jesus te, “Maria!” Ne mid-etuvang si Maria ne te kinegiyan he Hibriyuhanen migkegiyan din si Jesus te, “Rebuni!” he ke vâ dà kenitew, “Menunudlù.” <sup>17</sup>Ne migkagi kandin si Jesus te, “Kenè ka kepkep dini su wazè e pa vetuna pehendiyà te Amey ku. Beyai nu is minge suled ku ne kegiya nu te, ‘Edhendiyà a te Amey ku, diyà te Megbevayè ku. Iyan daan sikandin Amey niw wey Megbevayè niw.’” <sup>18</sup>Ne mibeyaan ni Maria Megdelina sikan is minge sumusundan ne ke sikandin te, “Neehè ku is Nengazen tew,” ne zutun mibpenudtul zin haazà is migkagi ni Jesus.

**Is Kebpaahà ni Jesus Duen te Minge Sumusundan Din**

<sup>19</sup>Ne hein mezikilem dutun te andew he Duminggu, netigum haazà is minge sumusundan diyà te sevaha he valey he midlekevan dan su nahandek dan te minge punuan he minge Hudiyu. Ne netekewtekew zan te ziyà si Jesus te teliwazè dan ne ke sikandin te, “Berakat he mebmelinawen kew.” <sup>20</sup>Ne zutun impeehè din kandan is minge pali diyà te minge velad din wey ziyà te tengkilizan din. Ne utew nengelipey is minge sumusundan te kebpaahà kandan te Nengazen. <sup>21</sup>Ne mid-uman si Jesus mekgagi ziyà te kandan te, “Mebmelinawen kew. Ne iring te midsugù a te Amey tew he Megbevayà, edsuguen ku zaan sikiyu.” <sup>22</sup>Ne te nekagi zin heini midhiyupan din sikandan ne ke sikandin te, “Berakat he meulini kew te Wagas he Mulin-ulin. <sup>23</sup>Ne tenged kayi emun ebpeseyluwen niw is minsan hentei he nekesalà, ebpeseyluwen daan te

Megbevayà, ne emun kenè niw ebpeseyluwen, kenà daan ebpeseyluwen te Megbevayà.”

### Is Kebpaahà ni Jesus ki Tomas

<sup>24</sup>Ne si Tomas, he migngezanan te Sereping, sevaha sikandin dutun te sepulù wey zezuwa he mibpili ni Jesus. Wazà sikandin dutun te mibpaahà kandan si Jesus. <sup>25</sup>Ne tenged dutun midtutulan sikandin te menge zuma zin he sumusundan, ke sikandan te, “Mibpaahà kenami is Nengazen tew.” Iyan, migkagi si Tomas te, “Kenà a ebpeketuu he nevanhew sikandin emun kenè ku egkeahà is menge velad din he nepelian te ransang. Ne emun kenè ku egketiyukan te tezù ku is pali diyà te velad din wey ziyà te kilid din, kenà a ebpeketuu.”

<sup>26</sup>Nekewalu pa zutun, nengetigum en maan haazà is menge sumusundan ni Jesus duen te netiguman dan ded he valey, ne zutun daan si Tomas. Midlekevan dan ded haazà is baley ne minsan pa zutun netekewtekew si Jesus mekehitndeg dutun te teliwazè dan. Ke sikandin te, “Berakat he mebmelinawen kew.” <sup>27</sup>Ne zutun migkegiyan din si Tomas te, “Itiyuk nu kayi is tezù nu; is belad nu zaan, itiyuk nu kayi te kilid ku; ahaa nu is menge velad ku ne kenà ke en maan meduwazuwa, kekenà, tuu ka.” <sup>28</sup>Ne zutun midtavak si Tomas te, “Iyan ka Nengazen ku, iyan ka Megbevayè ku!” <sup>29</sup>Ne migkagi kandin si Jesus te, “Midtuu ke ve tenged dà te naahà a kenikew? Utey zeyzey sikandan is minsan wazà kedi mekeahà, iyan, edtuuwan e zan.”

<sup>30</sup>(Duen mezakel he egkengein-inuwan he naahà te menge sumusundan ni Jesus he wazà ikesurat kayi te libru. <sup>31</sup>Ne iyan insurata ku kayi te menge egkein-inuwan su wey kew meketuu he iyan si Jesus Anak te Megbevayà wey sikan is mibpili te Megbevayà he ibpahadi, ne emun edtuu kew kandin ebegayan kew te untung he wazà pidtemanan.)

### Is Kebpaahà ni Jesus Diyà te Veyvey

**21** <sup>1</sup>Netapus pa is nepipira he andew zutun, ne mid-uman mebpaahà si Jesus dutun te menge sumusundan din diyà te veyvey te ranew he Tibiryas. Ne iring kayi is hitavù te kebpeehè din kandan. <sup>2</sup>Dutun si Simon Pedro, wey si Tomas he migngezanan te Sereping, si Natanael he tigKana ziyà te Geliliya, wey elin daan dutun is dezuwa he anak ni Sibidiyu wey zuen daan dutun dezuwa pa he menge sumusundan ni Jesus. <sup>3</sup>Ne migkagi si Pedro te, “Ebpenlaya a te pait.” Ne migkagi haazà is menge zuma zin te, “Eduma key kenikew.” Ne mid-untud dan te avang ne mibpenlaya zan dutun te tivuuk he kezukileman, iyan, kenè dan ebpekeutel. <sup>4</sup>Ne hein egkepawè en dutun, dutun si Jesus te veyvey. Naahà sikandin te menge sumusundan, iyan, wazè dan mekilala he iyan bes si Jesus. <sup>5</sup>Ne migkagi ziyà te kandan si Jesus te, “He menge suled,

duen be neutel niw?" Ne midtavak dan te, "Wazà." <sup>6</sup>Ne ke si Jesus te, "Ilaya niw heeyan is laya ziyà te zapit te egkekewanan ne ebpekeutel kew." Ne in-uman dan ilaya haazà is laya ne hein mibuwat dan kenè dan egkehenat tenged te utew mezakel is neutel he pait. <sup>7</sup>Ne sikan is sumusundan he mahal ziyà te gehinawa ni Jesus, migkagi sikandin diyà te ki Pedro te, "Iyan heeyan sikan is Nengazen tew." Ne hein netuenan ni Pedro he iyan si Jesus haazà, insun-ud din is kumbalè din he midluwas din, ne mid-umpak diyà te wahig, ne midhendiyà te veyvey. <sup>8</sup>Ne haazà is menge zuma zin he sumusundan, midtelukun dan he ed-untud dutun te avang. Eguyuzen dan haazà is laya he nepenù te pait. Uvey zan dà te veyvey, menge kesiyawan dà he mitrus. <sup>9</sup>Ne hein nekezunggù dan, neehè dan is mid-ug-uganga he menge vaga. Ne zuen dutun supas wey pait he intuug. <sup>10</sup>Ne migkagi kandan si Jesus te, "Uwita niw zini is duma he menge pait he neutel niw." <sup>11</sup>Ne mibayaan ni Simon Pedro haazà is avang ne miguyud din sikan is laya he nepenù te zezekelà he pait. Is kezakel zutun te pait ne nenggatus wey kelimahan wey tetelu. Ne minsan pa te utew mezakal haazà is pait, ne wazà mevindas haazà is laya. <sup>12</sup>Ne migkagi si Jesus te, "Ramag kew en." Ne wazà nekeaku kandan te menge sumusundan he ed-insà ke hentei sikandin su netuenan dan he iyan haazà kes Nengazen he si Jesus. <sup>13</sup>Ne migkuwa ni Jesus haazà is supas ne mibpenalad din kandan ne mibpenalad din daan haazà is nengelutù he pait.

<sup>14</sup>Iketelu en haazà he kebpaahà ni Jesus dutun te menge sumusundan din hein nevanhew en sikandin.

### Si Jesus wey si Pedro

<sup>15</sup>Ne hein nekeramag dan en dutun, migkagi si Jesus diyà te ki Simon Pedro te, "Sikew Simon, he anak ni Juan, mahal e ve utew ziyàn te gehinawa nu, lavew te gehinawa te menge zuma nu kedi?" Ne midtavak si Pedro te, "Uya, netuenan nu he mahal ka zini te gehinawa ku." <sup>16</sup>Ne migkagi si Jesus te, "Semaki nu is menge nati ku he kerehidu." Ne mid-uman mekgagi si Jesus te, "Simon, anak ni Juan, mahal e ve utew ziyàn te gehinawa nu?" Ne midtavak si Pedro te, "Uya, netuenan nu he mahal ka zini te gehinawa ku." Ne migkagi si Jesus te, "Bentayi nu is menge kerehidu ku." <sup>17</sup>Ne mid-uman mekgagi si Jesus te iketelu te, "Simon, anak ni Juan, mahal e ve utew ziyàn te gehinawa nu?" Ne mibmesakit is gehinawa ni Pedro zutun te iketelu he ked-ul-uliti ni Jesus te, "Mahal e ve utew ziyàn te gehinawa nu?" Ne midtavak si Pedro te, "Netuenan nu is langun; netuenan nu he mahal ka zini te gehinawa ku." Ne migkegiyan sikandin ni Jesus te, "Semaki nu is menge kerehidu ku. <sup>18</sup>Uteu venar is egkegiyan ku kenikew he zengan hein menguhed ke pa iyan ka mibakes te lawa nu ne sumalà ke hendei is egkesuatan nu ne zutun ka ebpevayà.

Iyan, ke megurang ke en ebpekererepa ka ne selakew he etew is ebagkes te lawa nu ne ed-uwiten ka zutun te kenè nu egkesuatan.”<sup>19</sup>(Umba migkagi ni Jesus heini su idtazem din is paagi te kebpatèy ni Pedro he egkevantug din is Megbevayà.) Ne te nekagi ni Jesus heini, mid-uman megkagi te, “Sunud ka kediey.”

<sup>20</sup>Ne zutun midlilingey si Pedro ne neehè din he edtinundug kandan sikan is sumusundan he pinedtayà ni Jesus. Iyan sikandin sikan is dutun te kedlavung dan te wazè pa mebpatèy si Jesus, diyà sikandin te zurug ni Jesus. Iyan daan kes mid-insà ki Jesus te, “Hentei kenami is ed-akal kenikew?”<sup>21</sup>Ne hein naahà ni Pedro haazà he sumusundan, migkagi ziyà te ki Jesus te, “Haazà is duma ta, hengkey is egkeulaula kandin keuzemà?”<sup>22</sup>Ne midtavak si Jesus te, “Emun iyan ku egkesuatan he kemulu pa sikandin uuyag keuzemà dutun te kedlikù ku zini te kelibutan, wazè nu kelavet. Sunud ke zà kediey.”<sup>23</sup>Ne ziyà te langun he minge tumutuu nekeeneb is tudtul he kenà ebpatèy haazà he sumusundan, iyan, wazà iyan kegiya ni Jesus kandin he kenè en ebpatèy haazà he tumutuu su iyan migkagi zin is, “Emun iyan ku egkesuatan he uuyag pa keuzemà dutun te kedlikù ku, wazè nu kelavet.”<sup>24</sup>Iyan a haazà is sumusundan he egkegiyen din; iyan a ebpenistigus he tutuu heini is langun; iyan a midsurat kayi te langun ne netueanan dey he tutuu heini is insurat ku.

<sup>25</sup>Mezakel pa is mid-ulaula ni Jesus. Emun idsurat id-amin ne minsan is tivuuk he kelibutan, kenè pa ereg he egketeguan te minge libru he edsuratan dutun.